

ASO LULU, 21 IANUARI 2015

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: I le agaga faaaloalo ou te toe faatalofa atu ai i le paia maualuga o le Maota i lenei taeao fou ona ua alafai mai i faguga lelei le paia o le Palemene. E talitonu e le lava upu ma tala, e le lilo e le lanu foi i la tatou tatalo, o le faasagi ma le faapolo i le Atua e ta'ui ai ma tau'i le alofa ma le agalelei o le Atua ua tatou toe faapenei ai i lenei taeao fou. O le a se mea e fai pe ana tatou momoe ma momoe ai lava? O lea ua tatou toe fesilafai i le taeao manino ma le taeao totoa. O se taeao matagofie i le vaavaai atu i le sagisagi fiafia o le paia o le Palemene i le afio mai o lau Afioga i le Taitai o le Malo, le mamalu maualuga i a outou Afioga i Minisita aemaise le paia lasilasi o le Maota Fono i sui usufono mamalu uma o Tootoouli o le atunuu, lau Afioga i le Taitai o le Itu Agai ma lea tala-na-atoa aemaise foi o le affio o tupu ma ee, tamalii ma failauga, o le paia lava lea aua aao o lo tatou Malo i Faauluuluga o Matagaluega ma Faalapotopotoga ua tatou mafuta i lenei aso ona o le lauliliuina ma le toe faaauauina o a tatou galuega - ia i le Atua pea Lona viiga e faavavau.

E lagona foi le mafanafana ona e talitonu e le o tuua i le tapuaiga mamalu a Samoa i ona tulaga, i ona paia ma ona mamalu sauoo aua le tapuaiga a Tumua ma Pule, Itua'u ma Alataua, le paia i Aiga ma a latou Tama aemaise o le tapuaiga a Lana Afioga Mamalu O Le Ao o le Malo ma lana Masiofo, aemaise foi le Sui o le Fono a Sui Tofia ma le Masiofo, le Faamasino Sili ma le Ofisa o Faamasinoga. Ua malo afua ailao ua maua ona o le Atua i lenei taeao. E manatu o lea ua tatou toe potopoto i le lagi e mama ma le soifua manuia.

TUUIINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P.2014/2015 Nu.190, Tali atu a le Malo i le P.P.2013/2014 Nu.112, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa i le P.P.2011/2012 Nu.105, Lipoti Faaletausaga a le Matagaluega o Faamasinoga ma Pulega tau Faamasinoga mo le Tausaga Faaletupe 2010/2011.
2. P.P.2014/2015 Nu.191, Lipoti Faaletausaga a le Komisi o le Toefuataiga o Tulafono a Samoa Iulai 2013-Iuni 2014.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2014/2015 – felafolafaiga faaauau i luga o le
faitauga faalua – Aso 2**

FOFOGA FETALAI: E tolopo a tatou galuega i le Aso Fono ananafi o lo o saunoa le sui usufono o Samoa Aoa.

Tulai mai se tasi o sui usufono mo le Au Palota Taitoatasi, Afioga Maualaivao Pat Ah Him e faaauau lau saunoaga na tolopo mai i le aso ananafi.

Tulai mai le sui usufono mamalu.

Afioga MAUALAIVAO PAT AH HIM (Palota Taitoatasi): Faafetai i lau Afioga i le Fofoga Fetalai mo le avanoa. E talitonu o lea ua motu i vasa le suigaula nai le papa aua o lea ua tea atu se faasagi ma se faapolo aua le agalelei o lo tatou Atua; o le Atua o Malo; aua ua maleifua mai i faguga lelei le aoa o le paia o le Maota nei i lau Afioga i le Fofoga Fetalai, le Taitai o le Malo ma le Kapeneta, aemaise foi o le Taitai o le Itu Agai ma le mamalu i sui usufono o le Palemene, ae tainane foi le tapuaiga a Lana Afioga Mamalu O Le Ao o le Malo faapea le Sui o le Fono a Sui Tofia, e le gata i lea o le aoa o Samoa i fata faitaulaga e fia i lo tatou atunuu, o tama ma tina matutua faapea foi alo ma fanau. Ou te talitonu o lenei itula si ou itumalo, faafofoga maia ma tapuai mai se i faamaea atu ua toe tasi lava le minute o le tatou lauga ma se manatu ona ou toe liliu atu foi lea i lo tatou itumalo e tusa ai ma le Fonotaga a le Palemene.

Ua faafetai i lau Afioga i le Fofoga Fetalai ona o lea ua toe amatalia le tatou Fonotaga ma e talitonu e maea le aso ananafi o ou i le mataupu lea i le malae vaalele. E le toe tele se faamatalaga e faia i le malae vaalele aua o le mea e sili ona faafetai ai ona ua manino mai i tala e feaveai i nusipepa po o ni tala foi e feaveai solo i le faatauina o lo tatou malae vaalele, ae faatau foi le malae vaalele o Saina foi. O tagata faigata nei o Saina. O lea ua manino, e leai, e le sao le mea lea. E faafetai ai i lo tatou Malo ona o lea e mau lava le toovae aua sa i ai lava le popolega, a o lea ua tautino e leai e fau e konekarate Saina le malae vaalele mo le manuia o Samoa, ae le faapea e faatauina lo tatou malae vaalele ma o le mea lea e momoli atu ai le faafetai.

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai ou te fia faauilavea i le saunoaga a le sui usufono.

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O au lea ou te tau matau i le tausaga e 1950 faasolo mai ai i le tausaga 1960 po o le 1970, sa tatou vaaia ai nai toeaia Saina. E pei lava o le taimi lena ua agai ina uma atu i latou na uluai omai i totonu o le atunuu ma galueaiina le tele o a tatou faatoaga.

Sa masani ona ou vaaia i Saleufi ma Taufusi o feoai ai toeaia nei ma a latou avega, o ato tetele lava e faatau ai fuamoa faapea foi ma kapisu. A feoai la i taimi na e ili a latou faaili ina ia faaleo atu ai i le tóatele, o i latou nei e

faigofie ona o atu i ai tagata e faatau mai oloa nei. E pei lava o nuu nei i le faasolo atu i Saina. O le taimi sa ou nofo aoga ai i Saina na ou iloa ai mea ia.

Na ou matauina la i le taimi lena, o le tóatele o o tatou tagata e pei e ula ma vaai maualalo i toeaia ia. O le vaai fo'i lena sa vaai ai i tamauli. E pei sa i ai le tulaga lena sa ou matauina, e vaai maualalo tele o tatou tagata i toeaia nei o Saina ma tamauli i le tulaga fo'i lea e pei e faailoga tagata.

O le atunuu lena o Saina, ua tele a latou fesoasoani mai i Samoa. Ana leai Saina e le tele nei mau mea lelei ua tatou vaai i ai aemaise o fale tetele o le Malo ua faigofie nei ona fai ai a tatou galuega.

E manatua i le 1983 na malaga ai le Fofoga Fetalai e talanoa i isi Malo se i fai se Maota o le Palemene. Ana le tuu atu i Saina e leai se Maota lea tatou te aae ai nei. O le mea lea e tupu o lea e nana i lalo upu ia, le mea lea e nana i lalo. O le aoga o lena Malo ma le tele o a latou fesoasoani.

Na faatoa uma nei lava ona tatala le falemai. Ua aae ai ma isi nuu ua fai e Saina o latou faleaoga ma ua faaopoopo atu i ai ma le Malo o Iapani. E tutusa lelei lava foliga ma Saina ma e tu i tafatafa o Saina. O ni malo agalelei tele.

O lea fo'i sa outou faafogafoga ananafi o ou tulai atu i nisi fo'i o e matutua o le Itu Agai o lo o galulue fo'i ma isi Kamupani Saina. E faailoa atu ai lo tatou faaogaina o le itu vaivai. O le a le itu vaivai? O lo tatou vaai maualalo i isi tagata - o le itu vaivai lena. Se i vagana le Taitai e le mamao lana tofa lau Afioga i le Fofoga Fetalai, ona ia faaogaina lea o uiga vaivai ia o lo tatou atunuu sa tatou omai ai. O lea fo'i e puna ae i totonu o le Maota lena. E nana i tua upu, "Talofa e ia Samoa, talofa e i o tatou eleele." O mea vaivai ia e faigofie ona tosina i ai loto o e fo'i e vaivai, a o lea e nana i tua le faailoga lanu.

A tatou tilotilo i le Maota lena, o le a le tulaga lea e i ai? O lo o i nei fanau, a fanau, a fanau a isi fo'i alii mai Saina, o tamalii sa latou atiaaina le atunuu lena. O fanau, a fanau, a fanau, a fanau a isi fo'i tagata sa omai mai fafo e pei o Siamani, Peretania ma Amerika. A o le mea lea e tupu, tatou te tafua le afi. E tafu le afi ina ia faatupu ai le vevesi, ae taofia ai mea lelei o lo o taumafai i ai lo tatou Malo e fai – atinae ina ia maua ai ni galuega mo a tatou fanau. O lea fo'i e i nei fanau, o fanau, o fanau, o fanau, o fanau a tagata Fiti ma tagata Toga na omai i le atunuu lena i le 1200 ma le 1400.

Lau Afioga i le Fofoga Fetalai, o le a tatou agai la i isi ae le se i tatou matau lelei aemaise o lea tatou te agai atu i le faiga palota. Se tatou talanoa i mea e aoga e atiae ai lo tatou atunuu ma a tatou fanau, ae le o lo tatou talanoa e sue ai i luga o le tulaga o le faailoga lanu.

Lau Afioga i le Fofoga Fetalai, o le ala lena o lea na ou tulai ai i le aso ananafi ma faamanatu atu ia i latou ia e faavalea e le nusipepa ina ia taulia ai. Soia ia lo outou faaogaina o uiga vaivai ia o lo tatou atunuu o le faailoga lanu i tagata Saina, o tagata uli ma isi lava tagata mai fafo ae se i vaai po o ai ia e faia le Malo. O fanau, a fanau, a fanau, a fanau, a fanau a latou na omai mai fafo ma lafo a latou maa i le atiaaina o lo tatou atunuu.

Lau Afioga i le Fofoga Fetalai, o lou tulai atu lena e momoli atu le faamalo i le sui usufono o lo o saunoa nei ona ua ia laga le mataupu lea. E leai se Malo faavalevalea e nofo nofo, nofo nofo lava alu faatau fua se malae vaalele o se isi atunuu, na o le gau aano le mea e maua ai ma e leai se latou mea e maua ai.

Lau Afioga i le Fofoga Fetalai, o le fesoasoani atu lena.

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai o se mea e fia faamalamalama ma fia faasao.

FOFOGA FETALAI: E leai se mea e fia faamalamalama o lea sa fai le folasaga a le Afioga i le Palemia i le lauga a Maualaivao. E leai la se mea e ono faasaina.

Afioga Hon Palusalue Faapo II: Lau Afioga i le Fofoga Fetalai, a e faafofoga lelei i le saunoaga atoa a le Afioga i le Palemia, e pei e faalauaitele aemaise o le afaina ai o nisi.

FOFOGA FETALAI: E le afaina e i ai se taimi ona faamanino lea ona e le mafai ona toe fai se isi faasaoga i luga o le isi faasaoga. O le Palemia o lea na tulai e fai le faamalamalama i luga o le faasaoga.....

Afioga Hon Palusalue Faapo II: E faapefea mea vaivai ia e fai mai ai?

FOFOGA FETALAI: Se Palu, o lea foi o le a e taumafai.....

Afioga Hon Palusalue Faapo II: Ona pau lava lea. O lea e taumafai atu lenei Itu a o lena e te taumafai e.....

FOFOGA FETALAI: E le afaina, e maua lou taimi aua o lea e te le i lauga.

Afioga Hon Palusalue Faapo II: O lea e te puipuia le Alii Palemia ma lana saunoaga.

FOFOGA FETALAI: O lou tiute lena. O lea foi e puipui oe Palu. O lea ou te puipui ia te oulua uma o Taitai o le Maota Fono, ae a ou vaai atu la o lea o le a tau mimilo foi le tatou Fono i le isi pito ona ou taoama lea. Tuu pea le avanoa o lea e manino ma malamalama le saunoaga.....

Afioga Hon Palusalue Faapo II: Ma le faaaloalo lava lau Afioga i le Fofoga Fetalai, faalogo i le saunoaga a le Afioga i le Palemia, o le matua faauigalua pei ona.....mai e le.....

FOFOGA FETALAI: E leai, o lea e manino le folasaga a le Afioga i le Palemia.

Afioga Hon Palusalue Faapo II: E le o manino lau Afioga.....

FOFOGA FETALAI: Malie Palu, alaala i lalo! O lea o le a ese le mea o le a oo i ai le tatou Fono o lea e manino le folasaga ona o le lauga a le sui usufono o lo o saunoa. Tulai mai se tasi o sui usufono mo Palota Taitoatasi, Afioga Maualaivao Pat Ah Him.

Tofa Hon Tuuu Anasii Leota (Siumu): Lau Afioga i le Fofoga Fetalai.....

FOFOGA FETALAI: Tuuu.....

Tofa Hon Tuuu Anasii Leota: O se tamai mea lava lea e fia faasao. O le saunoaga a le Afioga i le Palemia o lea e faapea mai o le faaili. Leaga sa ou ola foi i Taufusi, Lalovaea ma Saleufi. E le o se faaili la le mea lea e saunoa i ai le Afioga i le Palemia.

FOFOGA FETALAI: Ia o lea ua maua lou finagalo.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, se o le mea lea e leaga ai le mea o le sui usufono ua leva ae faavalevalea.

Tofa Hon Tuuu Anasii Leota: O le mea o le opiaga e le o se faaili.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le mea e faasao, e le faasaoa e le isi le faasao a le isi sui usufono.

FOFOGA FETALAI: Alaala i lalo le sui usufono.

Tofa Hon Tuuu Anasii Leota: Aua le soona faia upu faapea.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Nofo i lalo.

FOFOGA FETALAI: Alaala i lalo le sui usufono.

Tofa Hon Tuuu Anasii Leota: Aua le saga faia upu faapea.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O lea ou te talanoa i le lauga lea.

FOFOGA FETALAI: Alaala i lalo Tuuu, Tuuu.

Tofa Hon Tuuu Anasii Leota: O le mea lava e masani.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O faitau a outou Tulafono Tumau?

Tofa Hon Tuuu Anasii Leota: Se i tau fai fuafua.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Se aua le fiapoko.

FOFOGA FETALAI: Alaala i lalo le sui usufono. O le mea lena na ala ai ona ou taumafai atu i le taimi ua sola, e tau taoama le tatou Fono i a tatou Tulafono Tumau, o lea sa saunoa le sui usufono o lo o saunoa, tulai le Afioga i le Palemia e fai lana faasaoga ma lana faamalamalamaga i le lauga a le sui usufono, e le mafai la ona toe tulai se isi sui usufono e toe fai se isi faamalamalamaga po o se faasaoga. O le ala lena e tataua ona....o lea ua fa tausaga o le tatou Paeaiga lenei o faamanatu atu lava, faamanatu atu lava ia

tulaga. O lea e i ai le avanoa, e le faapea e leai so outou avanoa, a uma ona tulai ae lea i le taimi o le avanoa ona saunoa lea.

Tulai mai le sui usufono e faaauau le sanoaga.

Afioga MAUALAIVAO PAT AH HIM: Faafetai atu i lau Afioga i le Fofoga Fetalai, ma e talitonu sa galo ia te au ona tau atu i le amataga o lau mataupu, ia lenei aso ia tatou lauamatootoo, e faapena le finagalo o le Atua i le aso i le fefaaaliaiga o taofi, ia ae malo faafetai i lenei taeao matagofie, fai fiafia le tatou galuega.

Ou te momoli atu le faafetai tele i le Afioga i le Palemia, masalo ou te le toe oo foi la i le malae vaalele aua o lea ua uma ona faalatele ma faamanino ia vaega uma ia, ona ou te le talapipia atua vaeatu le Maota le talaaga o tagatauli ma tagata Saina ma tagata mai fafo mai isi atunuu, o lea ua maea ona saunoa i ai le Taitai o le tatou Malo. Ma ou te talitonu foi ia o le.....Sa ou i ai i le taimi ua sola i le maliu vaeatu le Maota o le isi tama Saina o Ah Chu, sa fai ai le molimau a le Afioga i le Palemia, ma o se tala malie foi i lana.....o lea ou te mataua, ma o se tala faaulaula pei o se tala foi lea e faailoa mai ai le fiafia i le mafutaga a tagata Saina faapea foi tina Samoa. Sa faapea mai le Afioga i le Palemia, e tasi le mea sese a le Malo o Samoa ua fai, o le faanonofu o tama Saina ma tina Samoa, ona alu lea o le talie. A ou faauigaina la, e ese le manaia o le combination lea, ia ae faafetai. O le a ou see ese ma lea vaega, ae faafetai tele lava ua ou fiafia ua manino le mataupu.

O le a ou oo mai i le Minisita mo Faatoaga ma le Faleloa o Faatoaga, faamalo i lau Afioga i le Minisita, pau lava le agaga o lau vaai i ai i le tatou manu vaeatu le paia o le Maota, o le mamoe. Na aumai le uta mamoe talu ai, sa ou manao e fai sau lotoa mamoe ae na o le tasi lau mamoe na maua, ia ua ou le iloa, atonu e toe maua mai se isi uta, ae ua uma ona fai lau pa mamoe e tuu i ai manu nei, vaeatu le Maota.

O lau vaai foi lau Afioga i le Minisita ua manaia le tele o talo sa taugofie, a o le taimi lenei, ia ua fai sina taugata laitiiti i le tatou atunuu, masalo po o ua tele le talo e ave i fafo e moomia mai fafo le talo, e manaia lena, ioe, ae talitonu atonu e i ai nisi metotia lelei e atili ai ona lau le talo i fafo ae tele lava o totoe aua le tatou maketi.

E toe tasi lava lau mataupu, ona oo mai lea i le Minisita mo le Soifua Maloloina o lau Minisita, faamalo faafetai i lau Afioga i le Minisita. E leai se talavale i lau Afioga i le Minisita, pau lea o le Matagaluega ua sii uma ia totogi ua tai 100, 200% ia....ae pau lea o le Matagaluega e te alu e vaai i le falemai i se tau e sili ona taugofie. Ae faamalo i le Pulega, ou te talitonu e pei ona saunoa le Taitai, faatoa uma nei ona tatala le falemai o le vaega lona lua o le falemai, ua matuai manaia lava i lau matamata, faafetai i le Pulega faapea foi le faafoega o le tatou falemai. Pau lau fautuaga isi o tatou atunuu, ia e le faapea na o mai foi nei o le tino e mai ai le tagata. A ou vaai i ai i polokalame ia e fai nei a le Matagaluega a le Soifua Maloloina e faalauiloa ia ma le faasilasilaga, e toe tasi lava le mea, toe lava o le o i magaala o le pasi ane lava o le tagata faapea o la e etuetu le aao, fesili i ai, a ua tuia, ave i le taavale ave i le falemai, ioe, ona soifua maloloina uma lea o tagata. O lau fautuaga isi o tatou atunuu i le taimi lenei o le mugala, ia faaoga faamalu, faaoga pulou laufala lautetele, o i ina e auala mai ai ia faamai, ioe, ina ne i te i se isi ua gasegase, vaai o outou alo ma fanau, vaai le tina ma le tama e faatau se ili, tau faatafatafa tau faapau le taulaga i se isi taimi ma faapena foi faalavelave, ae

faatau se ili, ia ma faalogologo pe toe maua afea ni ea conditions po o nisi poloketi a le Malo, ia apalai i ai i le taimi lenei, o le taimi lava lenei e apalai i ai, pe fia le tupe e totogi, ae ia.....E leai ma se sui usufono o le Maota lenei e le o tofa i se ea malulu i le po, e moni lava, e manaia foi pe a lu lena....masalo o le isi sui usufono lava ua i ai ana ea ia na maua atu i i, le iloa po o ua fa ea i le potu, ioe. Ae ui i lea, o le fautuaga lena, o le fautuaga lena a le Matagaluega, a o le Minisita, faafetai lava mo le.....

FOFOGA FETALAI: Malie le sui usufono, se i tulai mai le Afioga i le Minisita mo Punaoa Faanatura ma le Siosiomaga, tulai mai lau Afioga i le Minisita.

Tofa Hon Faamoetauloga Lealaiauloto Ulaitino Faale Tumaalii (Minisita mo Punaoa Faanatura ma le Siosiomaga): Lau Afioga i le Fofoga Fetalai faafetai mo le avanoa. Leai na o se mea e fia faamalamalama atu i le sui usufono lea. E le faapea ua ave lava so o se isi air condition units ia, e pei lava ona fai atu, o le poloketi ia le mea lea. Na o ē lava la o lea e focus i ai le faatinoina o le poloketi e mafai ai ona control results, pulea lelei ma le faatinoina o le galuega, o lea e ave i ai ea malulū. E oo foi la i le Matagaluega, e o e siaki ea ia ma aumai faamaumauga e fai i ai iloiloga e fausia ai fuafuaga mamao ma tapena lipoti e lagolago ai le poloketi lea. Ae e faamalamalama atu faapena, e le o faapea o le sau lava o lea ave i ai e aunoa ma se aoga i le poloketi. O lea e faamaumau uma lava e o lo o ave i ai air malulū ia.

O tulaga foi i le SIDS ma ea malulu na ave i ai, faafetai o lena na maua mai le poloketi lea na fesoasoani tele i le tau i le hosting o le Fonotaga lea, aua o lea na ave i ai ia isi ea malulu e faamalulu ai potu o le taligamalo, e ese mai air malulu ia o lo o faaoga i le poloketi e pei ona faasilasila atu ananafi. E pei o le faamalamalamaga lea e tusa o lenei taeao. Ia manuia.

Tofa Levaopolo Talatonu (Gagaemauga Nu. 2): Lau Afioga i le Fofoga Fetalai o le mea e fia faasao, faamolemole lava.

FOFOGA FETALAI: Tulai mai le sui usufono.

Tofa Levaopolo Talatonu: E faamalulu atu i le sui usufono mamalu o lo o saunoa, e leai se isi o matou o momoe i ni ea malulu, ae afai o lena na maua fua sina au sefulu, tufatufa mai mo matou pe afai e.....

FOFOGA FETALAI: Ia malie le sui usufono, se i tuu atu le avanoa i le sui usufono mo Alataua Sisifo ma le sui usufono mo Falealili lea e tau tulai mai. Tulai, faasao pe faamalamalama?

Afioga Lafaitale Patrick Leiataualesa (Alataua Sisifo): E fia faasao lau Afioga i le Fofoga Fetalai. O le mea sili o lea ua saunoa manino le Afioga i le Minisita e faamalamalama vaega ia, a o le saunoaga tuulafoai a le sui usufono o lea tatou te tofafa i ea ia, e moni lava e faatalasua i le faalogo, o la e faalogologo mai le atunuu, a o le mea sili o lea ua manino le faamalamalamaga a le Minisita ne i te i foi ua faapea le atunuu ua tatou avea

uma ia mea a o la e faamuamua lava ia e sa talosaga i vaega ia. Ma le agaga faaloalo.

FOFOGA FETALAI: Ia se tasi o sui usufono mo Falealili, Afioga Tusa Misi Tupuola, e te fia saunoa? Ia e le afaina. Tulai mai se tasi o sui usufono mo Palota Taitoatasi, Afioga Maualaivao Pati Ah Him, faaiua maia lau saunoaga aua le toe afea ea ia ma le pisa, ae agai sao o lea ua malamalama le finagalo o le.....

Afioga MAUALAIVAO PAT AH HIM: Faafetai, leai, na ala ona ou toe oo i ai ou te faaloalo tele i le Afioga i le Minisita, pei e ala ona ou taua e le o se isi itu, a ua manua foi se finagalo, ia faamalulu atu.

FOFOGA FETALAI: Malie, se i tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e sao le mea lea na tulai mai ai le sui usufono, leaga o tatou talanoaga, o le tele lava o a tatou talanoaga e faaataata a lafoga ina ia ola ai le tatou Fono. O au e ta le 5:00 ua ou ala i le vevela o le mea, e leai foi sau masini ea malulu, ae o le taimi lenei, ua ou faalogo o le tau aupito vevela lea ua i ai i le 50 tausaga lenei. Ia o au la ou te fealua ma lou ili e tapilipili a ou moe foi a te i ae tapili, e leai lava se mea e sili ona maua gofie e pei o le ili e leai se tau e alu ai e te nofonofo lava oe ma tapili, na o le \$4.00 i le maketi.

FOFOGA FETALAI: Tulai mai le sui usufono e faaiua mai le saunoaga.

Afioga MAUALAIVAO PAT AH HIM: Faafetai. Leai ua uma foi lea vaega. E faamalulu atu ou te le faapea atu, ua outou ola i ea ia na tufa nei pe poloketi, leai, o lau lava tala moni lava, pei ona fai atu, na musumusu mai foi lau uo ia te au, e te le i alu, fai atu, o lea lava ou te iloa, ae ou te iloa lava le mea e maua mai ai lau ea, ou te alu e faatau mai i le Le Well ia po o se mea e faatau ai. Ia ae faamalulu atu, e le faapea o.....ae ui i lea, ia masalo o le a faamaea atu sau faamatalaga.

I lou itumalo, faamalo le tapuai i la outou faafofoga mai, o lea lava e fai lava se manatu aua foi la outou sui usufono nei sa auala mai i le tatou itumalo, ia e le mailoa po o fea e agi i ai le matagi i le tofa a le tatou Malo o lo o i ai le tatou mataupu e uiga i le tatou itumalo, ae o le a taumafai pea sui usufono e taumafai e puipui ona o maua nei ma le sui usufono ia na omai, ua outou faafofoga mai na outou fai mai ma te omai i le HRPP, o lea la ua ma omai ma te tutulai i le HRPP. I la outou faafofoga mai foi la e uiga i mataupu nei, e le faapena ia aga a le HRPP, e tusa pe ma te i i, e le alo ia le mea e faatino e le HRPP i mea e lelei ai ia itumalo ma le atunuu, e tiga ona fai atu, o maua nei, o le a le tonu? Faamisi le mea lea, e leai e le faapena le faiga o le mea. O le mea la lea e faamanino atu i le tatou itumalo, onosai mai pea. O fea lava le mea e tafe i ai le au, e ma te tafefea ai foi ma maua, ioe. Ma le faaloalo, ia manuia le tapuaiga a si ou itumalo aemaise o le atunuu, soifua, faafetai lau Afioga i le Fofoga Fetalai.

FOFOGA FETALAI: Malo saunoa i le uluai saunoaga o lenei taeao. Ia e ui lava ina lupaluta le gataifale i lau tuleiga ma lau saunoaga, ia e talitonu ua manino ma malamalama, faafetai mo le sao taua i le tatou Tala o le Tupe le sui usufono.

Tulai mai le sui usufono mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Faafetai i lau Afioga i le Fofoga Fetalai mo le avanoa. O lenei foi taeao e faatalofa atu i lau Afioga i le Fofoga Fetalai, le Taitai o le Maota, e faatalofa atu foi i le Taitai o le Malo ma le Kapeneta, le Taitai o le Itu Agai aemaise o sui usufono mamalu uma o le Maota Fono nei.

Lau Afioga i le Fofoga Fetalai e faatalofa atu foi i le mamalu o le atunuu o lo o faafofoga mai i le Fonotaga a le Palemene i lenei taeao, i le afio o Lana Afioga Mamalu, O Le Ao o le Malo ma le Masiofo, le Afioga i le Sui Ao ma le Masiofo, le afioga i le Faamasino Sili ma le vasega o Faamasinoga. E le gata i lea o Faauluuluga o Matagaluega ae faapea foi Faalapotopotoga a le Malo, o Kamupani ma le Aufaipisinisi. E faatalofa atu foi i le mamalu o Samoa i le afio o Aiga ma Tama, o Tama ma o latou Aiga, Usoga a Pule ma Tumua ma le lautele o le tatou atunuu.

Lau Afioga i le Fofoga Fetalai, avea ia lenei itula e momoli atu ai foi se manatu o le sui usufono o lenei itumalo e tusa ai ma le Tala Faatatau Faaopoopo o le Tupe. A o le i oo lau faamatalaga lau Afioga i le Fofoga Fetalai i le Tala Faaopoopo o le Tupe, e muai avatu foi nai manaoga o lenei itumalo. E muamua lava lau Afioga, atonu o lo o i ai, o le manaoga muamua o lea lava o lo o matauina lava atonu o lo o faataoto lava polokalame a le tatou Malo mo pasi foi ia. Ia, o le Aoga High School a Aana Nu.1, masalo o le tasi lea itumalo e tele le aoga, o lo o aofia ai itumalo e tolu pe fa sui usufono, e aofia ai ma Minisita e toalua i totonu o lenei itumalo. O le taimi nei ua faigata lava talu nei ona sui le taimi o aoga ona maua auala e omai ai tamaiti pe a uma aoga i le afiafi. Se i silasila ane i ai i latou o lo o faatinoina nei polokalame pe maua ai se avanoa mo se pasi mo le Aoga Faaitumalo a Aana Alofi Nu.1 e alu atu i Faleasiu i le Aana Nu.1, Nu.2 ma le Nu.3. Ae le gata foi i lea, o lenei aoga o lo o faapea ona ave ai le Science, o lo o faapea ona auai mai ai nisi o alo ma fanau a le itumalo o Falelatai ma Samatau faapea Aiga i le Tai. O le faanaunautaiga lava ina ia mafai ona ave le faamuamua a tamaiti i le aotauina o latou aoga ina ia maua so latou lumanai manuia.

Lau Afioga i le Fofoga Fetalai, e toe valuvalusia aa o le fau i lau Afioga i le Minisita mo Aoga, Taaloga ma Aganuu e tusa ai foi ma le malae taalo o lenei aoga, ua loa tausaga o i ai se talosaga ina ia toe faaleleia. O le faanaunautaiga lava ua leva ona maea ona amatatia le faatinoina, ae faigata e le o mafai ona faaoga e le aoga, aemaise o taaloga foi, ona e maa tele le malae. Sa i ai foi se talosaga muamua ma sa faapea ona faailoa mai e le Minisita o le a faaoo atu i ai. E toe valuvalusia aa o le fau pe mafai ona maua i lenei tausaga faaletupe le faaleleia o lenei malae.

Lau Afioga i le Fofoga Fetalai, ona ou oo mai lea i le auala, e le tagisa lenei itumalo i ni auala galue, na pau lava o lea o auala o nuu, ona o le auala faalava e alu atu i Fasitootai e tau i Faleatiu ma Satapuala, ona o le tele o faifaatoaga a lenei itumalo ae faigata ona savalia le oo mai i tai e aumai a latou fua o faaeleleaga ae fia manaomia pe mafai ona silasila ane i ai le

Malo i le faaleleia o nei auala. E le gata i lea o le auala o le afioaga o Satuimalufilufi lea o lo o faaogaina e le Aoga Primary School. O lenei auala o lo o faapea ona faaogaina e le Pulega o le Suavai aua a latou pamuvai o lo o alu i uta, ma e agai atu foi i le facility lea i Oloamanu. E talosagaina ai pe mafai ona tagai i ai mo le faaleleia, aua e le na o le afioaga o lo o faaogaina, ae o lo o i ai foi nisi aseta taua a le tatou Malo.

Lau Afioga ona ou oo mai lea i le Tala Faaopoopo o le Tupe. E muamua ona avatu le faafetai ma le faamalo i Afioga i Minisita ma le Kapeneta, ae le gata i lea o Ofisa Sili o Pulega ma Pule Sili o Matagaluega ma Faalapotopotoga a le Malo o lo o latou faatinoina galuega ua faapea ona i ai i le tatou Tala Faaopoopo o le Tupe. Ua matauina ua tele le fesoasoani mai i le faaleleia o le aoina o nisi tatou seleni sa faapea ona le mafai ona aoina i tausaga ua tuana'i. O se vaega taua lea ua mafai foi ona faaopoopoina e faatino ai nisi o galuega fai a le tatou atunuu, aemaise o le Tala Faaopoopo o le Tupe o lo o taoto nei. E faafetaia foi lau Afioga i nisi o Matagaluega ua matauina o le tele lava o vaega o lo o faapea ona manaomia o vaega fou o lo o faapea ona le i fuafuaina i le Tala o le Tupe muamua. Na pau o lea o le talosaga, ia faaleleia atili ina ia faaitiitia manaoga i le Tala o le Tupe mo atinae ua leva ona fuafuaina.

Lau Afioga i le Fofoga Fetalai, ona ou oo mai lea, o ni manatu foi i atinae a le tatou atunuu. O fautuaga, ou te talitonu ua maea tapena le Malo ma Matagaluega eseese i le faatinoina o latou tiute, ae o nai fautuaga po o ni motugaafa foi e taoto atu i le Afioga i le Palemia ma le Kapeneta aua le faaleleia o nisi o auala. Ia o manatu lava atonu e mafai ona matou iloa uma vaega, ae afai ua faatino nisi o vaega, o le fesoasoani atu lava lea lau Afioga i le Fofoga Fetalai.

Ona ou amata mai lea lau Afioga i le Fofoga Fetalai i se manatu, ona ua taua tele le taua o lenei vaega o energy, o solar. O lou talitonuga lau Afioga i le Fofoga Fetalai, e ao i le atunuu, aemaise lava i le Malo ona tatou tagatagai loa pe mafai ona tapena se Matagaluega Tumaoti a le Malo e faatatau i le energy, aua o le taimi nei, pei na o le EPC lava lea... a o le tele o le energy e le gata o le production lea e fai e le EPC, a o energy efficiency o vaega eseese e faaleleia ai ma faaitiitia ai le eletise pei o air condition, o vaega faapea. I lou lea talitonuga lau Afioga, e ao ona i ai se Pulega po o se Department po o se Ministry e aveese mai ai, ona o le taimi nei o lo o tolu pe fa Matagaluega a le Malo ma Faalapotopotoga o lo o taumafai e faatino ia vaega. Ae lau Afioga, ou te talitonu afai e mafai ona tapena se Matagaluega....

FOFOGA FETALAI: Malie le sui usufono o lo o saunoa se i tuu atu le avanoa i le Minisita mo Punaoa Faanatura ma le Siosiomaga.

Tofa Hon Faamoetauloga Lealaiauloto Ulaitino Faale Tumaalii: Faafetai i lau Afioga i le Fofoga Fetalai mo le avanoa. Lau Afioga se i tau atu lava si mea lea ne i te i ua toe tu mai foi se isi sui usufono e saunoa i le mataupu lava lea. O lo o i ai le Komiti e ta'u o le National Energy Coordinating Committee lea e Taitaifono ai le Afioga i le Palemia ae ma Sui Taitaifono ai ma le Minisita o le EPC, lea e i ai itutino uma ia e soalaupule ai tulaga o policies i le puleaina o mea ia tau energy ma poloketi e talanoa uma i 'i. E tusa la o i inei e fetaia'i uma mai i ai itutino ia, e le toe manaomia la se tulaga foi lea e tau set up ai se Ministry fou e deal sa'o ma mea ia. E i ai uma lava itutino i le

National Energy Coordinating Committee lea e talanoa uma ai mea ia. O se faamalamalamaga lea ma lou faaaloalo lava.

FOFOGA FETALAI: Malo faafetai. Tulai mai le sui usufono mamalu e toe faaauau le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. Ia, mo se fesoasoani atu i le Afioga i le Minisita, leai o lea ua uma ona ou iloa le Coordinating Committee lea, ma ou te talitonu foi ua leva ona i ai. O le ala tonu lea na ala atu ai se fautuaga, e tele le talitonuga, ana ua i ai se vaega e fitoitonu, ua leva ona faigofie ona vave nisi o vaega o lo o faatinoina. Ae peitai ane afai o le tolu pe fa vaega eseese pei ona saunoa i ai le Afioga i le Minisita, e fetotoai foi ma le iloa se vaega e taitai. E lead le isi vaega i le isi vaega, ae taoto atu, ou te talitonu o le tasi lea vaega taua, e tatau lava ona silasila i ai le tatou Malo, e le gata o bio-diesel, o bio-fuel, o renewable energy e pei ona i ai, ae o le taimi nei ua leva ona faailo, e le o ata mai lava se tatou polokalame e improve ai le energy efficiency o le tatou atunuu. O le fautuaga, ona o se tasi foi o vaega....

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lena e i ai polokalame o mea na, masalo na o oe lava e te le o silafia. O le tulaga foi i vaega ia o lo o e agai i ai, o la e lava e sailiili malie i ai ona e i ai aafiaga o le tatou tamaoaiga. E pei la o isi foi talaoso ia e faasalalau mai faapea ua pasia le isi kamupani lea e talosaga i le faaaogaina o pau taavale e gaosi mai ai le malosi faafouina o le eletise, ma maua mai ai foi le suauu. E tele lava mau faafitauli e tulai mai na mea, ae fou foi lea metotia. O le tele ia o le mau talosaga faapena, ae o la e lava e taofiofi lava e le i faia i ai se iuga ona e tele le mau details la e tapa. E le gata i lena, ae i ai foi tulaga o kamupani uma lava nei e omai e aumai a latou talosaga. O isi e i ai tupe e pei la o le kamupani tele lea a le tama lea o Levao. E i ai la kamupani faapena e i ai tupe, a o le tele ia, o mea o miti. O la e faalagolago i le mea o le avatu o le ioega ona o loa lea e sue a latou tupe. O lea ou te iloa nei pe lua isi na ave foi i ai le ioega, e avatu le ioega ae omai foi fai mai ua folopu le latou talosaga e latou finances. E le faapea la o le tuai ona o tulaga na, e leai, o la e lava e alu polokalame. O lea foi ua faaoga eletise mai le la, o la e la e i ai lava polokalame, a o le tulaga lena o lea foi e i ai sailiiliga o lo o fai e Matagaluega ona e i ai faafitauli o lo o i ai i le tele o metotia lea o lo o aumai i le gaosiga o le eletise mai le la.

Lau Afioga i le Fofoga Fetalai, e pei o le tulaga lena, a o lea e faamaumau uma lava ou finagalo. Na pau lava le mea, pei ua fai si malosi o si au mataupu, e leai ni polokalame o i ai nei, o la e i ai polokalame.

FOFOGA FETALAI: Tulai mai le sui usufono mamalu e faaauau le saunoaga.

Afioga TOEOLESULUSULU CEDRIC POSE SALESA SCHUSTER: Faafetai lau Afioga mo le avanoa, faafetai atu foi i le Afioga i le Minisita aemaise le Afioga i le Palemia mo le faamalamalamaga.

O se tasi o vaega lau Afioga e avatu ai foi se tuualalo i le tapenaga pei ona saunoa i ai le Afioga i le Palemia o maliega ia ua faatino ma nisi o kamupani o lo o faapea ona latou taumafai e aumai nisi o malosiaga e alu i le la ma nisi o lo o faapea ona ave i ai. Ou te talitonu o nisi o saunoaga a le Afioga i le Palemia aemaise o le faanaunautaiga o le tatou atunuu ina ia faapau mai i lalo le tau o le eletise, ae peitai ane lau Afioga i le Fofoga Fetalai, a ou vaai atu i le tau o lo o ave i nei kamupani e faatauina mai ai e latou i le EPC le tau o le eletise, ou te talitonu po o le isi lima tausaga e le o mafai lava ona pau i lalo le tau o le eletise. O le uiga o lau faamatalaga lau Afioga i le Fofoga Fetalai....

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Minisita mo Galuega.

Afioga Hon Manualesagalala Enokati Posala (Minisita mo Galuega, Felauaiga ma Atinae Eeese): Lau Afioga i le Fofoga Fetalai, sa le manatu lava e faalavelave, ae ou te manatu pei o le isi vaega lea sa talanoaina o le energy efficiency. O le tasi lea vaega o lo o faatino i le poloketi foi lea o le Power Sector Expansion Project, lea na amata mai i le 2008 o lo o faaauau pea, lea e i ai Fiaga. O afi ia e i Fiaga o afi e fuel efficiencies, e tele le suauu e mafai ona faasao mai ai ma o afi e talafeagai lelei i lenei vaiata. O suiga uma ia o lea e vaavaai i ai i le tulaga o le faasaoina o le malosiaga lea. O lo o faaauau pea tulaga ia ma le suiga o tatou laina eletise ua leva ona faatino, o lea lava sa taumafai atu ma faamalamalama poloketi ia o lo o feagai ma le Faalapotopotoga. O le mea ua leva, e le o se mea e fai loa nei, o galuega e faaauau pea ma faagasolo.

O le tulaga i le fuafuaga lea ua faamanino, e i ai le NECC, National Energy Coordinating Committee, o la e foi e galulue le EPC, e le o se mea o patino i se vaega se tasi. O fuafuaga a le Malo lautetele, e tele vaega e aafia ai ina ia mafai ona lelei faatino aua o le tele o sulu e maua ai figota, e manuia ai le atunuu.

O le tulaga i le faamoemoe o le tatou tau o le eletise (tariff) ia, o lea e galulue faatasi ma le Regulator, o le Pule Faatonu e i ai tomai ma agavaa, o la e tapena, o la e tapena, o le tariff lea i le tau o le eletise lea e fuafua i le tausaga nei mo le isi tolu tausaga. O lea lava e siisii, e agai i luga le tau o le suauu mai fafo. E tele fesoasoani i le fuafuaga o renewable energy lea ua mafai ona faatino, o lea se i tatou talia tapenaga ma fuafuaga lea mo le tau o le eletise e pei ona tapena ai nei. Ae le faia pito tasi, e lautele e galulue ma vaavaai i se tulaga talafeagai, e o lua ma le suiga o le tau o le soifuaga e le na o Samoa, e faapena foi i atunuu i fafo, ona vaavaai lea o se faiga talafeagai mo le manuia o tagata. Ae lafo mai le galuega o lo o faatino e latou o i ai tomai, tuuina mai i le Kapeneta ma auiliili ma manuia ai tatou mo le agai i luma. Faafetai.

FOFOGA FETALAI: Mo le faasaoina o le taimi, tulai mai lau Afioga i le Palemia.

Susuga Hon Tuilaepa Fatialofa Lupesolai Aiono Neiote Sailele Malielegaoi: E toe fia faaopoopo atu lava le mea lea lau Afioga i le Fofoga Fetalai, e lua vaega o le polokalame o le renewable energy. O le vaega muamua, o le taofiga aua ne i toe sii, o le mea muamua lena, o le taofiga aua ne i toe sii. Aua a le faia polokalame ia, e le mafai ona taofia le alu pea i luga o le tau o le suauu ma alu atu ai lava ma le tau o le tatou eletise. E pei ona silafia e i ai le pau tele lea ua i ai nei o le suauu, pau ai foi ma le tulaga o le tau o le soifuaga i totonu o le tatou atunuu, ona e afua lena i le tele o le suauu lea ua tatala mai e Amerika, le suauu lea e filogia ma le mea o le papa, o le shale, lea la e i ai le metotia lena ua faaaoga nei e mimiti ese mai ai le suauu mai totonu e filogia i le papa. O lea la ua tele ai le suauu i Amerika ma tau taofiofia ai le alu i luga o le tau, ae toe alu lava i luga.

O le tulaga maualaga la o le fuafuaga lea e i ai nei, o le taofi aua ne i toe alu i luga le tau, ona amata loa lea ona tatau ona sau i lalo le tau ina ua liliu tatou e suia atoa a tatou diesel ae faaaoga loa le renewable energy. O lea la ua taoto fuafuaga, afai e faatino uma mea ia, e tatau ona oo atu i le 2017 ua tatou ausia le faamoemoe lena. Ae i ai lava nai faafitauli e pei ona saunoa manino i ai le Minisita o lea e tau foia i le taimi lenei. A o le mafuaaga, ona o le tulaga lea i le toatele o latou e eseese a latou fuafuaga o lo o aumai, a o le mea moni, o lea e taumafai le tatou Malo ina ia faatofufusia uma i latou, o le tele o i latou nei e produce ina le energy, o le tele foi lena o le guarantee e maua pea e tatou le malosi lea, ae mafai lava e le tasi po o le lua o lea ua talosaga mai ona fai uma lava le eletise lea o lo o moomia e tatou. O lea la e tau taofiofi ina ia tele producers ia maua ai le tauvaga e pau ai le tau i le tatou EPC ma o tatou tagata.

Lau Afioga i le Fofoga Fetalai, o le faaopoopo atu lena i le saunoaga manino a le Minisita.

FOFOGA FETALAI: Malo. Tulai mai le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai. Na pau lava lea o le auga o le fautuaga lea na taumafai e tuu atu, o se faataitaiga lau Afioga i le Fofoga Fetalai, o le taimi nei i le pili o le eletise, a aumai lata pili, e sau ai ma le 50sene o le fuel charge. A o le tariff lea e ave i kamupani i le taimi nei o lo o fuafuaina e fai e latou solar, po o le tai 50sene ea po o le 60sene. O lona uiga, e taugata atu le tau o le eletise lea o le a faatau mai e le EPC mai solar nai lo le tau o le penisini. Na pau lea o le avatu o le fautuaga, pe mafai ona toe tagatagai i ai. O le faanaunautaiga ina ia pau i lalo le tau o le eletise.

FOFOGA FETALAI: Ia, se i tulai mai le Minisita e faapupula atili le mataupu. Tulai mai lau Afioga i le Minisita mo Galuega, Felauaiga ma Atinae Eseese.

Afioga Hon Manualesagalala Enokati Posala: Lau Afioga i le Fofoga Fetalai, o le suiga fou lea na i ai le faatulagaga o le tatou tariff, e i ai le fuel charge, e i ai foi le user charge, ma tulaga o debt services o la e faatino i totonu o le Matagaluega. O factors ia e tolu o la e tuufaatasi, e i ai foi la pasene. A alu i luga ua faapena ona i ai se suiga i pasene a o le fuel charge. A

alu foi i lalo, e faapena. O le suiga o tau lea e i ai... ai se i vagana ua leai se tau e aumai ai le suauu mai fafo ona iloa lea ua tatou vaai ua i ai ni suiga. O nai sene la e fetuutuunai ai le alu i luga ma le pau i lalo ia manino ai ma malamalama. O tagata faapitoa e i ai tomai lea e faatino ai le galuega ma see ai i luma le tatou vaa. Ma le faaaloalo.

FOFOGA FETALAI: Ia se i tulai mai le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, o le mea e fia faasao. Pei o lea ua tau confuse lou mafaufau, ona o le sui usufono mo Aana Alofi Nu.3 ma le sui usufono mo Gagaemauga Nu.2 e ona le kamupani lea o le Green Power, a o lea ua faapea mai e taugata le solar i le suauu. Se i toe tilotilo lelei ae taofi la le mea a le vaega lea ae tatou toe foi i...

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga, na o le tasi lava le mea sao lea e avatu iinei, a o mea valea uma lava na e aumai i ina. E lelei ona ou toe faatepa le atunuu i le mea na i ai tatou ina ua tele le faaletonu na i ai lo tatou tamaoiga, o le isi lea, a o le i tulai mai le Vaega lenei. O le isi lea faafitauli tele na i ai i kamupani suauu nei, ua faulai nei a latou tupe e le mafai ona avea i fafo. O le mea la na i ai le tatou Malo i le taimi lenei, o i ina na faataoto mai ai loa se fuafuaga e lelei ona fai se faatauvaga i le 1993. Ona fai loa lea o le faatauvaga, ia manatua foi le vaitaimi lenei, o lea sa iinei le British Petroleum, o le Mopili, e i ai ma le isi kamupani e tolu ai kamupani. Ona fai loa lea o le faatauvaga, ona sau loa lea, ua malo le kamupani lenei, oti le BP, oti le Mopili. O le mea na matua tei ai le Mopili, o i latou ia e ana paipa ia e tai mai ai le suauu i lalo o le alititai, e tatau ona taugofie latou. A o faiga na a kamupani suauu na fai ia i tatou i na onapo, o le soona tuu i luga o le tau. E tasi lava le tausaga na fai ai le tauvaga lea, e uma atu lava le tausaga lenei ma taaifala atu ai lava ma lenei kamupani, aua foi e gau. E gau tele le aumai o suauu nei isi tamai atunuu. O le gau la lenei, lea na matua alu ai lava i lalo le latou peti, tusa o le gau lea na gau ai, na faatupe e le latou kamupani i o i tau na tuu i le au Papua, tusa na carry e Papua le gau lea na gau ai ia Samoa.

Ona oo loa lea i le 1985, fai loa le tatou faaiuga o le a toe foi i tua le mea e promote pea kamupani ia ona sau ai lava lea o le Mopili ma le BP, ona sau sau ai lea, ua taaifala BP, ae toe lava o le Mopili. O le mea la ua tupu, sa aumai e le Mopili a latou suauu, nai tamai tank, nai tamai vaa foi nei e le umi ae toe o toe omai, ona o le laitiiti o latou tane ia e i i. O le ala lenei na fai ai e le Malo le faiga fou, o le a tatou nono mai tupe mai le OBEC e USD\$5miliona, ia matua fau ai loa ni a tatou tane, toe take over e tatou ma tane a latou ae pulea loa e Samoa tane nei ona ave loa lea e fai ai le faatauvaga. O lea la na fai ai loa le faatauvaga lea i le tausaga e 1997. Sa ou tutu atu i i ma faamatala i le Palemene i lenei taimi le faiga o le tauvaga, e pei lava o le faiga o le tatou tauvaga. Le tauvaga foi lea o lo o fai nei e tatou faipule, e tai lima tausaga a e malo mai ona e sau loa lea e nofonofa i i i le lima tausaga, a uma foi ona toe o foi lea i tua e toe fai le isi tauvaga. E faapena la le tauvaga lea sa fai, e tai lima tausaga e supply ai ae faataoto mai

la fuafuaga i le faatulagaga o latou tau. O lea la e alu ai nei tatou, e aupito taugofie lava la tatou i le Pasefika. O faiga uma na lea sa fai e le tatou Malo e tau faamama ai le tau mo tatou tagata. O lea la e fai ma omai isi tagata o le Pasefika e sikaki le tatou system lea e fai nei, se i tau faataitai i ai. Ae ou te manatua i le 1997, ia e aumai le mataupu lenei, oi, o le faiga o le Malo i lenei taimi ma tusitusi foi i pepa. O lona uiga o lea e bribe le Malo. O ituaiga manatu valea lava ia e fai i le taimi lenei. A o le a la le mea lea ua i ai nei? O lea e aeae nei tatou i le tulaga o le suauu e taugofie tatou. Ae i le faatulagaga o le suauu, o le ala foi lea na alu alu, tatou o omai le bunker fuel e faatino ai a tatou afi ia i Fiaga ona e taugofie. Na taumafai le Malo ina ia tau pau mai ai le tau o le tatou eletise. Ae talu ai ona o lea e alu lava tatou i le tau taugofie, tatou te le o iloa o lea lava e taugofie tatou nai lo isi atunuu o le Pasefika. Ae a faatusatusa la i le tulaga lea o le a oo i ai tatou pe a faaaoga le solar, ona alu ifo ai lea i lalo, e maualalo lava le tau o renewable fuels nei e aupito maualalo lava le tulaga o le vai. O lea foi la e masani ona ou tulai atu ai ma faatino i le 1990 ae fai atu toetiiti USD\$100miliona le tatou loan e aumai e faatino ai. Sa ave le tatou talosaga i le tausaga e 1967, e avatu i le taimi lenei na o le \$1miliona ae teena e faletupe tetele nei, ona fai mai ua taugata tele, i le taimi lenei o taugofie le diesel.

Lau Afioga i le Fofoga Fetalai, o le ala lenei o lea na taumafai ai le tatou Malo e uunai nei atinae e taumafai nei i lo le tau faatali i le isi 50 tausaga ona pei foi lea o Afulilo, e fai atu ai ua faateleina le tau. Ae a fai i le taimi lenei, e oo atu i lenei taimi ua taugofie, e ono foliga taugata i le taimi lenei, ae faapena lava mea uma e alu i luga le tau. Ae pau lava lea o le ituaiga faiga, e tumau le tau ona alu ifo loa lea i lalo, o le tatou o uma e faatino a tatou eletise i luga o renewable energy, o le mea lenei o lea e agai uma i ai le lalolagi.

O le ala lenei o lea ou te tulai atu ai e avatu mea taua i i ae tou tutulai mai ma aumai... po o fea le mea na outou taetae mai ai na mea. E pei lava o le aso ananafi e fai atu mea tau totogi ae tulai mai foi le la faipule ma aumai mea e le sao. Ae tuu ia tatou polokiki, cheap politics, ae tatou vaai agai i luma mo le atinae o le atunuu.

Tofa Levaopolo Talatonu: Lau Afioga i le Fofoga Fetalai, leai na o sina mea lava lea e fia faamalamalama.

FOFOGA FETALAI: Ia, o lea e te agai i le lauga a le sui usufono mo Aana Alofi Nu.3? Ia, agai i se tasi o shareholder o le kamupani.

Tofa Levaopolo Talatonu: I le lauga lea a le sui usufono mo Aana Alofi Nu.3. Leai o le tulaga moni lava ia i le tau lea e i ai pei ona avatu, o le taugofie ia. E pei e foliga foi lea e taugata ona e toatasi lea e i ai i le taimi lenei. Ae o lea la ua malie foi i le faalogologo atu i saunoaga a le Palemia, o le ala tonu lenei e fai faa-competition, a o le faalavelave e leai ni au matou te taaalo. E pei lava o lea e fai si faiga mai o le tatou Malo mo le aumaiga o au ia, ae se i matou tauva e o i lalo tau po o ai e muamua taai fala. E pei o le mea lenei o lea ou te faatali ai, ae ua manaia le faataatiaga o le polokalame ae le o faatinoa.

FOFOGA FETALAI: Malo. Ia, se i tulai mai le Afioga i le Minisita mo Galuega, Felauaiga ma Atinae Eeseese.

Afioga Hon Manualesagalala Enokati Posala: Lau Afioga i le Fofoga Fetalai, sa saunoa le sui usufono mamalu ananafi i le tulaga o le instability o le system sa ou le tali lava i ai i le mataupu lea. Ona pau lava le mea sa ou faasaoina, o omoomo o auala. E sao o la e omoomo auala e tasi lana mea sao. O lea foi e i ai fuafuaga a le Kapeneta, ua fiu foi e tau polokalame le va ma konekarate i le faatinoga o galuega. Na alu le matou asiasiga, na tutu lau vaega ae ou fealuai e tilotilo i loli ma mea la e i ai, o mea o compactors foi la e i luga, e le aumaia i lalo e faaoga, ae tu lava i luga. Na ou fai atu, “O le a le mea ua le faaogaina ai?” Ae fai mai o la e faatali i le tama o la e alu e aumai parts. A o la e tu i le mea e fai ai le galuega.

O la e faafofoga mai contractors ia, e le o lelei. O le ituaiga mea foi lea seiloga e o atu le afaigaluega e tutu ai ma vaai i le faatinoga o galuega. O lea foi ua taumafai le Kapeneta e tolu masina ma lipoti mai aua a oo ina faitioina, e faitioina ai ma otegia le Minisita aemaise o le Matagaluega o la e feagai ma tulaga ia. Ua tasi la le mea sao - a o le tulaga lea e faapea na ia asia gauta i le SCADA sau e tasi le megauati (1mw).

E faapenei uma lava le tau. E ala ona faapena ona o le tau faapenei, ae se i vagana ua susulu atoatoa le la ona e vaai lea ua ato le 2 mekauati, ae a oo loa ina faamalumu le aso. Na ou faapea lava au o lea o lo o fai lana kamupani e galulue i le solar e tataua ona malamalama i ia mea, a o lea e foliga mai e le malamalama. Fesili i Saina na tou te galulue ona e manino ai lea ma le faaaloalo lava. (*I le sui usufono mo Gagaemauga Nu.2*).

Tofa Levaopolo Talatonu: Lau Afioga i le Fofoga Fetalai.....

FOFOGA FETALAI: Tulai mai muamua le sui usufono mo Gagaemauga Nu.2 ona avatu ai lea o le avanoa Papalii.

Tofa Levaopolo Talatonu: O le aso lea na ou talanoa atu ai o le a ou mu i le la. Na la mai lava i le taeao i le ta o le 7.00 e tau i le 12.00 i le aoauli. Ana i ai la se faapaologa faapea ou te le tautala i ai leaga ou te malamalama lelei i ai i mea ia.

FOFOGA FETALAI: Malie lava le Minisita se i avatu le avanoa ia Papalii ona avatu ai lea o le avanoa.
Tulai mai Papalii.

Susuga Papalii Lio Faavaivaiomanu Taeu Masipau (Faasaleleaga Nu. 2): Lau Afioga i le Fofoga Fetalai, na o se mea e fia faasao leaga o lea e pei ua tau taua a matou lauga i le aso ananafi e faapea o mea o cheap politics. E leai e le taugofie, o le mea moni lava lau Afioga i le Fofoga Fetalai, na uma le Fono ananafi ou fesiligia le Matagaluega, e sao lava e le i totogia se mea. E pei o le mea tonu lena e le faapea o se polokiki taugofie a o polokiki moni.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le faalavelave o oe, o lena e lipoti sese mai e lau fanau leoleo. Se alu e talanoa i le Komesina, se i vaai o lea o le a tauau ina aafia ai lau fanau ona o lou faalogo i lau fanau?

Susuga Papalii Lio Faavaivaiomanu Taeu Masipau: Lau Afioga i le Fofoga Fetalai, e leai, sa ou talanoa i le Faauluuluga o mea tau tupe i le aso ananafi lea na faamaonia mai ai lau tala lea na fai i totonu o le Palemene.

FOFOGA FETALAI: O le a le tulituliloaina lea mataupu o lea ua faamalamalama e le Malo ua uma ona foia lea tulaga.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Faamolemole lava lau Afioga i le Fofoga Fetalai, e le mafai ona ou tuua le mea lea. Na o le pau lava na o mea e oo mai i totonu o le Kapeneta, o mea tusitusia, ae e le talia nisi faamatalaga i tua. O lea o le a ou toe fai atu, tuu le mea lena o le talanoa ma fanau e leoleo.

Afioga Hon Palusalue Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: E faamalamalama i le a le itu Palu?

Afioga Hon Palusalue Faapo II: Leaga e tele le afaina o le taumafai atu o lenei Itu ae fai mai e le amanaia fai mai o mea e taetae solo mai.

FOFOGA FETALAI: O lea ua malamalama, a lea ua uma ona.....

Afioga Hon Palusalue Faapo II: O lea ua faafofoga i ai i lenei taeao, o lea e fesili i le Minisita fai mea sao e aumai i le Palemene. O mea sao, o la e alaala mai i lalo le Minisita mo Leoleo ma Falepuipui.

FOFOGA FETALAI: O lea ua malamalama le finagalo.

Afioga Hon Palusalue Faapo II: O lea e fai a matou suesuega i le mataupu. E le aumaia la ni mea ia e saunoa mai ai o cheap politicis, e leai. E fai suesuega a le Vaega lenei ona aumai lea i totonu o le Maota e faafofoga mai i ai le Malo i fautuaga. O le tulaga lea lau Afioga i le Fofoga Fetalai.

FOFOGA FETALAI: O lea ua tali manino le Malo Palusalue. A tatou o nei e tulituliaupu a outou faamaumauga ma faamaumauga a le Malo, ona tele lea o le vevesi. Ia taatia ia le upu o le cheap, le cheap politic. Ia tuu ia lena mea ma le faamanualia o le finagalo o lea ua malamalama le sui usufono mamalu.

Tulai mai Lealailepule.

Tofa Lealailepule Rimoni Aiafi: O lea ua tatou pisa i le cheap, a o le mea lena o lea e fia faafofoga mai i ai le atunuu o le cheap. O lona uiga a cheap, e taugofie le polokiki. O lona uiga e lelei ma taugofie le tau o le soifuaga, a o lea ua tatou nonofo ma faamamafa. Aua tatou te te i fua i le upu o le cheap. Ua faafetai i lau Afioga i le Palemia, e taugofie tele le tau o le soifuaga lea e i ai nei. E taugofie le polokiki lea e i ai nei.

FOFOGA FETALAI: Tulai mai lau Afioga i le Minisita.

Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi): Faafetai i lau Afioga i le Fofoga Fetalai. Ua ou tulai atu ma le faaloalo ona faapea lava au aua o lea ua tea le ogasami lea sa taumafai atu ai, a o le ala o lou tulai ona o lea ua amata ona ou tau le malamalama pe a tulai mai le Tofa Levaopolo po o saunoa o le sui usufono o lo latou itumalo po o le Pule o le kamupani fai eletise. O lea la e tau fetuutuunai i lou mafaufau ona o lea e fai ma tulai mai, ua ou le iloa la pe ona o ia o le taitai o le kamupani fai eletise po o le sui usufono o le itumalo.

Tofa Levaopolo Talatonu: Lau Afioga i le Fofoga Fetalai, o mea uma lava na.

FOFOGA FETALAI: Ia, o le ala foi lena o le avatu ona o lau Afioga lea e te aafia tonu i le faamalamalama o le le malamalama o Toeolesulusulu lea e aumai. O le ala lena o le tuu atu o le avanoa i lau Afioga i le sui usufono.

Tulai mai le sui usufono mo Aana Alofi Nu. 3 e faaiu mai le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai. Se ua uma lo ta taimi ae tele mea ia e fia faaali atu. O le a taoto atu ia le faamalamalama atili o le taua o le Matagaluega ona o se Matagaluega e tu mo le atunuu. O le EPC e tu mo interests o le EPC, o le interest o individual po o tagata taitoatasi ina ia taugofie ma lelei ma ia maua e i latou nisi auala e faataugofie ai e le na o le eletise, a o nisi o energy products, ae o le a taoto atu.

Lau Afioga i le Fofoga Fetalai o nai nisi o manatu po o ni fautuaga mo le Ofisa o Faamasinoga pe mafai ona iloilo ma tagatagai i se auala e mafai ona tatou faaaogaina ai ona o lea ua tatou matauina ua maea ona faia le tatou national broadband. Atonu o lea foi la ua saosaoa le speed i nisi o auala e mafai ona faatino ai, aemaise lava o le Faamasinoga o Fanua ma Suafa, ona o le tele o nai o tatou aiga i atunuu mamao e afifio mai e tele tupe e alu na omai ai ae le oo faamasinoga. Pe mafai ona fai se TeleCourting e pei foi o TeleConferencing. A fai faamasinoga ia vaai mai ia faaaoga broadband o lo o maua i totonu o Samoa, e le gata foi i lea o atunuu i fafo, atonu e le gata ina taugofie mo tagata o le atunuu ae faafaigofie ai foi ona vave nisi o faamasinoga e le mafai ona auai mai nisi o tagata ona o nisi o vaega o lo o tuatuagia ai.

Lau Afioga i le Fofoga Fetalai, ona ou oo mai lea i le vaega lea o le national broadband. E talosagaina po o ua faatinoina ina ia faaaoga ona o lea ua tapenaina le faiga o resitala ma lola o faiga palota. O le tasi o vaega e sili ona faigata i nisi o aiga, o alo ma fanau aemaise o tagata e o e faamauiina, o le toe omai e avatu pepa fanau, a o lea ua i ai le tatou broadband e mafai ona tagatagai i ai ina ia mafai ona cordinate, a alu atu le tagata e resitala ae leai se pepa fanau, ia mafai ona fesootai mai pe totogi se fee pe \$5 pe a, ae ia mafai ona maua i le taimi lava lea ma le feoi solo, ia faigofie ai foi le resitalaina o i latou mo faiga palota, e le gata foi i lea o falemai.

Ua matauina le tatalaina o le national broadband lea sa faaali le talanoa mai ai o le fomai mai Savaii. Na faapea ita o le a mafai loa ona faatino i falemai i tua i le tele o gasegase o lo o o atu i Leulumoega faapea foi nisi o falemai aua e leai lava se fomai ae na o le nurse lava e tau atu i ai, ae pe mafai ona tagai i ai le falemai ina ia faaaoga loa lea auaunaga. Afai e alu ane se mai e

manaomia ia faaaoga le tatou broadband lea e talanoa mai ai i le fomai e diagnose atu ai e le fomai i Apia po o totonu foi i sana clinic. E le gata foi i lea a o nisi lava vaega aua o lea ua taua e tele lava le seleni a lo tatou atunuu ua alu ai, a o le tele foi o le taua e mafai ona tatou faaaogaina ina ia aoga tatau ma faafaigofie ai galuega e pei ona saunoa i ai le Afioga i le Minisita aemaise o le faanaunautaiga o le Malo.

Lau Afioga i le Fofoga Fetalai, o au e faataua tele le taua o aoaoga. O lea o lo o matauina o lo o faaleleia lava ma alualu i luma aoaoga. O se tasi o vaega ou te iloa e tele so tatou manuia e maua ai e pei ona silafia uma foi, o le itu tau taaloga, peitai ane, e le o ataata mai lava ni lelei o tapenaga e le gata o faiaoga, o malae taalo ma equipments e faatino ai, o Management foi o a tatou Sport Associations. E avatu ai foi se tuualalo se i tagatagai ane i ai aua atonu o le tasi lea vaega ona e le o faamalasia ma faamamafaina i totonu o aoaoga. Atonu o le vaega lea e tele ai o sport administrators ma coaches i totonu o aoga. E pei ona silafia o le tele o alo ma fanau a Samoa o lo o taalo i atunuu i fafo, a maua seleni tetele e mafai ona fesoasoani mai i le atunuu i o latou aiga. A mafai foi ona tagatagai i ai pe afai e maua se konekarate a se alo ma se fanau a se Samoa i atunuu i fafo, afai na atiae atu i inei, a maua mai pe 1% e aumai e fesoasoani i a tatou sport bodies po o lo tatou Malo, e mafai ona faaleleia ai atinae. E ao foi ona tagatagai po o ave pea le faataua i taaloga ona o lea e i totonu o le Matagaluega o Aoga, pe e le tatau foi ona silasila pe faatumaoti loa se Matagaluega ia uunaia malosi ai taaloga.

Lau Afioga i le Fofoga Fetalai, ona ou oo mai ai lea i nisi o fautuaga i a tatou foreign policies. Lau Afioga i le Fofoga Fetalai, na o se tuualalo lava i lau Afioga i le Palemia ma le mamalu o le Kapeneta aemaise o le Palemene. O nisi foi o o tatou uso a tuaoi i West Papua o lo o vaiaia pea ma le faanoanoa aafiaga o ia foi uso i lo latou naunau ia maua lo latou tutoatasi. O le talosaga pe mafai ona faamalasia se tatou fautuaga e le gata o totonu o le Forum a o totonu o le General Assembly ina ia mafai ona avatu ai foi ina ia faaitiitia aafiaga o nei tagata mai sauaga a nisi o lo o latou pulea lo latou atunuu ma fesoasoani foi ina ia mafai ona maua so latou tutoatasi e pei foi ona aeaie ai lo tatou atunuu i lenei vaitau.

O le isi vaega lau Afioga i le Fofoga Fetalai.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Malie le sui usufono se i tuu atu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le mataupu lea o la e tagofia e le Forum. Taatia pea le mataupu lena aua ia manatua foi e i ai le upu foi lea union east strength. A oo loa i mataupu e moomia ai faaiuga malolosi, e maua le malosi pe a o faatasi le region atoa, a o le voice in the wilderness e leai se aoga e maua ai mo i latou o lo o moomia le fesoasoani. O la e tagofia mataupu na, taatia mai pea o lo o i ai Mose ma le Au Perofeta e faia mea na.

FOFOGA FETALAI: Ua maea le taimi o le sui usufono, faamaea mai le saunoaga.

Afioga TOEOLESULUSULU CEDRIC POSE SALESA SCHUSTER:
Faafetai i lau Afioga i le Fofoga Fetalai mo le avanoa.
Ia manuia le Fono.

FOFOGA FETALAI: Ia, o lea ua maua le isi taimi e toe saunoa ai le isi sui usufono mamalu.
Tulai mai le sui usufono mo Siumu.

Tofa Hon TUUU ANASII LEOTA: E faatulou atu i le paia o le Maota i le afio o lau Afioga i le Fofoga o le Fono aemaise foi le paia maua i sui usufono mamalu o le Palemene o Samoa, aemaise foi le faafogafoga tapuai a Samoa e amata mai i ona ao seia oo i ona iu. Ua ou tulai atu ma le faaaloalo, aemaise foi le tapuaiga a lou itumalo. Le paia ia Sa-Asomua ma aiga e lua, lau Fetalai Tuuu ma lo outou Aiga Sa-Tuuu. Le falelua o tulafale, le Fofoga o le Alataua, Utaileu ma le mamalu i le Faletolu. Ae a le tapuaiga a le Aufaigaluega Paia a le Atua o lo o latou nono-manu aua se manuia o Samoa ma ona tagata.

Lau Afioga i le Fofoga Fetalai, e leai se manatu e fai se lauga i lenei Tala Faatatau Faaopopo o le Tupe, ae ua ou tulai atu ua na o se mea puupuu lava lea ma si ou itumalo. Ae ou te le i oo i le vaega lea lau Afioga i le Fofoga Fetalai, ou te faamalulu atu i lau Afioga i le Fofoga Fetalai i le taimi ua fano ona ua tau soli fono foi lenei usugafono, ae talitonu lava o manatu e fia faaalua e sui usufono, o manatu e faatupu manatu ma o le a ou faasaoina la lau faasao lea na tau fai.

E talitonu lava ua tele fesuaiga o le tau. O lea ua saunoa nisi e tapili le ili i le po i le vevela, ae talitonu foi le manatu ua tatou alafai mai i le fonotaga usu a Samoa e i ai tulaga e ono aafia ai manatu e fia faaalua.

E talitonu ua vavevave le toatamai o le Afioga i le Palemia. O lau faasao, o lea na taua ai le faaili faapea e tauaveina e alii Saina ma a latou atoato, leaga sa ou vaai foi au ia i ai, mo le mea foi lele pei se saxophone e ula ai mea foi ia e tau o opiana a nai alii Saina, masalo ua ou taumafai atu au ia i sese ai le Afioga i le Palemia ai o se faaili, a o le mea lea na ou tulai atu ai, ae ua vave ai le toatamai a le Afioga i le Palemia. E faamalulu atu i lau Afioga.

FOFOGA FETALAI: Malie le sui usufono, se i tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao. Na ala ona ou tulai atu i le sui usufono ona e tele lava ia a tatou Tulafono ma ua fai foi sina leva i totonu o le Maota lenei. O le tasi lea anava tauave pea a Fofoga Fetalai, e le tu sasae ae le isi faasao e le isi faasao. O au lea na ou tulai i le sui usufono mo Palota Taitoatasi, e agai la i ai ia saunoaga i o, ae le o le tu atu o au e faasao ae tu mai le isi faasao au, ia ona tu atu foi lea o le isi faasao oe, o le mea e oo i ai, ia na o se fono e vevesi. A o la e taumafai mai le Fofoga Fetalai e fai lana galuega, atonu foi la e te le i maua mai le mafuaaga lena na ou tulai atu ai, ona o lea ou te agai i le sui usufono o lo o saunoa, ae agai mai oe ia te au. E le faapena ona fai a tatou galuega, o le mea lena e faigata ai le galuega a le Fofoga Fetalai, o lea foi ou te talanoa sao lava o le faaili, o le faaili foi lele o lena foi ou te iloa le mea lena e te fai mai ai. Ia a ou le iloa, e

le atoa le 2 minute o le mea sa ou nofo ai ma ou savalivali mai i ai ma ou matauina nai toeaiina na sa fai ma a latou evaga ia le fale sa tu i tafatafa o le fale o Amau, ia ma ula ai a latou mea na sa faataga a le Malo i na taimi. O le mea la lena o lea...ou te le o talanoa atu i le pogisa, o lea ou te talanoa atu i mea maoti na ou vaai i ai ma ou tilotilo i ai.

Lau Afioga i le Fofoga Fetalai, o le fesoasoani atu lena i le mataupu lenei, ae le o se mataupu e matuia.

FOFOGA FETALAI: Ia tulai mai le sui usufono mamalu e faaauau le saunoaga.

Tofa Hon TUUU ANASII LEOTA: Faafetai, masalo ua malamalama lea vaega. Ae ou te fia talanoa i le vaega lea o tatou atinae lea o Tagata Tafafao Maimoa Mai. O lea ua faamamafaina e le Malo ia tatou te agai ina ia faamalositia le atinae lea aua le taumafaiga o le tatou atunuu i ona vaega eseese ina ia manuia Samoa, aua ua leai nisi vaega e saili i ai seleni, na o le vaega la lea e tau vaavaai lelei i ai.

Ae o le vaega muamua ua ou manatua, o vaalele. E talitonu lava a le lelei se tatou fesootaiga ia ma nuu mamao lea o lo o auina mai ai i latou o tagata tafafao maimoa mai, e fai foi sina faigata ona tatou tauva ma Fiji ma isi atunuu na o lo o lelei a latou fua vaalele. O le tulaga i le vaalele lea a Fiji lea o lo o femalagaai, ua matauina lava le tulaga lea i le delay, delay soo o a latou malaga, e pei o se mea fiafia lava ia i latou o alii pailate ia e malaga mai ai, a malaga mai ae faapea ua le lava le malolo, ona faapea lea ua ova a latou flying hours, ona tolo ai lava lea ma malaga a vaalele ae le manatu i le mamalu o le atunuu o lo o faapena ona lailoa. E faapena foi ma le vaalele lea o le Virgin Samoa. Ua matauina pea le delay, e tai le misi lava o vaiaso uma e delay malaga a vaa ia. O le isi foi mea ua matauina, ua faauouo ma le Air Niu Sila ae pei ua faaleano mai i le mamalu o le atunuu lenei e taumafai atu femalagaiga, a o le tatou route lea agai i Apia i Aukilani o le tasi vaega e aupito tele seleni o lo o maua ai. O le tuualalo la ma le fautuaga i le Afioga i le Palemia ma le Malo, se i toe silasila ane, pe le i toe alagataata i le taimi nei ona toe faafoi mai le tatou Polenisia, tatou te maua ai a tatou routes ia agai i Hawaii ma Amerika ia ma taumafai foi se route agai i Saina, pe a manatu le Malo ina ia faamalositia le tatou atinae lea.

Lau Afioga i le Fofoga Fetalai, ona ou oo mai lea.....

FOFOGA FETALAI: Malie le sui usufono o lo o saunoa, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: E sao le mataupu lea e laga mai e le sui usufono, i le tulaga lea i le faiga paaga a le Virgin ma le Air New Zealand. O le taimi sa fai ai le tatou faaipoipoga e fai o tauva, a o le taimi la lenei o la ua ulugalii. Ia o mea lava masani o mea nei o ulugalii, ia o le mafuta lelei ma fai a la tonu i luga o aluga, o le mea la lena o lea e tupu nei. Ma o le tausaga foi lenei o lea ua due ai le toe review o le faaipoipoga lea, ma o tulaga na ua leva ona fefoifoi mai ai mafaufauga i le tulaga agai i luma o le tatou atunuu. O le mea tonu lava lea e te saunoa mai ai. O lea la o lo o faatalanoa ona o le mea la lea ua matau, ma o le faiga foi lena o amioga o mea nei o vaalele e le lava le tulaga tauva, ma o

le ala foi lena o mafaufauga e tatau ona toe siitia le tulaga o le tatou fale faaee pasese ma le tatou malae vaalele. Aua a oo ina tatou manao i le mea lena o le tatala atu o le avanoa, e le gata o le toe tilotilo lava o tatou i fuafuaga mamao, ae mo ni vaa tetele e ono afea tatou e tatou te le toe o lava i le mea tuai. O lona uiga, o le mea e tatau ona i ai, e tatau ona i ai ia auala e te savali sao mai lava i le vaalele savali sao mai loa i le fogafale i luga, aua ne i toe timuia, ma aua ne i toe alu se itula e pei o mea ia e tutupu e omai malaga a VIPs mai fafo, ae tai atoa le itula o tau faatonutonu le sitepu foi lea e avatu, ia o le isi faatonutonu a le isi tama, na tau tuu atu tuutuu atu lava le sitepu, ia oo ai lava ina malepe ai loa le faitotoa o le Air New Zealand, na toe lelelele le Air New Zealand i o e leai se pasese na avea. Ia ma le anoano lava o isi mau mea na tulai mai, a o le taimi tonu lena, o lea e fai e le Polenisia le galuega lea. Ma o le tulaga loa lena na malosi ai loa le talosaga mai a kamupani vaalele e aveese le Polenisia ma le latou toe feagai ma galuega faatino ia, ona e le o lelei le faatinoga. O tulaga lava ia o lea tatou te matauina lea foi e oo i auala, a outou matau mai, o lea lava e taumafai e ave le faamuamua i a tatou tamafanau i a latou pisinisi mea faapena, ae a alu alu loa ua vaai atu lava e faapea lava le faaletonu, ia ona le taofiofia loa lea o le apaapa a le Malo i kamupani mai fafo e omai e faatinoa. Ona o tulaga ia e tatou te moomia mea o tagata faigaluega lelei. O le ala foi lena na oo ai lau upu ananafi i le tulaga o le aofai o tatou tagata, aua e fiu lava e faatelevave le atinae o le tamaoaiga, ae o le laualuga o mea ia, ia lava tagata aoaoina e faatinoina galuega. A le lava la tagata aoaoina e faatinoa galuega, e le taofiofia loa lo tatou tapatapa i fafo i tagata e aumai e atinae le atunuu lenei i se tulaga talafeagai ua televave foi le tupu ae o le tatou faitau aofai ma le manao o tagata e fia soifua i le soifuuga faaneionapo, ia i ai pea le seleni e mafai ona faatino ai mea e manao i ai, ae taua manatu ua faaalua i le taeao lenei.

FOFOGA FETALAI: Malo faafetai. Tulai mai le sui usufono e faaauau le saunoaga.

Tofa Hon TUUU ANASII LEOTA: Ia faafetai i lau Afioga i le Palemia. O lea la ua manino ma malamalama ia le vaega lea.

Masalo o le a ou oo mai i se vaega itiiti lava lea mo lou itumalo, o le auala galue. Masalo ua silafia e lau Afioga i le Fofoga Fetalai, talu lava ona amata mai le Paeaiga lenei o ou tutulai pea e talosaga le Afioga i le Minisita i auala galue ia o le matou itumalo i Saaga ma Maninoa. E le gata foi ina ou talosagaina i le Palemene lenei ae faapena ona ou laga foi i a tatou faa-Faletui ia ma tusitusiga foi ma feiloaiga ma le Afioga i le Minisita. Na matou feiloai i le masina ua tuanai atu ma le Afioga i le Minisia, na malaga mai lo matou itumalo ma maua le matou feiloaiga ma le Afioga i le Minisita ia ae saunoa mai e taatia mai. Ia na ona ou toe faamanatu atu i lau Afioga i le Minisita, o lenei o le a uma lenei Paeaiga e leai lava ma sou auala galue o fai, a o lau saunoaga o lo o tau posiposi ma tau faasoasoa.

FOFOGA FETALAI: Ia malie le sui usufono, o lea o le a...masalo o se tali lelei lea o le a avatu. Tulai mai lau Afioga i le Minisita.

Afioga Hon Manualesagalala Enokati Posala: Lau Afioga i le Fofoga Fetalai, sa ou manatu lava e onosaia e le sui usufono mamalu le matou

feiloaiga, ou te manatu e le tatau ona toe aumaia. Ae ona ua omai o se savali toatele o lea na afio mai le afioga i le Minisita Lagolago ma le latou nuu lea, ua omai ai ma tina ma tupulaga talavou. Ia o lau upu muamua na fai i ai, amuia outou, o lau faaamua ona o tulaga i aualatetele o la e faatino i Tiavi ma faasolo mai, aemaise foi o ona faleaoga, amuia outou i tulaga ua i ai, ae taatia mai. O lea e toe faamanatu leaga o lea ua toe laga mai e le Afioga i le sui usufono mamalu, faapea o lea ua logosaia le matou feiloaiga. Ma le agaga faaloalo.

FOFOGA FETALAI: Tulai mai le sui usufono.

Tofa Hon TUUU ANASII LEOTA: Faafetai i lau Afioga i le Minisita. Leai o lea lava ou te logosaia. E pau lava le mea ou te popole ai o lea lava ua e saunoa soo i le auala lea i Tiavi alu atu ai i Siumu. E te silafia foi e le o se auala na o Siumu o le auala o lo o faaogaina e Safata, Falealili ma le atu Aleipata, pau lava lena. Ae o lo o moomia e lou itumalo lea i Maninoa ma Saaga se auala galue i uta, a o lau saunoaga lava ia o lo o tuu mai o lo o tau faasoasoa ma posiposi. Ia ae talosia ia leaga ua matauina foi i isi itumalo ua lua, tolu, fa auala ua umusaina, ae ua ou vaavaai atu lava ua lalata mai le vaivaa. Masalo Safata pe ua tolu ea pe fa auala la ua.....o la e soiso mai le isi sui usufono mo Safata, masalo lava e te molimau e sao lau.....

FOFOGA FETALAI: Malie le sui usufono, se i tulai mai le Afioga i le Minisita.

Afioga Hon Manualesagalala Enokati Posala: Leai o le mea e fia faasao. E sese le mau a le sui usufono mamalu, e le i oo i ni tai fa ni auala, o la e tau faasoasoa ma fuafua mo le atunuu atoa. Ma le agaga faaloalo.

Afioga Hon Palusalua Faapo II: Lau Afioga i le Fofoga Fetalai, o se mea e fia faasao.

FOFOGA FETALAI: Se i tulai mai le Afioga i le Taitai o le Itu Agai leaga o ia o le sui usufono mo Safata.

Afioga Hon Palusalua Faapo II: Aua ne i galo i le sui usufono mo Siumu, e toalua maua, ae na o le tasi lava le auala la ua fai. Silasila la i le le faapito o le Afioga i le Minisita. A o lea ua avatu lau fautuaga i le Afioga i le Minisita, fai loa i le taimi lenei auala o le ta itumalo, e toalua taua. Ma lou faaloalo lava.

FOFOGA FETALAI: Ia Tuuu, ua lagona e le Maota lou tagi talatala i ou auala, ioe, o la ua faafofoga atu i le tali mai a le Minisita, ae taatia ia i le faautautaga tatau o lea e toe 12 masina le tatou Paeaiga, e ta loa le palota o le taeao ae tatala loa toga o lou auala. Tulai mai le sui usufono e faaauau mai le saunoaga.

Tofa Hon TUUU ANASII LEOTA: Faafetai i lau Afioga i le Fofoga Fetalai, faafetai foi i le Afioga i le Minisita. Pau lava le isi vaega lea lau Afioga a malaga atu i le auala lenei i Siumu agai lea i Falealili, pe 200 iata e

tau i se tamai vai, e masani lava ona pa i taimi faapenei i le tetele o timuga, e afaina ai le femalagaiga o le atunuu. E talosaga atu i lau Afioga i le Minisita se i silasila ane i ai pe mafai ona... aua o la e foi ua amata ona faaletonu i le taimi lenei i le tetele o timuga. Ia, masalo ua maea ai se manatu o lenei itumalo. Faafetai atu i lau Afioga i le Fofoga Fetalai, ia manuia le tatou Fono.

FOFOGA FETALAI: Malo faafetai. Faafetai saunoa i le sui usufono mamalu mo le itumalo o Siumu. Ia, e manatu o lea ua tatou tulalata i le tatou taimi malolo, o le a vavae foe ona tatou toe agai mai lea tatou te sailiili malosi mo le tatou taumafaga ti o le taeao.

E faasilasila atu o le a faataatia ese Taulumaga a le Fono Aoa mo lana malologa masani o le taeao.

Na faataatia ese Taulumaga a le Fono Aoa mo lana malologa masani i le itula e 10:45 i le taeao ma toe faaauau i le itula e 11:21 i le taeao.

FOFOGA FETALAI: Ou te faasilasila atu ua toe amataina nei Taulumaga a le Fono Aoa Faitulafono. E i ai le agaga mauuluga ua toe faafoisia le malosi i le tino e ala i le tatou inugati sa mavae atu nei.

E momoli atu ai le agaga faafetai tele i le onosai mai o le tatou Maota, o lea ua tatou taunuu i le vaega lona lua o le tatou galuega i lenei aso. O le agaga lava ma le faamoemoe, o le apoapoi atu o le tatou Maota i tulaga o tuleiga ma saunoaga ina ia faagasolo pea le tatou galuega. O lo o i ai le faamoemoe i se taimi mulimuli ona faailo lea o taulumaga o le tatou galuega mo nei ma a nanei, ae momoli atu le agaga faafetai tele i le onosai mai o le tatou Maota i a outou Afioga i sui usufono aemaise foi le Malo i le taumafai e tali atu ma faapupula le tatou Tala o le Tupe pei ona opea i le Maota i le aso.

A o le i toe tuuina atu le avanoa i sui usufono e fia saunoa, o le a tuu atu le avanoa i lau Afioga i le Palemia mo le lafo o le faatulagaga o tatou galuega i lenei aso. Tulai mai lau Afioga i le Palemia.

LAFO MO LE SUIA O ITULA FONO

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo e faatu le lafo, *Ina ia faataatia ese Tulafono Tumau 31 e avanoa ai le sui o taimi o le tatou Fonotaga lenei e faapea; amata atu i le 9:00 faaii i le 1:00, ona toe faaauau ai foi lea mai le 3:00 i le ta o le 7:00 seia maea mataupu faatulagaina o le tatou Fonotaga.*

A o le i tuuina mai le Fesili lau Afioga i le Fofoga Fetalai, na ona ou taumafai atu i le tatou Maota e faapenei, o le Tala Faatatau Faaopopo o le Tupe (Nu.2) lenei, o sina vaega itiiti e ogatasi ma le Tala Autu o le Tupe na o tatou pasia. Ua maea foi ona saunoa i ai le tatou Maota nei, ma o lo o taoto foi i lagatonu fuafuaga, e leai foi ni tulaga ogaoga e tau tuli ai fua saunoaga o lenei Maota ma le tali foi a le Malo, ma e le faapea o tele ni suiga, o galuega lava o lo o faaauau.

Ua mafua ona ou tulai atu, ona sa ou matauina le gasea o lau Afioga i le Fofoga Fetalai i le aso ananafi e tau tauanau sui usufono e sausaunoa, a o lea tatou te iloaina uma lava le anoanoai o galuega a le Maota o lea o lo o tau faagasolo. O galuega ia e laga soo foi e sui usufono, e le gata i totonu nei, ae faapea foi i tua atu o le Palemene lenei e faapea ua tuai ona tagofia e le tatou Maota. Ia, o le faapogai lenei, ma sa ou talanoa atu foi i le Fono ia Tesema i le tolaulauina o le Tala Faatatau Faaopoopo o le Tupe o lo o tatou lauliuina nei, tatou te tapenapena mo le Fono lenei, ma o lea foi o le a maua ai le avanoa e maua ai nisi faamalamalama, a o lea foi ua maua le faasiliga malosi o sui usufono mamalu mai le tatou malologa umi faatoa maea atu nei, ma tatou taumafai ai e faauma le tele o tatou galuega o lea ua oo mai i le Maota, ona o le tausaga mulimuli lenei o le tatou foi Paeaiga.

O le mea lea lau Afioga i le Fofoga Fetalai, ni a fa lau Afioga, pe a uma ona tuu mai le Fesili i le lafo lenei, ona tuu mai ia lea e tali loa le Malo i le Tala Faatatau Faaopoopo o le Tupe ae faagasolo le tatou mau galuega o lea e matau e feoloolo lava nai a tatou Tulafono, pe 10+ a tatou Tulafono Tau Faaofi lea e i le Maota, ae ese ai isi Tulafono e faapena foi le tele o lea lava e i totonu o Komiti, Tulafono Tau Faaofi. Ia, ae ese ai ma lenei, e 20 Lipoti a Komiti ma le silia i le 50 Tali a le Malo lea ua i totonu o le tatou Maota nei.

O le lafo lenei ma mafuaaga o le tuualalo, e faagasolo le tatou Galuega o lea foi e faamalumu mai isi Fonotaga, ma o tulaga masani lava, pe a uma loa lava le Fono ona faapena ai lava lea ona lape uma ai ma mataupu. O le mea lenei sa matou faia a o le i faia le faiga fou lea ua tatou i ai nei, sa masani foi ona leai ni mataupu tele e tauave mai na ona aso, ona e uma loa le Fono soloa loa i le aufuefue mataupu uma. O le mea lenei sa matou faia i Paeaiga ua tuana'i atu, ae pei ua ese nei Paeaiga e tiga lava ona faulai mea e le i maea, ae tauave mai lava ma atili faaopoopo ai foi i isi mau galuega. A o le tulaga masani lenei, a uma lava le Fono ua uma atu ai lava ma mea uma e le toe i ai nisi mea e faatele mea, ae tatou agai, aemaise lava o le tele o nei Lipoti o mea tuai. E tatou te moomia Lipoti o le taimi nei ina ia fou ai pea mafaufauga ma tatou agai i mea fou nai lo le agai pea i mea tuai.

Lau Afioga i le Fofoga Fetalai, o le lafo lenei ua faatulai atu.

FOFOGA FETALAI: Malo. Faafetai saunoa i le lafo faatu a lau Afioga i le Palemia. O le a tuu atu muamua le Fesili i le lafo i le toe faaopoopoina o le taimi o le tatou Galuega.

Faaluaina e le Sui Palemia ma le Minisita mo Fesootaiga ma Faamatalaga Tekonolosi.

Na faamaonia le lafo.

Na toe faaauau felafolafoga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2014/2015.

FOFOGA FETALAI: Faafetai i le saunoaga manino ma le fautuaga a lau Afioga i le Palemia ua tuuina mai i le tatou Maota Fono i lenei taeao, ma o le agaga tonu lenei sa ou taumafai atu ai pea i le aso ananafi e taumolimoli atu le feau taua ma le feau manino e ala i le tatou Tala Faatatau Faaopoopo o le Tupe lenei. Aua e le na ma se laina ua maea ona tatou pasia le Tala Autu o le

Tupe. Ua matua maea foi ma ua manino ma malamalama a outou saunoaga na agai i le Tala Autu o le Tupe lenei. O le tatou Tala Faatatau Faaopoopo o le Tupe lenei, na o se mea faaopoopo e toe agai i ai le saunoaga, a o le agaga lava ia o le Fofoga Fetalai, ina ia faapuupuu le tatou taimi, o mea aua ne i tatou toe asa le ogasami ua uma ona asa. Na o se vaega faaopoopo na ona faaopoopo i le tatou Tala Autu o le Tupe, a o lea ua taatia i lagatonu finagalo. Ae matau foi i le aso ananafi, e mavae le tolu i le fa minute o tau fesili atu lava. Sa ou taumafai atu foi o le a alu atu i luga i i le faatonuga o e fia saunoa, ae talii tele ae popoe, leaga o lo o avatu pea le avanoa i a outou Afioga tatou te o ai i tulaga masani o le tatou Fono.

O lea la ua outou faafofoga nei i le saunoaga a le Palemia, ua uma foi ona ave lau tuualalo, ona o le tele o a tatou galuega tuua, o Tulafono, o Tulafono toe foi mai, o toe Teuteuga, o Lipoti, ma galuega uma o lo o i Komiti, o lea e fai si tele o le galuega, o le backlog lea e ia tatou, ae ava tele atu ona o tulaga o a tatou faiga faavae. E manatu foi o lea e alaala le paia o le Maota, o le a avatu pea le Fesili. Se i tutulai mai ni sui usufono e fia saunoa i le Tala Faatatau Faaopoopo o le Tupe? Tasi, lua, tolu, fa, lima, ono, fitu, valu, iva, sefulu. Ia, o le tulaga lena sa manatu ai le Fofoga Fetalai ne i meaane ua tatou toso le aulapauta a o i ai e e fia saunoa. O lea ua maua e le Fofoga Fetalai, e 12 i le 13 outou ia e le i saunoa. Ona o a tatou tu ma aga masani, o le faanaunautai, e le o le punitia o avanoa, a o le faaoga tatau ma le tulaga o le faasologa o le tatou galuega lea e agai i ai. Ua uma foi ona avatu lau fautuaga, se o le tatou taamilosaga mulimuli lea ua alu, o le tausaga mulimuli lenei o le tatou Paeaiga, agai sao i tulaga o mea e talafeagai i le faafofoga a le itumalo, e le tau aoaia e Laupua Tamafaiga, ae agai tonu i le tulaga o le faamaninoga o mataupu, aemaise o tali mo tatou itumalo.

E faamalulu atu i lau Afioga i le Palemia, ona o lo o matau tulaga o sui usufono o fia saunoa ma le tulaga o le tatou faamoemoe. E talitonu o lea ua faaopoopo le tatou taimi faigaluega, e manatu lava e tatau ona pasi le tatou Tala o le Tupe i le po a nanei.

Tulai mai le sui usufono mo Faasaleleaga Nu.4.

Afioga Hon Palusalua Faapo II: Lau Afioga i le Fofoga Fetalai, na o si fono faapipii lava i le saunoaga a le Afioga i le Palemia.

FOFOGA FETALAI: Malie se i tuu atu le avanoa i le Taitai o le Itu Agai.

Afioga Hon Palusalua Faapo II: O le agaga maualuga foi lena o lenei Itu, o le tele ia o Lipoti taua lea o lo o faagasolo mai, ma ou te talitonu foi o le Itu lenei, e fetuutuunai lava le tofa, le tofa pei ona e saunoa. Na pau lava o lea lau Afioga i le Fofoga Fetalai, o aga a outou ua ala ai ona tele Lipoti e faaputupu ona o le tatoupe o tatou Fono talu ai, lea la ua tulai mai le faafitauli lea. Ae le auese so matou manatu ma le finagalo o le Palemia, ona o le tele o Tulafono ia e faagasolo mai, aemaise o Lipoti, ma le tuualalo, tuu pea le avanoa i nai sui usufono, o le tausaga mulimuli lenei o le Paeaiga, o la e fia faafogafoga mai itumalo.

O se fono faapipii atu lena pei ona saunoa le Afioga i le Palemia, ia, o lea na faatatope faatatope a tatou Fono i le fa tausaga talu ai, a o lea la o le a tu ai le faaletonu i lenei tausaga. Ma lou faaaloalo lava.

FOFOGA FETALAI: Malo. Ia, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e leai ni faatopetope sa faia. Ae manatua foi e i ai isi a tatou Fono na uma faatuu ona ua leai ni mataupu ua uma, a o la e faatalitali Lipoti a Komiti? A o le i oo i le tulaga lena, a ua leva ona tauanau au e le Taitai o le Itu Agai, se ua lava ia na Fono. E leai la o lea lava ou te faautagia tele fautuaga tuualalo a le Taitai o le Itu Agai.

FOFOGA FETALAI: Tulai mai le sui usufono mo Faasalelaeaga Nu.4.

Afioga PESETA VAIFOU TEVAGA (Faasaleleaga Nu.4): E muamua lava ona faatulou atu lenei itumalo i lo outou paia ma lo outou mamalu, i le afio o lau Afioga i le Fofoga Fetalai, afio lau Afioga i le Palemia ma le Sui Palemia ma le Aiga Kapeneta. E faatulou atu foi ma faafeiloai atu i lau Afioga i le Taitai o le Itu Agai ma lena Itu o le Malu, i le afio atu o Afioga i Minisita Lagolago faapea foi le mamalu o Ofisa Sili o Pulega o Matagaluega a le tatou Malo. Ou te faafetai atu i lau Afioga i le Fofoga Fetalai ona ua maua se avanoa po o se laolao o lenei itumalo e taumafai atu ai sona sao.

A o le i auina atu se manatu o lenei itumalo, e ao lava ona ou faapai atu isi ou itumalo o Faasaleleaga Nu. 4, e talitonu foi lo tatou itumalo e siui i ai le atu Faasaleleaga, o lona uiga, e maualuga tele ia te au lo tatou itumalo. O paia ma mamalu o le tatou itumalo, ua ou iloa e uma lou 15 minute, e le mafai ona ou tau talaiiviina. Ona manatu lea o le a taoto paia o sa ma faigata o le tatou itumalo, ona afai o lea tou te faafogafoga mai, ia o le tausaga mulimuli lenei, o le tausaga sili lenei ona taua, o le taimi foi faapenei e masani ona silasila i ai o tatou itumalo, o a foi ni galuega ma ni mea e fai e ē foi e seei i le nofoa i totonu o lenei Paeaiga. Ona ou manatu lea, ia tapuai maia lo tatou itumalo, o lo o taumafai pea e tuitui atu le Malo e uiga i a tatou atinae ma tatou talosaga pei ona uma ona faataatia.

Lau Afioga i le Fofoga Fetalai, o lea sa saunoa le Taitai o le Malo ona o ni tulaga e faanatinati ai le tatou Tala o le Tupe, ae manatu foi lenei itumalo, e ese le taua o le Tala o le Tupe Faaopoopo, o le Tala o le Tupe lenei, e laitiiti lava le Tala o le Tupe. O le ala foi lena na ala ai ona faatuatuai ona avatu se manatu o lenei itumalo, leaga e taua, ona a fua i le Tala o le Tupe lea ua faataatia lea ua faaopoopo ae o lea ua matau atu i le Lipoti, o lea ua tofufufusia lava Matagaluega, e ui lava ina laitiiti, ae matau atu ua faatofufusia lava Matagaluega e faatali ai le Tala o le Tupe tele ia Iuni. O lea e momoli atu ai le faafetai tele ma le faamalo o lenei itumalo i lau Afioga i le Minisita, faapea foi le Faauluuluga o le Matagaluega o Tupe lau fetalaiga Lavea, ia ma faauluuluga uma lava o le Sector o le Matagaluega o Tupe i le lava tapena o lenei Tupe Faaopoopo o lenei vaitau. O le mea lea e momoli ai foi le faamalo ma le faafetai o lenei itumalo.

Ona ou oo mai lea i le Matagaluega o Galuega. Lau Afioga i le Minisita, e momoli atu le faamalo ma le faafetai a lou itumalo. E pei lava ona ou tuitui atu i tausaga ua mavae, ia se galuega po o se auala galue i totonu o lou itumalo. E i ai se tasi o nuu ua uma ona faatino ia lona auala galue, ae peitai o se tasi o nai ou nuu e lua, o lo o taumafai lava ona o le utiuti lava o le faasoa. Sa ou lauga mai lava i le amataga i le Paeaiga lenei, ona o le auala galue o Puapua. Pei lava ona ou avatu, talu lava ona Tutoatasi le Malo o feagai pea

Puapua ma le pologa, e leai lava se auala galue. O le ala lea ua ou tulai atu ai e momoli atu le agaga fiafia ma le agaga faafetai i lau Afioga i le Minisita mo Galuega, Felauaiga ma Atinae Eseeese e ala atu i le tatou Malo, o le faafetai tele o lea ua amatalia le auala galue o lou nuu. O le mea lea e momoli atu ai le faamalo ma le faafetai i lau Afioga i le Minisita, faapea foi le tatou Malo. E toe tasi lava si ou pitonuu o lea o lo o talitali pea, o lena e i ina le faasoia, afai foi ae le tau lenei Paeiaga, ia e le afaina, ou te toe tuitui atu foi i le isi Paeiaga ia te oe, ae ia tofa malie lau Afioga se i toe silasila ane lava i le auala galue o si ou nuu lea o Asaga.

O le tulaga i le matou taligalu i lau Afioga i le Minisita mo Punaoa Faanatura ma le Siosiomaga, o lo o taumafai lava e tuitui atu le taligalu i totonu o Puapua, ona e silafia foi e lau Afioga o se tasi foi o mala faanatura e le i lea na mavae atu, lea na osofai ai se tasi o Malumalu o le Ekalesia Mamona ma afaina, lea ua aveese ai le Malumalu Sa lea ma totonu o le matou nuu, ia o la ua see atu i le vaotele, ona o le tulaga lea sa i ai le Malumalu e lata lava i le auala. O le mea lea e toe tatalo atu lava i lau Afioga, po o le a se silasila i ai a le Matagaluega, ona e le gata o lea ua aveese le Malumalu, ae o le tulaga o le a aliali mai, o le a oo lava galu i le aualatele. Ou te tatalo atu ai ma lou faaaloalo, ia e tataua ona silasila Matagaluega e tataua ona faatino se taligalu i lea vaega o si o matou nuu. E le gata foi i lea, a o le tele foi o nai aiga ia e lata ane i le tulaga lea. E faapea foi le taligalu i totonu o Asaga ma Lano. Ou te tatalo atu foi i lau Afioga ona o le auala lea e i totonu o Lano le auala sima, pei lava ona ou avatu e utiuti lava le seleni, ae na ona faataatia atu pea ma logologo atu pea, pe a faapea e alu alu ae lava se faasoia a le Matagaluega, se i toe silasila ane lava i le auala sima lea ona o le tele ia o le afaina, a oo ina tutui mai le vai lea o le Maliolio, o lea foi e afaina ai se tasi o vai o le afioaga o se tasi o sui usufono mamalu mo Faasaleleaga Nu. 2, ona o nei vai uma lava o maga uma lava o le vaitele lea o le Maliolio. Ae na ona talosaga atu lava i lau Afioga pe a talafeagai ma le Tala o le Tupe, a le o lenei Tala o le Tupe, ia po o se Tala o le Tupe o i luma.

Lau Afioga i le Minisita mo Aoga, Taaloga ma Aganuu, e ui lava e le o faataoto atu se talosaga i se faleaoga o lou itumalo, ae talu ai ona o le talosaga sa i ai le aoga a lou nuu i Asaga mo lona faleaoga. Peitai, a o faafofoga mai lou nuu o Asaga, pei lava ona ou avatu i le lauga talu ai, ia sa i ai le fesoasoani foi a nai malo mai fafo e fausia ai ia nisi o le tele o faleaoga i totonu o le tatou atunuu, ia peitai, ua motusia ia fesoasoani, ia o nisi foi o galuega lelei ua taumafai i ai ia malo e ave i ai le faamuamua. O le mea lea lo tatou nuu i Asaga, e aua le popole, aua le popole o lea ua faataatia le polokalame po o Aperila ona amata lea o le faleaoga o si o tatou nuu.

O le mea lea lo tatou itumalo pe afai o faafogafoga mai, o lena ua ou fai atu, e le tele lava se manaoga o si o tatou itumalo, ona e fua foi manaoga i le seleni ua faaopoopo mo lenei foi amataga o le tausaga.

Ona faapea ai lea o sau faamatalaga, lau Afioga i le Fofoga Fetalai, pau ia o nai manatu laiti o lenei itumalo, ia faamanuia le Atua i lau Afioga e faapea foi le tapuaiga a le atunuu i Lana Afioga Mamalu, O Le Ao o le Malo, faamanuia foi le Atua i lau Afioga i le Palemia ma lau Kapeneta, le mamalu o le Palemene ma Faauluuluga o le tatou Malo. Manuia le Fono.

FOFOGA FETALAI: Malo, faafetai saunoa i lau Afioga i le sui usufono mo Faasaleleaga Nu. 4, malo faafetai saunoa.

Ia tulai maia lau Afioga i le sui usufono mo Gagaifomauga Nu. 1, tulai mai, e manatu o le avanoa lelei lenei mo le saunoaga faataupou i lau Afioga i le sui usufono, tulai mai ua avanoa le Maota mo lau saunoaga.

LAUGA FAA-TAUPOU

Tofa FAIMALOTOA KIKA IEMAIMA STOWERS (Gagaifomauga Nu. 1): Lau Afioga i le Fofoga Fetalai, e tulai ma le agaga maualalo ma le faaaloalo tele.

Ou te faafetai tele atu ona o le laolao ua maua e lou nei sui usufono e taumafai atu ai se leo o lou itumalo o Gagaifomauga Nu. 1, aemaise mo le taimi muamua ua ou tulai ai i totonu o le Palemene i le tofi faipule o le itumalo i le maea ai o le faiga filifiliga a lou itumalo i le taulotoaiga o le tausaga na tea nei. O lea e pei ona saunoa le Afioga i le Palemia, lau Afioga i le Fofoga Fetalai o lo o tele galuega faagasolo o feagai ma le mamalu o lenei Palemene, ae ua e topule ma faaaloalo i le Maota nei ua maua ai se avanoa e taumafai atu ai se lauga mua a lou nei sui usufono - faafetai tele le faaaloalo. Lau Afioga i le Fofoga Fetalai, o le a ou agai loa i lau mataupu ua ou tulai atu ai.

Tulouna ia le paia o le Palemene o Samoa. Ou te faatulou i lau Afioga i le Fofoga Fetalai o le Maota. Ou te faatulou foi i lau Afioga i le Taitai o le Malo, Afioga i le Palemia faapea le paia i Minisita uma o le Kapeneta. E faatulou atu foi i le Taitai o le Itu Agai ma sui usufono mamalu uma o lenei Palemene. E le gata i sui usufono o lenei Vaega Faaupufai e Puipuia Aia Tatau a Tagata le HRPP o lo o tulai i le Faigamalo e taitaia le atunuu, ae faapea foi i sui usufono mamalu o lena Vaega Faaupufai a le Tautua Samoa o agaia le Faigamalo.

E faatalofa atu foi i le tapuaiga a Faauluuluga o Matagaluega ma Faalapotopotoga a le Malo, le Failautusi ma le aufaigaluega a le Ofisa o le Fono, le au faasalalau i leitio, televise ma nusipepa ma i latou uma o lo o lagolago mo le sologa lelei o galuega a le Maota nei; malo le galulue.

Ou te faatalofa ma faatulou atu foi i le faafofoga tapuai mai a Lana Afioga Mamalu, O Le Ao o le Malo, lau Afioga i le Tama Aiga, Afioga Tuiatua Tupua Tamasese Efi ma lau Masiofo, lau Afioga i le Sui o le Fono a Sui Tofia, Afioga i le Tama a Aiga Tuimalealiifano Vaaletoa Sualauvi II ma le Masiofo. O le paia lava lea i Tama ma o latou Aiga, o Aiga ma a latou Tama, o le mamalu ia Pule ma Tumua, Ituau ma Alataua, Aiga i le Tai ma le Vaa o Fonoti, ae tainane foi le faafofoga a o tatou uso i Amerika Samoa ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, le Laau na Amotasi ma Auvaa o Tootoo ma upu i le Manuatele.

Ou te faatulou foi i le faafofoga tapuai a Feoi o le Talalelei i le ituvai paia i Auauna a le Atua i Ekalesia e fia o asu le Ipuvai o le Ola aua se manuia o Samoa, e le gata i la le tino aemaise lona soifua faale-Agaga. O paia ma mamalu faalupe ia o Samoa. O paia ua taoto a o se ala ua oo. O mamalu foi ua maea ona tosi lauti ma tuulaupua, aua e ui ina uliuli ma loloto le moana, ae ua iloa ala o i'asa. E lavelave foi ma tagutugutu le vao, ae ua iloa ala o vae aua e faigata oe Samoa o le aomamala. Ia nuunuu atu ia paia ma mamalu o Samoa ma lana Palemene i lau Afioga i le Fofoga Fetalai ma Faleupolu o lenei Maota, aua o la outou lea matalalaga tausi.

Lau Afioga i le Fofoga Fetalai, paga lea ou te taliu ae popoe aua o si o ta lima lava e toe paia ai si o ta mata. Ina ne i ou ta i o ma o, a o le agaga moni o lou nei sui usufono ina ne i malaga loa lou vaa ae ou te fia afea muamua si ou itumalo pele o Gagaiformauga Nu. 1, i lau faatupu, lau faatamalii ma lau faaaloalo ua ou tiu ai nei ma ou sapi ai i Upufai o Malo i le maea ai o le faiga filifiliga.

E faapitoaugafa ma ou muai momoli atu le faafetai tele i le Aufaigaluega Paia a le Atua o lo o faafalelemalu ma faafaletuluia i totonu o lou itumalo. O lo o outou nonomanu i le ao ma le po aua se manuia o si o tatou itumalo, aemaise Samoa mo a taeao. Faafetai tele i lau susuga i le Toeaina lau Susuga Tanielu ma le faletua, faafetai i lau susuga i le alii Sea lau Susuga Tifi ma le faletua, faafetai i lau afioga i le Ositaulaga Patele Jerry Sialau, lau Susuga i le Faafeagaiga Tolutasi ma le faletua, faapea foi lau Susuga i le Epikopo ma le faletua.

E faatalofa aloaia atu foi i lau Susuga i le Faafeagaiga o le EFKS i Manase, lau Susuga Filipo ma le faletua. Ua faamalo fai o le faiva i la outou tapuaiga, faafetai mo talosaga aemaise o faamanuiaga ma apoapoiga a o lumanai ai le faiga filifiliga, sa maua ai pea le fiafia ma le mafanafana o le loto. E faapea foi i la outou faalototele ma faamanuiaga mo le tofi i le maea ai o le filifiliga.

E le faagaloina foi le tapuaiga tatalo a taulaga soifua uma o le tatou itumalo o avea ma vaa ma ipu o le talalelei i so o se Ekalesia o galulue ai, i atunuu i fafo ma Samoa nei, aemaise foi lau Afioga i le Taitaifono o Ekalesia Soofaatasi i Samoa, lau Susuga Kasiano Leaupepe, o se tasi o lupe faalele a le tatou itumalo. Faamalo i lo outou paia i la outou tapuaiga ma la outou tatalo, ua logo i tino matagi lelei i le pai mai o le mana o a outou talosaga i le Atua, ua mafai ai ona faataunuu i le manuia le tofa ma le faautaga saili a si o tatou Malo.

Ou te momoli tele atu le faamalo ma le faafetai i le faafofoga tapuai mai a le paia maualuga i si o tatou itumalo ia Safotu ma Manase. O paia lava lea aua le afifio o Sao e Fa ma Aiga Sa Umalau, le Atipouniu ma le Faasau ma le mamalu ia te Oe le Pule. Le alaatai o lau Fetalai i le Alii o le Itu lau Fetalai Lavea na e mua i malae, na e tausi vaatele aua le tupua i Finao. Susu Taito ma Aiga Sa Umalau ma le Fetalai ia Tauasa.

Ou te momoli foi le faafetai tele i le paia o faletua ma tausi, o saoa ma aunafaapae i le ituvai o tina ma tamaitai, aemaise le malosia o le tatou itumalo i aumaga ua atoa le 21 tausaga sa mafai ona palota. E le faagaloina le mamalu o si o tatou itumalo o lo o alaala ma papaaao i Upolu nei ona o aoga a nai fanau aemaise foi o feau ma galuega o lo o fai atu ai le tautua i o tatou aiga, ekalesia faapea foi si o tatou itumalo. Ua faamalo faafetai i la outou faaaloalo, faafetai i la outou faatupu, faafetai i la outou faaeaea.

Ou te fia faaogaina foi lenei avanoa taua ua ou maua ou te faafetai atu ai i sui usufono mamalu o si o tatou itumalo sa tausinio mo le tofi o le tatou itumalo i le Palemene, lau Susuga Gaina Aukusitino, lau Fetalai Lavea Natoe Ieti, lau Fetalai Lavea Peseta Lua Nafai, faapea foi lau Susuga Taito Vaea Muese. Ua faamalo le tauva faatamalii ma tausinio faafaleupolu, ua se togi le seu na lagatila ua faapulou i le tualima, ua faamalo fai o le faiva ua iu manuia ai le filifiliga o le tofa ma le faautautaga a le tatou itumalo e ala i le palota.

Ae o le tatalo i le agaga maualalo, tatou faagalo ia ia fatia ua sola ae tatou alo i luma aua se manuia o lo tatou itumalo. O tatou lava o aiga i si o tatou

nuu, a le tau i tamalii ua aiga i faleupolu, a le feiloai foi i aiga o le tama e sootino i aiga o le tina. A o le agaga moni, ia tatou tuli i luma so tatou ai, e pei o la le Aposetolo o Paulo, “Ia tatou faagalo i mea ua tuanai, ae tatou momoe punouai i mea o i le lumanai” ma e le uma le fai aso o le Alii.

Le paia e o si ou itumalo Gagaifomauga Nu.1, faafetai i la outou faatupu ua outou faatietie ai lou nei tagata faatauvaa i le maa salafa, e ala i la outou puleto ma lau faaaloalo maualuga, ua ou pale ai nei e momoli la outou tofa ma le faautaga i le Maota o Samoa. O si ou manao na lafo i luma a o paepae tia o le tautiaga i Finao le tupua tausi, o le malae faitauina o le usoga, ma o le toaiga foi o Tumua ma Aiga, a o lenei ua e topule ma e Tagaloatusi e avea lou nei tagata faatauvaa ma ou sui i le Palemene. O lau pule lea ua ou sapaia faatuaeleele, o le a le galo lau faaaloalo ma lau faaeaea ua aumai.

Ou te faafetai foi i le tapuaiga a tupu o le itu ma tootoo o Finao. E moni ai le upu, o faiva e tapuaia e manuia. O le a leai se folafolaga ou te faia ia te oe lou itumalo pele o Gagaifomauga Nu.1, ne i ou aitalafu i ni folafolaga ae le taunuu. Na pau lava o lea, e tulitulimatagau pea le ufi a le tamaitai i nisi o atinae mo le tatou itumalo sa talosagaina ma fofogaina e Tuiloa Anitelea ua fai i lagi lana folauga a o seei i le nofoa o le tatou itumalo i le Palemene.

Ou te faamalulu atu foi i le paia o le itumalo i ni aleu o le Tofa Tuiloa, o a ni ona faaletonu, ia alofagia ia faamagalo. O le a sona sao e le gata i le tausiga o le itumalo a o le nofoa o le Palemene sa seei ai, ia fai lea ma viiga o le Atua.

Le paia maualuga o si o tatou itumalo, o le a ou faimea faalogo pea i la outou tofa ma le faautautaga, ae le gata i lea o la outou fautuaga e momoli ai so tatou sao ia Manuvao aua Samoa ma lana Palemene, ma e moomia tele la outou lagolago e ala i la outou tapuaiga ma la outou tatalo e lototele ai lo outou sui usufono.

E le o galo ia te au upu na fetalai i ai le toeaina matua, o se tasi o faatumutumuga o le tatou itumalo, le Fetalai ia Lavea Loia i le tatou uluai feiloaiga i le vaiaso na sosoo ma le palota, “Faimalo, tautuana, aua e te palaai, ia toa lou loto, maua sou manatu aua le tapuaiga a si o tatou nuu ma le itumalo, ma ia e alofa i le itumalo.” Ia, o le a le galo ia upu, ia tapuai maia. O le a se taimi faatauvaa o totoe o lenei Paeaiga i ni galuega mo le manuia lautele o si o tatou itumalo o le a faapena ona mafai ona fai, ia tatou te faamoemoe lava i le fesoasoani mai o le tatou Matai, ae talosia ia ia aveaveo lo outou alofa ma la outou faatupu ua faaalua nei i nai taimi faatauvaa o totoe o lenei Paeaiga a o sauni atu mo le faiga palota tele a si o tatou atunuu o lo o loma nei.

Lau Afioga i le Fofoga Fetalai, ou te fia faaaogaina foi lenei avanoa e faaleo ai le faafetai tele a lenei itumalo i lau Afioga i le Palemia ma le Kapeneta mamalu, lau Afioga i le Taitai o le Itu Agai ma sui usufono mamalu uma o lenei Palemene, aemaise o lenei Vaega Faaupufai le HRPP e ala i la outou tapuaiga ma le lagolago a o alofaiva si o matou itumalo i lana faiga palota. Ou te faafetai foi ona o faaaloaloga uma na aao i ai le Malo ma lenei Palemene i toe sauniga uma o le Tofa a Tuiloa Anitelea sa tauaveina le nofoa o le Palemene o lenei itumalo. E ui ina ua maea ona fetalai atu le tootoo o lenei aiga i le aso o ona toe sauniga i Finao, ae o le a le mafai ona alu loa le sa o lenei itumalo e aunoa ma le toe alagaina o le loto faafetai i le faatupu ma le faaaloalo maualuga na aao i ai le Malo ma lenei Palemene mamalu na maualuga ai le aso o le tofi o lenei itumalo. Ia agalelei le Atua ma tau i atu lo outou alofa tulai ma lo outou aao mafola i so o se auala sa faatino ai. Afai foi

sa i ai ni aleu i totonu o le Palemene mamalu aemaise o Komiti ma Matagaluega sa avea ai Tuiloa ma Minisita Lagolago o le Palemene, fale ia i le fale o le Atua le tofa i le Palemene mamalu o Samoa ia natia ai i fatualavai ni ona faaletonu.

Ia, ona oo mai ai lea o se faamatalaga e molimoli atu ai se faafetai tele i le Malo, ona o galuega lelei uma ua maea faatino i le taimi o Tuiloa faapea i latou na muamua atu aua se manuia au i luma o si o matou itumalo.

Lau Afioga i le Fofoga Fetalai ma le mamalu o lenei Maota, ou te fia faaaogaina foi lenei avanoa faaauuro e auala i lau lauga mua a lou nei sui usufono ou te toe faaleo ma faamanatu ai i totonu o lenei Maota nisi o galuega atiae ua maea ona folasia e pei ona ou taua i le taimi ua sola, e tulitulimatagau pea le ufi a le tamaitai e tuitui, e tauanau ma valuvalusia aa o le fau i finagalo o le Malo ma le Maota nei, ina ia mafai ona faatini ma faataunuu nei manaoga, mo le faaleleia ma se manuia lautele o si o matou itumalo, ae le gata i lea o le faaleleia atili o le atinae o tagata tafafao maimoa mai o lo o maua ai seleni mo si o tatou atunuu.

Lau Afioga i le Fofoga Fetalai ma le mamalu o le Palemene, malo le onosai, malo foi le lavapapale. Ou te iloa e le o toe umi se lauga, ae ou te manatu, o le avanoa lelei ou te faataatia ai ma ou toe tatalo atu i lo outou mamalu e tusa ai o manaoga o si ou itumalo, aua ou te iloa o le a leai se sui usufono mamalu e faalavelave mai po o le saunoa mai foi o lau Afioga toe tasi le minute o le sui usufono. O le upu lava a le Tusi, “O le lava e tuitui o le a tatalaina mai.”

Lau Afioga i le Fofoga Fetalai ma le mamalu o le Maota, e fou le sui usufono ae le fou galuega sa faataatia ma faatiga taliga ai le sui usufono o lenei itumalo i totonu o le Maota nei. O nisi o galuega sa faapena ona folasia, o si o matou auala galue i le pitonuu i luma e faafesagai ma le vai lea e agai i Safee. O se malae taalo ua leva ona moemiti i ai ona o le toatele o tupulaga o si o matou itumalo. O auala galue o Manase e le gata e faigofie ai ona agai le nuu i faatoaga ma lafumanu papalagi, ae o le vave ona agai ese ai mo le saogalemu le nuu aemaise o tagata tafafao maimoa mai fafo i taimi o faalavelave faalenatura.

O le isi atinae ua moomia tele o le fausia o ni taligalu mo le puipua o lenei nuu mai faalavelave faalenatura. Auala i Matavanu i le mata o le afi, e le gata mo i latou e agai i uta e galulue ai, aemaise foi o tagata tafafao maimoa mai o lo o gasolo atu ma o i lea auala i le fia maimoa i lea foi mataaga matagofie. E faapena foi ona sa talosagaina le moomia o le faaleleia o le auala o lo o fesootai ai Safotu ma Manase. O le pole ma le ava mo le aufaifaiva i le ava o lenei itumalo, sa faapena foi ona finauina ma uunai malosi e lenei itumalo.

O lea ua maea ona folasia e nisi o sui usufono na saunoa i le aso ananafi faapea foi lenei aso vaitafe ia aemaise o le Maliolio, o Saipipi faapea Lano. Sa taua foi i le aso ananafi e se tasi o Tootoo na saunoa le faigalotu i le vaiaso lava lea o le Kerisimasi, o le faigalotu lea a si ou itumalo. Na faatoa faasalalau atu i le isi vaiaso na sosoo ai ona o le mafuaaga lava lea ma e tapuaia pea ma tatalo, ia faapena ona oo maia se taimi e mapu ai femalagaiga a le atunuu, e le na o si o matou itumalo, e leai o Samoa atoa o lo o femalagaai ai.

Lau Afioga i le Fofoga Fetalai, e talitonu ma malamalama lelei lou nei sui usufono faapea si o matou itumalo, e le mafai ona faatino uma galuega a le itumalo i se tausaga se tasi po o totonu foi i se Paeaiga se tasi ona o le tele ma

anoanoai o talosaga mai isi foi itumalo o si o tatou atunuu, aemaise o le utiuti o le faasoā mai le tala o le tupe.

Ia avea ia lenei avanoa ou te momoli atu ai le agaga fiafia ma le faafetai tele i lau Afioga i le Minisita o Galuega, Felauaiga ma Atinae Eseeese a le Malo, lau Afioga Manualesagalala Enokati Posala. Sa ou tuitui atu ma sa tatalaina mai lou faitotoa, sa ou saili atu i se taatiaga ma se faasologa ua oo i ai galuega mo si o matou itumalo ua leva ona folasia. Sa ou tatalo atu ma faatauanau atu i lau Afioga ma ua e saunoa mai i se tali faafiafia loto, “Aua le popole, o le a se i vaavaai i ai mo le tausaga nei po o le a se tulaga o le a mafai ona faatino.”

Lau Afioga i le Minisita ua faamalo fai o le faiva, faafetai le faatupu ma le faatamalii, o lau pule lea. O le tatalo i lau Afioga e pei ona ua maea ona e ioeina, a o se toe faamanatu faamolemole. Ia ave le faamuamua i le pitonuu i luma i le faafesagai ma le auala i Vaisafee, ae a alualu ua lava lau faasoā, alofagia le auala galue i Manase.

Lau Afioga i le Minisita o lena ua maea ona toe faapepa atu lea talosaga ma ua sainia ma le agaga fiafia ma le faafetai e faatumutumuga o si o matou itumalo, ma o le a le toe masalosalo i lau faatupu ma lau faaaloalo e pei ona ua e saunoa i ai. Ia faamanuia tele le Atua i lau Afioga.

E faapea foi se lagona e fia molimoli atu i le agaga faafetai tele o si o matou itumalo i lau Afioga i le Minisita mo Aoga, Taaloga ma Aganuu, Afioga Hon Magele Mauiliu Magele. Sa ou tatalo atu mo se avanoa mo se feiloaiga ma lau Afioga e tusa ai o le malae taalo ua leva ona moemiti i ai lenei itumalo ona o le toatele o alo ma fanau aemaise ua toatele le tupulaga talavou, masalo e maua mai ai i ina se afa o le Manu Samoa pe ana faapea ua leva ona fai so matou malae, ae faafetai tele i lou talia lelei mai o lata savalivali atu aemaise ai o le tala fiafia ua aumai o le a aumai le faamuamua o malae taalo o lenei tausaga i le malae o si o matou itumalo ua leva ona taliga.

Lau Afioga i le Minisita ua são faalalelei, ua malie õ ua malie malo, ua le ‘ole lea. Ua faafetai tele le faaaloalo.

E momoli foi le faafetai tele i a outou Afioga i Minisita uma o le Kapeneta ina ne i te i ua faapea ua faapito sata faamalo, ae ua o ta faafetai ona ua talia mai le tuitui ma le oleole atu o lenei sui usufono fou, ae faamalo i le Aiga Minisita, faafetai mo galuega eseese o lo o fitaituga ai a outou Afioga ma Matagaluega eseese ua tofia i ai outou, ae tautuana a ota savalivali atu i se isi taimi, alofa tatala mai outou faitotoa.

E mulimuli ai ae le faaitiitia le agaga faafetai i lau Afioga i le Palemia Tuilaepa Sailele Malielegaoi mo le tofiaina o le sui usufono fou o lenei itumalo e avea ma Minisita Lagolago mo le Matagaluega o Fesootaiga ma Faamatalaga Televavave faanei onapo. E le i i ai se manatu o le a i ai se tofiga aua o lea ua toe tasi le tausaga o lenei Paeaiga, ae ua faafetai tele i lau Afioga i le Palemia i le manaku mai, faafetai le amanaia, malo le faaeaea mo si o matou itumalo; o lau pule lea. A o le mea e momoli ai lau faafetai mo lenei tofiga ona o se tasi lava o talosaga fou ua oo mai i lou mafaufau i le taimi nei, ua fetau ai lava le tuu o ita i ina ona o lea e faafogafoga mai le tama Minisita o si a matou Matagaluega, Afioga Hon Tuisugaletaua Sofara Aveau e faamalie atu aua e te toatamai. Tau lava ina ou faaleo atu i le agaga naunau ina ia faamau i Faamaumauga a le Maota, pe tuai lava ae ta te iloa a faamau e fai lava. O se taimi o i luma, e pule lava lau Afioga po o afea, vagana ua maua se tupe i totonu o le paketi a si a tatou Matagaluega. O le agaga lea ma le faaaloalo ona o lea ou te matau atu, o lo o i ai le cable a le

BlueSky lea e toso atu pau mai Manase. Ou te talosaga ma aioi atu ma le agaga maualalo, pe a ae toso faatau atu i le nuu tele o lo matou itumalo i Safotu. Ou te iloa e tele ni faamanuiaga e maua ai i le taunuu atu po o le sili laitiiti atu foi i le aoga faaitumalo o le Alofi o Taoo.

Ou te faafetaia ai le saunoaga matagofie ma e lagolagoina ai foi e lenei itumalo fuafuaga faataatitia a le Afioga i le Minisita ma le Matagaluega mo Aoga, Taaloga ma Aganuu, o le a faapena ona le toe omai ai fanau a lenei itumalo i Apia, a o le a nonofo ma maua le mafutaga mafanafana ma matua, ma e le toe piopio ai ala o vae ona o lo o tapuai ma tatalo mai Savaii, ae omai ese mea o lo o faapena ona toe vaelua i ai le mafaufau o le tamaitiiti. Aua o lea ou te iloa faasao mai au pe a ou sese, o se taimi oi luma e i ai le polokalame lea e faaigoa o le schoolnet lea e hook up ai fale komiki. Pe mafai ona hook up ai i le internet tamaiti o si o matou itumalo ma o le a tele ina vave ona maua tali o mea uma o lo o suesue ai tamaiti, e le gata i lea, o le a vave fesoootaiga ma falemai. E toatele foi le aufaipisinisi o le a fia o atu aua o le a faigofie auala ma vave. O le tatalo lea i lau Afioga i le Minisita ma le mamalu o lenei Maota. E pei lava foi o le anavatau a le Faa-Faletui o lo o taitaia le Malo o lo o faapena ona manaia lava i le faafofoga a le motu tele i Salafai, “O le mea e lelei ma manaia mo Apia, e lelei foi ma manaia tele mo Savaii.”

Ua ou manaku ua lava ia lea lauga. O le a toe maua nisi manatu i se taimi o i luma. E pei lava ona lau silafia e fou le sui usufono ma e tataua ona usi lelei lau faalogologo ma ou mataitu felafolafoaiga ma manatu ma tilotilo foi po o fea o le a lilifa i ai felafolafoaiga e fatufatu ai se manatu o lenei itumalo i nisi o mataupu aemaise o tulafono o le a faataatia mai i se taimi o i luma.

Ona manatu ai lea i le Tala o le Tupe o lo o faapea ona taatia nei, e faamalo i lau Afioga i le Minisita o Tupe, o lau Afioga lava lea i le Palemia, ua faamalo i le Ofisa Sili o Pulega ma le Matagaluega o Tupe, le Pulega ma le aufaigaluega. Ua faamalo le galulue ma e lagolagoina e lenei itumalo le tala o le tupe e pei ona o lo o talanoaina nei.

Lau Afioga i le Fofoga Fetalai, o le a seu i fanua le sa o lenei itumalo aua e fai foi o le manao i le ufi ae fefe i le papa, e naunau i le manu ae fefe i le gata. E ui foi i se naunau ia tele se manatu aua le itumalo ma lana tapuaiga, ae ia matau foi e le faigofie le Maota ma ana galuega faagasolo aemaise o la outou faaaloalo mo le avanoa ua ou maua nei.

Ia lagi ia e mama ma faafualoa e le Atua le soifua tapuai o Lana Afioga Mamalu O Le Ao o le Malo, Afioga i le Tama a Aiga, Tuiatua Tupua Tamasese Efi ma le Masiofo. Ni ao gasolo aua le tapuaiga a le Sui o le Fono a Sui Tofia ma le Masiofo, lagi e mama lau Afioga i le Fofoga Fetalai ma le Maota, ia soifua manuia lau Afioga i le Taitai o le Malo, lau Afioga i le Palemia ma le mamalu o le Kapeneta, e faapea foi le Taitai o le Itu Agai ma sui mamalu uma o le Palemene. Ia manuteleina le tapuaiga a si ou itumalo pele Gagaifomauga Nu.1 aemaise o Samoa faafofoga, ae ou ola i le alofa ma le agalelei o le Atua, faafetai.

Na faaalua le fiafia o sui usufono o le Palemene i le patipati o latou aao i le maea ai o le saunoaga faataupou a le sui usufono mo Gagaifomauga Nu.1.

FOFOGA FETALAI: Ua faamalo Fetalai Faimalotoa. E manatu o lea ua logo faa-Tutuila le faafofoga a lenei Maota. O lea e tapuai ma le le lea le

paia i le Nofo a Pule aemaise le Falefa o Tumua. O lo o tapuai foi le paia i Aiga ma a latou Tama, o Tama ma o latou Aiga. Ona ou manatu lea o le a le toe faafuluina le fetalaiga ma le saunoaga leaga o le fetalaiga momoli lava lea aua le paia i Sao e Fa, le Ati Pouniu ma le Faasau, Aiga Sa-Umalau ma oe le tulafale o Tootoouli o le tatou Nofo a Pule. Le paia o Finao seia paia masina afiafi ma Vaalepu, o paia na o lena e te tausi aua o le paia i le Alii o le Itu ma Tupu o le Itu ma Tootoo i Finao.

E momoli atu le faafetai tele ona o lea ua talatala ma le la ma velo ti'a o le tautiaga aua le faalelegafulu a lau Afioga i le Tamaitai Faipule, ua malo saunoa faafetai tulei, faafetai malele. Tatou te tu foi i le too ae tepa i le ata ona ua fai i lagi le folauga a le Fetalaiga Tuiloa. E le mafai ona galo se mafutaga sa lelei leaga o le pale na fatufatu i Finao e saili i ai le tofa ma le faautautaga a le tatou fale Gagaifomauga, ia tatou viia le Atua i lona soifua auauna. A o la matou tatalo ia maua lau tofa, ia maua ni ou manatu, faamoemoe i le Alii ma ia e talitonu i lou valaauina aua e le faigofie le faiga filifiliga a Samoa aemaise le tusi aao ma le tapuvae tasi o le tofa ma le faautautaga a le tatou nuu ma le afioaga i Safotu ma Manase, o lea ua faamalo fetalai.

Tulai mai le sui usufono mo Sagaga le Falefa, ua maua lou avanoa e te saunoa ai mo le Tala Faatatau Faaopopo o le Tupe.

Tofa TUISA TASI PATEA (Sagaga le Falefa): Faafetai lava i lau Afioga i le Fofoga Fetalai mo le avanoa. Sa faapea o le a muliai ai se faamatalaga a lenei sui usufono ona o le matou Minisita ma le Matagaluega sa feagai ma le Tala Faatatau Faaopopo o le Tupe, ae ui i lea faafetai mo le avanoa ua maua.

Ae ou te le i sosofaina faaao le ivi o le tautu pe ou te tosi faalaufala foi le apaau na vivii e pei o le tala i le maniti a tamalii, ou te muai tapui le tapu a Tupolesava i le paia maualuga o lenei aso aua o lea e matau atu ua taufai matie le matila ma le ofeloa i le paia o le Maota nei, o le Maota i Tiafau.

Lau Afioga i le Fofoga Fetalai, lau Afioga i le Palemia ma le mamalu i le Aiga Kapeneta. Lau Afioga i le Taitai o le Itu Agai aemaise sui usufono mamalu uma o le Maota. O lea foi tatou te faatasi ma Faauluuluga o Matagaluega taitasi a le Malo, ma nisi o Faauluuluga o pisinisi tumaoti, i latou o lo o faia le faiva e lima ma vae i ai le tatou Malo, aemaise galuega taua aua le tautuaina o le tatou atunuu. E faapea foi ona ou faatalofa i le tapuaiga a Lana Afioga Mamalu, O Le Ao o le Malo ma lana Masiofo, aemaise foi le Sui o le Fono a Sui Tofia ma lana Masiofo, faapea foi le afio o le Afioga i le Faamasino Sili ma le vasega o Faamasino o le Faamasinoga.

E le gata i lea e le mafai foi ona faagaloina le tapuaiga mau a Samoa o lo o tapuai mai i maota ma laoa i le tapuaiga o le Fonousu a le atunuu, le paia i Aiga ma a latou Tama, o Tama foi ma o latou Aiga, le Usoga a Tumua ma Pule, Aiga i le Tai ma le Vaa o Fonoti. E faapena foi le tapuaiga i le motu i Sasae ia Tutuila ma Manua, ou te faatulou atu.

E avea foi lenei avanoa ou te faatalofa atu ai isi ou itumalo pele o Sagaga le Falefa, o nai ou pitonuu i Aele, Nuu, Tafaigata ma Aleisa o lo o afifio ai tupu ma ee o le atunuu o nai tuua sinasina i le nofo a Too i le nofo a Faleupolu i Tootoo aemaise foi le mafutaga a tina, faletua ma tausi, saoa ma sao aualuma, e oo lava i le malosi o le nuu ma nai fanauiti o lo o afifio ma papa-aao i ia pitonuu, ae a foi le vasega o le Afaigaluega Paia a le Atua o lo o

faafalelemalu ma faatunapaulia aua lava le asuina o le Ipuvai o le Ola, e faatalofa atu.

E faapea foi ona ou faatalofa isi ou nuu i Faleula, le paia i Fogaa ma maota e fia e afifio ai le Tautoefanua a le Malietoa, susu ai alo o le Malietoa, afifio Maopu o le Tuiaana, ae a lau fetalaiga i le Tagatafou o le Malietoa, le mamalu i le Faletolu ma le Tapunuu, faamalo le tapuaiga faafetai tapuai.

E faapea foi ona ou faatalofa atu isi ou nuu i Saleimoa mai lava i Paepaemagigi seia paia Satomai, isi o tatou pitonuu i Levi, e susu ai lau susuga i le Alo o le Malietoa Leiataatimu, e te afio i le Fagava ae pola puipui e oulua Nuu ma Pii o tuua i ai le Gautaala, lau fetalaiga Umu na matua i ai le faletolu ia ma Satilialo.

E faapena foi si ou pitonuu i Alamutu aua ua ova ma le 70 tausaga talu foi ona maoti lau faiganuu. O le paia i le fuafua e afio ai pe susu ai le Alo o le Malietoa lau susuga Sapau ae pola puipui lo oulua toalua matua o le Gautaala o Vaaulu ma Taga, ma lau fetalaiga Tuato oe le faletolu ia ma Satilialo. O le paia foi i Falesoa e afifio ai Sa Pula o Toetaufanua a le Malietoa, afifio Usoalii ma le nofo a Maopu, e alaatai lau fetalaiga Luatua lou Gautaala ma le faletolu, faapea foi le paia i Aveavai e afio ai le faasaosao o le aiga Satilialo le matua ia Toleapai, ia le Gautaala ma le faletolu. Paia foi le Niuvai ma Mataale e afifio ai le aiga sa Luatuanuu ma le latou tama i le aloalii, o Usoaliitaufeagai ae pola puipui ma tausua vaatele le Gautaala ma Siuolefanua, o paia na o si o tatou pitonuu ma le nuu atoa.

E le faagaloina foi le tapuaiga mamalu a le Auaifaluga paia a le Atua i so o se fata faitaulaga a lo tatou itumalo atoa e mai lava i Fogaa seia paia Niuvai ma Mataale, susuga i Faafegaiga, Patele, Taupousa o Auauna paia a le Atua o lo o faatunapaulia i lo tatou itumalo e nonomanu aua le manuia o lo tatou itumalo i nuu ma alaafaga, aemaise o le atunuu atoa, faamalo le fai o le faiva, faafetai i la outou tapuaiga, o lenei foi ua amatalia le tausaga mulimuli o lenei Paeaiga, faafetai i la outou tapuaiga, faafetai i la outou taupati. E talitonu lava, e le manuia ni a matou galuega, vagana o la outou tapuaiga ua manuia ai le alofaiva a au tamafanua aemaise foi o la outou sui usufono i totonu o le Maota nei.

Ona faapea lea, alo maia se i taumafai se tatou sao i le Tala Faaopoopo o le Tupe i lenei tausaga 2014/2015. Lau Afioga i le Fofoga Fetalai, ae le i avatua se motugaafa foi, e ao lava ona ou oo muamua i nai galuega a le matou itumalo, ina ne i te i ua uma lou taimi ae le lava se faaopoopo. Faamolemole lau Afioga i le Minisita, ou te avatu lava le faafetai i le Malo aemaise o le Afioga i le Minisita mo Galuega, Felauaiga ma Atinae Eeseese mo galuega lelei sa taumafai atu i ai lenei itumalo i le faaleleiga o nisi nei o galuega ua uma ona faatinoina, o le faaleleiga o le auala i Faleula, pei lava ona silafia e le tatou atunuu ia le tele o tagata e uia lea auala e agai i Nuu ma Tafaigata, faafetai ua maea ona faaleleia. Ia o le vai foi i uta i Nuu ma Tafaigata, faafetai ua maea foi. E faapena foi isi ou pitonuu i Levi, ua maea foi le latou auala aemaise foi le vai i le nuu a uta, e pau lava le talosaga e le i maea lelei ona e le i soo lelei, o lo o faatali pea paipa e oo mai lava i le taimi nei pei ona aumai e le afioga i le Taitai foi i lona vai o le tatou Pulega o le Suavai, ia faafetai atu mo galuega lelei uma i le faaleleiga o nisi foi o mea na tagi atu ai lenei itumalo, faafetai tele i le tatou Malo mo galuega.

Ae matou te toe valuvalusia foi aa o le fau finagalo lau Afioga i le Minisita mo Galuega, Felauaiga ma Atinae Eeseese, ia o lo o i ai lava nai o matou

pitonuu o lo o fia manaomia lava le faaleleia o auala galue ona o le toatele o i latou o lo o faaogaina nei auala galue. O le a ou amata atu i le auala i Utumoa e tau i AeLe. Ia o le auala e uia e tagata lotu uma o le Assembly of God ma le Ekalesia Metotisi agai i uta e tau lava i AeLe, ia e faigofie foi mo i latou, ia ua taatia le talosaga ae na ona toe valuvalusia aa o le fau pe a tele se tatou tupe, faamolemole. E faapena foi nisi o auala e pei ona i ai le auala i Lotosoa, Nonoa, Utualii ma Tufulele, e tatalo atu....

Tofa Lealailepule Rimoni Aiafi: Lau Afioga i le Fofoga Fetalai, e faamalulu atu i le sui usufono.....

Tofa TUISA TASI PATEA: Ia o le talosaga lea e avatu i nai nisi foi o galuega o lo o fia faaleleia i le matou, ua ova le faalavelave o le ulupoo lea.

FOFOGA FETALAI: Saunoa le sui usufono mamalu, aua le faalavelavea fua lau saunoaga o le mea lena e fai ai ma.....saunoa oe, o lea e faamalie atu le sui usufono mamalu i le saunoaga.

Tofa TUISA TASI PATEA: Aua e te popole, e le afaina lava tagata palota i le vaega lea ou te fai atu ai, e ese lava lou pitonuu ese lou itumalo e ese foi lou itumalo.

FOFOGA FETALAI: Tulai mai le sui usufono mamalu mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, o le ala lea sa ou le fia faalavelave ai i le Afioga i le sui usufono mamalu i faalupega, aua o lea ou te nofo ma faalupega o Tafaigata ma Nuu. O lea la ua faalupe nei ia lona itumalo atoa, ae ua le iloa la po o a faalupega faaleaganuu o Tafaigata ma Nuu, a finagalo la i ai, o lea o le a ou faaupua atua aua o nuu o lou itumalo, ae le afaina.....

FOFOGA FETALAI: Aua ia le tee le uluga i le.....

Tofa Lealailepule Rimoni Aiafi: O le mea lea e tulai atu ai lau Afioga i le tualalo o le sui usufono, o la ua afio le Minisita i lana faalavelave ma lona tuatuagia, ae ua maumau lana talosaga i ana auala, ae taatia see i se isi mataupu se i toe foi mai le Afioga i le Minisita, ma le faaloalo lava.

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea ou te faamaumaua, sau pea au auala, tuu ifo i ai ma auala oo.

FOFOGA FETALAI: Tulai mai le sui usufono mamalu, aua e te faalogo fua oe i saunoaga ia e faalalava solo atu, saunoa oe o lea ua maua lou avanoa.

Tofa TUISA TASI PATEA: Ae faafetai o lea ua laga foi le mataupu lea i faalupega, ia o le mea moni lava, na ou vili i le isi ou pitonuu lea, se

faamolemole po o ai lea e avea ma Tuua o le nuu? Ia ona tali mai lea o le Tuua, ou te fesili atu i ai, se faamolemole lava po o a faalupega o lo outou nuu, ae sau le tali a le Tuua o le nuu, aua e te faia ni faalupega ua faasa mai e le Malo. Ia ou te le iloa la po o a faalupega ia e fai mai ai le ulupoo lea.

O le tulaga foi i le le auai o le Afioga i le Minisita a o faagasolo lau lisi o manaoga.....

FOFOGA FETALAI: Leai e faamalulu atu, o le Minisita la sa afio e pue lona ata i a tatou puegaata la e i fafo, o lea ua taunuu mai le Afioga i le Minisita.

Tofa TUISA TASI PATEA: Ona pau lava lea o le Minisita e fealuai ma...e i ai lana remote, e silafia uma lava e le Minisita mea o lo o alu atu.

Ia ona faapea lea, se soia ia e te toe faalavelave mai le sui usufono mo Faleata Sisifo.

Lau Afioga i le Fofoga Fetalai, o nisi na o galuega e fia manaomia isi ou itumalo o nai auala galue, ua uma lava ona taatitia talosaga, ae faafetai atu i lau Afioga e toe valuvalusia aa o le laau lau Afioga i le Minisita mo Galuega, Felauaiga ma Atinae Eeseese, faafetai i lou agalelei i lenei itumalo.

Ona see mai lea o se faamatalaga puupuu e le tele i le tatou Tala Faaopoopo o le Tupe i lenei foi tausaga, ia pei lava ona avatu, ia o si au Minisita ma si au Matagaluega na saunia le Tala o le Tupe, ia e au faatasi le sui usufono mo Sagaga le Falefa ma talia le Tala Faaopoopo o le Tupe, ae i ai nai tuualalo e le umi.

Na ona ou faapea atu e avatu le faafetai tele i le Matagaluega o Faatoaga, Faleoloa o Faatoaga ma Faigafaiva ona o polokalame faaosofia o lo o faataatitia pea aua lava le galueaiina o faatoaga ma faigafaiva, aemaise lava i le tatou taumafa o le talo.

Sa ou malaga i Niu Sila i le kerisimasi ae o le mea na ou vaai i ai i Niu Sila, ua matua faaletonu lava le talo a Fiti ua le lelei. Ae ou fesili atu i le vaega o lo o faatauina, ia o la e ua i ai le tatou talo ua amata ona tau tele atu le alu atu o le tatou talo. O le faafetai lea, masalo o le taimi lenei o tatou, ia matua uunai le tatou talo, aua e leai lava se isi e faatauina, o Samoa lea e faatauina le talo a Fiti. Ia a o le tulaga lea ua i ai le talo a Fiti ua matua faaletonu le quality. Faamalo faafetai le galulue i lau Afioga i le Minisita ma le mamalu foi o le Matagaluega.

Ona ou oo atu lea i le Matagaluega mo Aoga, Taaloga ma Aganuu, faafetai foi mo polokalame o lo o faataatitia mo aoga. E pei lava ona malie foi i le faalogologo, a atamamai lava tupulaga ma tagatanuu, e faapena foi ona lelei se Malo. Faafetai atu o lea ua faataatitia ma faagasolo le avatu i tua o aoga i nuu ma alaalafaga e pei foi ona i ai Savaii, e ese le manaia o lea fuafuaga, aua e tatau lava ona malamalama le matua i le mea o lo o i ai tamaiti. A o le talosaga, manaia ae tatau foi ona faamautinoa lelei, e lelei ma ni faiaoga e o i ai. Ou te talitonu o le tulaga lea o lo o faagasolo e le Afioga i le Pule o le Matagaluega ma le Minisita ma le Matagaluega, e ese foi le manaia o polokalame o lo o sau i le Televisi, ina ia mafai ai ona upgrade ma faaleleia atili a tatou faiaoga. Faamalo fai o le faiva.

Ona ou oo atu lea i le Matagaluega o Soifua Maloloina, faafetai foi mo fuafuaga tetele ua i ai, manaia le tatou falemai fou. Faafetai foi ua iloa o lo o ua i ai le suiga o tatou services ua i ai nei i lata tilotilo. E pei ua amata ona

specialize lelei, ua amata foi ona faaitiitia i latou e faatalitali i le A&E. Ia faamalo faafetai, faamalo fai o le faiva. Na pau lava le tulaga foi na ona tuualalo atu ai, e manaia lava ae toe i ai ni fuafuaga ina ia... aua ou te talitonu o lo o taugofie pea le falemai, ae faafetai mo lau faamamaavega mo lo tatou atunuu, aua o nai tagata e mananao lava ia lelei le service ma ia pau. Ae faafetai o lo o agai lava i ai fuafuaga uma a le tatou Malo.

O le isi foi mea e matauina, o se system foi lea e mafai ai ona link ma fomai foi nei i tua, ina ia mafai ona oo atu i le fomai, pe ta te sau foi i lata GP, i lata fomai, na ona oomi atu lava oso mai ma le history o le mai lea, o le gasegase o le tagata po o lota mai, ona faigofie lava lea ona fai o fuafuaga. O se tuualalo, ae ou te talitonu pei ona ou talanoa i le Afioga i le Minisita, ua amata ona agai foi i ai fuafuaga a le tatou Malo, faamalo faafetai i lau Afioga i le Minisita ma le mamalu o le Matagaluega.

Ia, ona oo mai lea o lau tuualalo mulimuli ma lau faafetai foi i Ofisa Sili o Pulega o Matagaluega a le Malo, e lavevea ai i latou uma lava o Pule Sili, Pule Lagolago, principal, e oo lava ia i latou uma o lo o faatinoina galuega a le tatou Malo, e lima ma vae i ai le tatou Malo. E avatu le faafetai tele i lo outou faiva alofilima, malo le galulue, e talitonu o outou e lima ma vae i ai le tatou Malo. A i ai foi ni faaletonu, e talitonu foi e tele lo outou pitolaau e faatino. Na pau lava le agaga, ia outou alofagia, o le tulaga o lo o i ai le lalolagi nei, na ona avatu o se tuualalo, ia outou alofagia galuega uma a le tatou Malo, ave i ai lo outou fai mea mafai. E ese le taua o le faamaoni. E leai se aoga o le tele o le faailoga ae leai se faamaoni o i ai. E talitonu foi e i ai nai fuafuaga a le Malo o lo o faataatitia aua e fai lava si tele o le va o lo o i ai totogi o le principal ma lalo ifo i le isi level i lalo ifo. Ou te talitonu i le salary wage cap lena, e talitonu e i ai ni fuafuaga faataatitia a le tatou Malo, aua o le talitonuga, o i ina tonu lava lea e nofo ai le alii o le lalolagi e faaosofia ma faatalitali i nisi o faaletonu e ono seu ai agaga o le faamaoni ma ave i le motu foi lea e nonofo ai agaga leaga. O le soso atu lea i le ava ma le faaaloalo, ia manuia tele lo outou alofaiva i galuega a le tatou Malo.

Ia, ona faapea lea o se faamatalaga lau Afioga i le Fofoga Fetalai, faafetai tele mo le avanoa. Ia alofagia e le Atua faamanuia i lau Afioga, faamanuia i le Palemia ma le Aiga Kapeneta, o le a foi... aemaise le Taitai o le Itu Agai ma lana Vaega, aemaise le sui usufono faaosooso. Ia, alofagia foi sui usufono mamalu uma o le Maota nei, aemaise o Ofisa Sili o Pulega ma Pule Sili o Matagaluega ma Faalapotopotoga a le Malo. O le a foi se faamatalaga ua sala, ia, e talitonu ia alofagia e le Atua, ia faamagalo foi le leo o le auauna. A o le agaga lava ia, ina ia tatou maua le galulue faamaoni aua le atiaeina o le tatou atunuu. Ia manuia tele lenei aso faafetai.

FOFOGA FETALAI: Malo saunoa. Faafetai fetalai i le sui usufono mo Sagaga le Falefa.

Malie lava se i tuu atu le avanoa i le Minisita mo Galuega, Felauaiga ma Atinae Esee.

Afioga Hon Manualesagalala Enokati Posala: Lau Afioga i le Fofoga Fetalai, ona o lea sa taua au i le taimi na ou tuua ai le Maota, o tulaga masani lava o le natura o le tino na toesea ai le Maota nei, ae o la e lava e ola le PA System, e mafai ona lagona so o se mea lava e oo i ai. Ae o lou tulai atu, ona o la e i ai faamaumauga o lou ofisa, o le tasi lenei o sui usufono, le sui

usufono mo Sagaga le Falefa, e aupito sili ona tele taimi na oo atu ai i le Ofisa ona o le talosaga i auala o le itumalo ma galuega e fia faatino. Atonu o la e faafofoga mai le itumalo, o le tulaga lena e i ai, o le naunau ina ia faatino galuega mo le itumalo. Ma le agaga faaaloalo.

FOFOGA FETALAI: Malo. Aua e te popole o lea ou te faamaumauina i i le ta lisi ona avatu lea i le isi ofisa lea e i tua i i. Tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

Afioga Hon LEAUPEPE TOLEAFOA APULU FAAFISI (Aana Alofi Nu.1): Malo faafetai mo le avanoa e tulai atu ai ma le agaga faaaloalo e fai foi sina sao puupuu o lenei foi itumalo aua lava le Tala Faatatau Faaopoopo o le Tupe. Ma ou te tulai atu e faamauina foi le agaga faafetai e talia ai ma le fiafia le Tala Faatatau Faaopoopo Muamua o le Tupe pei ona i lumamea nei o le Palemene. Ae ou te fia faafeiloai atu foi i le tapuaiga a Samoa i le faafofoga tapuai mai a Lana Afioga Mamalu O Le Ao o le Malo ma le Masiofo, e faapea foi le tafatolu i paia faale-Malo aemaise foi o paia faale-atunuu ae tainane foi le paia faale-Atua i Taitai o le Talalelei o lo o faapena ona le mapu le latou tatalo i le ao ma le po, po ma le ao ina ia to manu aua le Malo ma le atunuu ma ona tagata i lenei foi taimi o le faitau a le atunuu e faapea o le taimi e louloua ai le tau. Ae faamoemoe ma faalagolago i tatou o Taitai o le atunuu i le aufai tatalo ma le tatou foi tatalo ina ia faapena ona alofagia e le Atua ia uli ma sao le sa o Samoa i le amataga o lenei foi tausaga fou.

E faapena foi ona ou faatalofa atu i le faafofoga tapuai mai a le itumalo ona o le tausaga fou lenei, ma ona o le uluai Fonotaga foi lenei, e ao ona avatu ai se upu e faafeiloai ai lou itumalo aua le paia o le afioaga o Fasitoouta ma Faleasiu. Malo le tapuai ia te outou Aiga, o le paia lava lea aua le mamalu i le Falefitu ma le Tuua ma le nofo a ituaiga ma le Fetalaiga ia Tauauvea i le la itu i lau tausiga aua Satuala ia Aiono ma Leaupepe, o Sua ma Toleafoa ma le Taauso. E faapea foi lea itu o le tatou itumalo, ae a le tausiga a oe le Faletolu ma Fuaifale, aua le paia o Aiga e Tolu o lo o faapena ona e tiu ma afifi e pei o le faiva o matalaoa, i le tulaga o lou faiva alofilima. Ia, tapuai maia ma le manuia.

Ua ou tulai atu e momoli le faafetai ma le faamalo, aua e le na o manaoga foi, ae ao ona molimoli atu le agaga faafetai ma le faamalo i le Malo i lea Matagaluega ma lea Matagaluega, lea Faalapotopotoga ma lea Faalapotopotoga i lo latou faiva alofilima ma le afu maligi i le tautuaina o le Malo ma le faatinoga o atinae ma galuega, aua o le atinae o le atunuu e manaomia le galulue faatasi e pei lava o le upu e fai i taaloga. E le o le tagata e sikoia pe na te kikiina le polo ma ova, a o i latou o e galulue ma faapena ona ave faatasi le faatinoga o le galuega e maua ai manu aua le tapuaiga a le atunuu. Ou te momoli atu ai le faafetai, e le faapito foi manu ia Tasi i se lagona vaivai, ae o Matagaluega uma a le Malo e momoli i ai le faafetai ma le faamalo, e faapea foi Faalapotopotoga ma... Ae o le isi lenei Matagaluega e ave i ai le faamalo ma le faafetai i lenei foi vaiata, e pei lava ona maua i saunoaga a nisi sui usufono, ua faasolo ina taugata le fofoga taumafa o le atunuu i itu tau fua o faaeleleaga. Masalo ai ona o le talo, o lea ua ave le talo i atunuu i fafo, ae ua ou manatu i ia lava galuega i le lelei ona tapena e le Matagaluega o Faatoaga ma Faigafaiva ua faapena ai ona sologa lelei foi lea

atinae a le atunuu, aua o le mea lava lea sa faalagolago i ai tuua ma matua i aso ua mavae, o fua o faaeleeleaga ma faatoaga. Malo le faafetai, e lelei ona taumafai atili ma silasila pea i ai, afai ua faapena ona lelei, ia aveaveai. Ma e i ai itu e ao ona silafia lelei, ua ou manatu ua uma ona ou telefoni e momoli i ai le faafetai i le Matagaluega o lo o vaai meatoto, ona a ou manatu i aso ia, o le laau lava lea i le matou itumalo sa faalagolago i ai le soifua o le matou itumalo, o le laau lea o le koko. Pei lava foi ona silafia fai mai le aumatutua i totonu o lenei Palemene, se e ui lava i laau ma laau, ae lua lava laau suetupe, o le koko ma le niu. Ia, taatia ia talo ma fai ma mea faapena, ae o le koko ma le niu, ulu, le fofoga taumafa, a o le malaia sa feagai ma i tatou talu ai, o le tu tu lava o lea koko pe, tu tu lea koko pe, o le limu foi lenei e le i maua se fofu o le faafitauli. E pei la i lau vaai i le tulaga la e i ai, ua amata foi ona toe tulai mai. A o le mea sili ona taua, ua ou manatu e faaali mo le faafofoga a le atunuu, ua maua le solution, ua maua le fofu e tama fanau a le atunuu, si tama fomai lea o Seuseu, Dr Seuseu Tauati, i latou nei sa latou faia se galuega lelei ma tulai mai ai le fofu o ia foi faafitauli. Aua ou te lagona i aso ua mavae, e tu tu lava lea laau mate, leai se fofu, o ulu, koko, o le niu foi, o la e ua fesoasoani i lenei vaitau i le faasaoina o le manu aini, o lea foi ua avatu polokalame, a o le aufaifaatoaga lava, i le le galulue faatasi ma le faatonuga a i latou e atamamai ma faapitoa ina ia fai se fofu o le faafitauli lea. Aua e leai se aoga e uunaia ai e le Malo e faatupulaia le totoina, ae leai se fofu o mafai ona fofu ai. Ae o lea ua i ai le fofu... Faafetai.

FOFOGA FETALAI: Malie le sui usufono o lo o saunoa se i tuu atu le avanoa i le faauilavea a le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ona o lea ua saunoa le sui usufono o lea ua maua le fofu e tape ai le limu lea sa afaina ai le koko, afaina ai le tipolo, afaina ai foi le ulu. Ia, ona o le galuega a le fomai lea o Seuseu. Masalo o le avanoa lenei e tau mai ai le fofu faalauaitete, a o lea e faaalu atu i le atunuu atoa.

FOFOGA FETALAI: Se i tulai mai le sui usufono mamalu e saunoa.

Afioga Hon LEAUIPEPE TOLEAFOA APULU FAAFISI: Malo faafetai. Ou te le o matua mautinoa i le finagalo o le Palemia, ae ua ou manatu e faalauaitete le agaga faafetai i lea foi alo o le atunuu. E pei o le agaga lea, e le aoga ona afifi se faafetai na o ia ma au, ae ona o le gasegase o le faafitauli o lo o faapena ona afaina ai le tamaoiaiga. O le a se aoga, toto le koko, toto le ulu e fai ai le falaoamata, ae pepe i le limu lea? O lea la ua ou manatu ou te tulai i inei, ua uma ona ou faafetai i ai. Ae toe faalauaitete lau faafetai, e le faamimita fanau a le atunuu, ae faalauaitete lau faafetai. A o i ai foi nisi o le aufaifaatoaga e pei o lou faifaatoaga o feagai ma faafitauli ia, o lea ua ou tau atua le fofu o le faafitauli, o e vaai le Matagaluega o Faatoaga, o lo o i ai le fomai o Seuseu e maua ai lo outou faafitauli. Ia, e pei o tulaga ia, a o ai a ave i ai tatou upu faafetai? Faafetai i a tatou tama fanau, o i fafo aumai le poto, ona aumai lea e faaoga i le atunuu, ae le o le aumai o i Fiti, Toga, o atiae atunuu na. E pei o le agaga lena, e le taua le tupe, ae taua le agaga faafetai.

O le Matagaluega a Leoleo e fia faafetaia, ua maue foi le amataga o lenei tausaga, o le faaiuga foi e leai se faaletonu. Se e le faapea, e pei lava foi o le fetalaiga a Iesu, “E ola faatasi le titania ma le saito.” Ae po o lea lava le lelei e oo i fea, e i ai lava ma le faaletonu o le atunuu, leaga e le tutusa uma tupulaga o le atunuu. E i ai lava le isi soifua e manumanu i lona soifua, ae i ai lava le isi e le manumanu i lona soifua, e pei lava o se mea fua ia ia. Ae faafetai atu i le Afioga i le Minisita ma le Matagaluega i le galuega e le faigofie i le leva o le afiafi, e tafafao isi ae outou feagai ma tiute. Malo faafetai, maua lo outou finagalo, maua lo outou malosi e tautua ai Samoa. E i ai foi lo outou taimi tou te oo mai ai i le Palemene ona sasaa foi lea o lo outou finagalo ae faafofoga i latou o faapena ona galulue. E momoli atu ai le agaga faafetai i aoga, o Matagaluega uma, ua tele le suiga ua i ai. E le tau laeia i se upu pe tau sulaina le toga lelei pe tau laeia i se faamatalaga i lo outou faiva alofilima. Ae i le matou lea maitau, o lona, se mea ina lelei o se atunuu ae atamamai fanau. E tasi lava le tagata atamai o le aiga, e ki i luga le aiga, ma o le atamai foi e le gaioia e le isi, e le pei o le toganiu e tele le popo ae alu atu toe o aile ua gaioi e le isi, tulou i sala le gagana i le faafofoga a Samoa. A o le atamai, e le gaioia e le isi le faiai o le isi, o le meaaloa a le Atua, e tasi lava le tagata atamai o le aiga, e siitia i luga le aiga. Ia, o le manatu lea e momoli ai le faafetai i le Matagaluega o Aoga, aemaise o le Pulega o Tagata Asiasi Maimoa Mai, ia sii i luga le Pulega o Tagata Asiasi Maimoa Mai, leaga o le source... o le mea lea e omai ai tagata tafafao maimoa mai ma o i luga i le mauga o Vaea, ou te faalogo e le o lelei le auala e alu i luga i le Tusitala, ne i te i ua mapeva ai se vae o se isi le toe sau i Samoa. Ou te le iloa ai ua fai, ae faamanatu atu, aua o nai mea iti faapena e tosina mai ai.

A o lou itumalo, e momoli atu le faafetai i lau Afioga i le Minisita mo le Pulega o le Suavai. O lea lava ou te iloa ua uma ona faataoto lau polokalame i le vaitaumafa o Fasitoo ma Faleasiu. E leai, e le naunau matou te le soona nonoi foi pe matou te gauta, ae na o se faamanatu e fua i lau tapenaga, e fua i lau faasoa. O lea ua matou iloa, o lea foi e silafia e le itumalo, o matou lea ua oo mai ai lau faasoa, ae fua lava i le mafai, e fua foi i le louloua o le tau. Afai ua lava tapena, ia faaosoa loa. O le mea lona, e le o se palota po o le a, a ia aua ne i aisila lau faasoa. Ae momoli atu le faafetai. O ou mama na, ia faapena ona maua pea lou finagalo.

O auala, ia leai ua ta le iloa, ae na ona tau atu pea, o nai auala foi nei ua mafuga, tulou i sala le gagana, o le upu e foi mai, ae lelei ona teuteu e laitiiti ai se tupe e alu ai, ae faamanatu atu, e fai o le manao a o tupe e faatino ai. Ae lafo atu i ou tauau, ina ia faapena ona faamaeaina ia itu, e le na o le matou itumalo a o mea o lo o tagisa i ai sui usufono mamalu o le atunuu. Ia na pau ia o nai mea na manatu e fia faamanatu atu, ae na ona ou tulai atu e faamau i le tatou Fonotaga lo matou talia aloaia o le Tala Faatatau Faaopoopo o le Tupe. E pei o le matou tala lea ma le agaga faaaloalo. Ia faamanuia le Atua i lau Afioga i le Fofoga Fetalaia, manuia foi le Faigamalo i le Palemia faapea foi se finagalo i le Taitai o le Itu Agai ma lea foi Vaega toaitiiti i lea Itu, ae matou malolo i le alofa o le Atua. Faafetai.

FOFOGA FETALAI: Malo faafetai saunoa i lau Afioga i se tasi o sui usufono mamalu mo Aana Alofi Nu.1, o le saunoaga momoli lea aua le paia o le itumalo i ona tulaga faalupe.

Ia, ou te talitonu o lea ua tatou taunuu tonu i le tatou malologa o le aoauli pei ona faatuina ai le lafo, ona ou manatu lea ua tatau ona vavae foe ae fai se tatou malologa.

E faamanatu atu o lo o i ai pea le puegaata i lumafale mai le Ofisa o Faiga Palota, ma le faamoemoe tatou te toe potopoto mai iinei i le itula e 3.00 i le 7.00 i le tatou Fonotaga i le afiafi nei. Ae e momoli atu le faafetai i lenei vaega o le aso ona o le lavapapale i le faamoemoe aua tuleiga ma saunoaga. E talosaga atu a tatou talii mai loa i le tatou Fonotaga i le itula e 3.00 i le afiafi nei ona amata loa lea ona o lea ua ou maua i latou na tutulai mai e fia saunoa i saunoaga faaii o le Tala Faatatau Faaopoopo o le Tupe, ona tali loa lea o le Malo i le afiafi a nanei.

Na faataatia ese Taualumaga a le Fono Aoao i le itula e 1:00 i le aoauli.

Na toe faaauau Taualumaga i le itula e 3:00 i le aoauli.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2014/2015.

FOFOGA FETALAI: E i ai le agaga maualuga o lea ua tatou toe potopoto faatasi i lenei itula o le afiafi aua le faaauauina ma le faatinoina o le tatou galuega e ala i le tatou lafo sa faatuina i le taeao nei, ona o le faamoemoe o le tulitulimatagau ma le tulituli o le tatou taimi ma le tatou Tala o le Tupe.

E faia le tatou malologa ua maea ona saunoa le sui usufono mamalu mo Sagaga le Falefa, ma e i ai le talitonuga o lea ua maua e le Nofoa le toasefulu ma ona tupu lea sa tutulai mai e faailoa mai lo outou finagalo e tou te fia saunoa i le Tala o le Tupe. Ma e manatu ia e manumanu tele i le tatou taimi ma le faaauauina o le tatou galuega. O lea ua ou tapa ai se sui usufono mamalu e amataina le tatou Fonotaga i lenei itula o le afiafi.

Tulai mai le sui usufono mo Anoamaa Sasae.

Tofa ALO FULIFULI TAVEUVEU (Anoamaa Sasae): Faafetai i le avanoa i lau Afioga i le Fofoga Fetalai.

O paia ma le maualuga o le Maota o Samoa i Tiafau nei, ou te faatulou atu. Lau Afioga i le Fofoga Fetalai, afio lau Afioga i le Palemia ma le Kapeneta, afio lau Afioga i le Taitai o le Itu Agai, afio Afioga i Sui Minisita ma le mamalu i Afioga i sui usufono mamalu o le atunuu. O le tapuaiga foi a Faauluuluga o Matagaluega ua mafai ona tatou faatasi i lenei itula o le aso, ou te faatulou atu.

Ou te faatulou atu foi i le tapuaiga mamalu o le tatou atunuu Samoa, Aiga ma a latou Tama, o Tama ma o latou Aiga, Usoga a Pule ma Tumua, Ituu ma Alataua, Aiga i le Tai ma le Vaa o Fonoti. E faatalofa atu foi i Sui Vaaia o le Atua o lo o latou nonomanu aua se manuia o le atunuu o Samoa. Malo le soifua, malo le fai tatalo. Avea foi lenei avanoa e faatalofa atu ai ma faamanuia atu le Tausaga Fou isi ou itumalo o Anoamaa Sasae, faafetai mo la outou tapuaiga, a lea ua avanoa ai lenei itula ma aulia mai o lenei tausaga fou e la outou sui usufono.

Ua i luma nei o le Laulau a Fono le Tala o le Tupe Faaopoopo o lenei tausaga a lo tatou Malo, ma e talitonu la le taofi, ia e le toe oo i ai se faamatalaga, aua ua pupula ma malamalama e tusa ai ma le tuuina mai i luma o le tatou Palemene nei. Ae momoli atu le agaga faafetai i lau Afioga i le Minisita o Tupe, lau Afioga i le Palemia aemaise foi le Matagaluega sa feagai ai ma le matafaioi o lenei faamoemoe o le Tala o le Tupe Faaopoopo o lenei tausaga, faamalo faafetai, malo galue. E manatu foi ia o le avanoa lelei lenei e molimoli atu ai le agaga faafetai i le tatou Fonotaga aemaise Afioga i Minisita o lo o ala atu i ai talosaga pei ona tuuina atu i lenei itula o le aso. Ona muamua lea ona ou tapa lau Afioga i le Minisita mo Galuega, Felauaiga ma Atinae Eeseese o le tatou Malo, lau Afioga i le Minisita, malo faafetai, malo, o lou manuia lea e fetau tonu lava ma lou afio mai ma le maua loa o lau Afioga. E talitonu le taofi ia ua silafia lelei e lenei itumalo galuega sa talosaga atu ai i lau Afioga i lea tausaga ua mavae atu nei. Ua maea lelei ona faamoli ia ma toso le uila o le auala galue o lenei nuu o Falefa, ae toe pau lava lea o le tulaga o lo o i ai e pei ona talosaga mai, e toe o le auala galue e le i oo i ai se faata. Ia ae tatalo atu i lau Afioga i le Minisita, toe lava o le faata, o le moli ma le auala ia ua matagofie mea uma, ae toe lava o le faata o le auala galue lea aemaise ia o le vaega foi lea o lo o i ai le faleaoga o lenei nuu, e manaomia lava le faaleleia o mea o lo o feoi ai le fanau o lenei nuu, ma lou faaaloalo.

E le gata i lea e faatalosaga atu i lau Afioga o le tasi lenei nuu o lo o pagatia lava i le faaletonu o auala, sa ou avatua foi i sau lauga i se tasi o masina o lena tausaga ua mavae, o Manunu o se tasi o nuu mavae o le itumalo, a o le mea lea e tupu e pei lava ona ou avatua foi muamua, ia a ta sau mai le taavale mai Manunu ae toe foi atu lava i Saoluafata e le i taunuu le taavale lea e alu atu i Saoluafata e alu i Manunu, ua faatetele lava le faaletonu o le auala o sia nuu. E tatalo atu i lau Afioga i se avanoa se i taumafai ai le auala o le nuu lenei.

Ona ou oo atu lea i lau Afioga i le Minisita mo le Punaoa Faanatura ma le Siosiomaga. E muamua lava ona avatu le faafetai, e talitonu foi e le faigofie talosaga a lenei nuu aua o se tasi lea tulaga matuia o lo o vaaiia pea i tausaga uma pe a tutupu mai tulaga aemaise lologa le vai lea i Lalomauga, ia atonu o le vai lava lea o lo o aafia ai foi ia ma le nuu lea o Falevao, ae faafetai o lea ua maua mai le saunoaga a lau Afioga o lea ua i ai le seleni e faataunuu le faamoemoe lenei, e momoli atu le agaga faafetai, masalo o se taimi o lenei tausaga o le a faataunuu ai lea galuega. Ae toe faamanatu ai foi i lau Afioga i le Minisita lou nuu o Falefa, e pei lava ona avatu i lauga uma i tausaga uma o lenei Paeaiiga, o le taligalu o lenei nuu e pei lava ona faasilasila atu, sa amata lava le Paeaiiga lenei ia o talosaga atu lava, ona o le mea ua tupu, ia ua uma ona faasalalau i le Paeaiiga muamua o le a amata le galuega i Falefa o le taligalu, ae amata le tausaga o le Paeaiiga lenei, ia ua ese le mea ua oo i ai ua le o le taligalu ae ua fai ai le talivai. Ae pei lava ona ou talosaga atu foi, o lea lava tulaga uma ona faasilasila ua uma foi ona oo atu le kamupani ae te i ua fai le galuega fai le talivai. O le mea lea e toe tatalo atu i lau Afioga i le Minisita, ia se i tagai ane i le taligalu o lenei nuu, aemaise foi o taligalu o nai nuu ia i tua o Sauano ma Saletele. A outou malaga atu i ai, masalo foi ua outou silafia, ia o nai nuu nei e muafale lava i moana ae tuafale i le papa, e leai se mea e alofia i ai pe a oo mai le faigata ma puapuaga e ala i lologa, ae tatalo atu ia ua manaomia lava le faaleleia o taligalu o nai nuu nei.

Lau Afioga i le Fofoga Fetalai, pau ia o mea ua lagona e tatau ona tuuina atu i luma o le tatou Fonotaga nei aua le silafia e Afioga i Minisita e fesoasoani mai i mafatiaga o lenei itumalo, ia ona alu alu lea ma se faamatalaga, ia manuia tele lenei afiafi ma toe taimi o lenei Fonotaga, soifua.

FOFOGA FETALAI: Malo, malo faafetai saunoa i lau Afioga i le sui usufono mamalu mo Anoamaa Sasae, e manatu o lea ua manino ma malamalama folasaga aemaise foi o manaoga o lo tatou itumalo.

Tulai maia le sui usufono mo Falelatai ma Samatau.

Afioga TAEFU LEMI (Falelatai ma Samatau): Faafetai i lau Afioga i le Fofoga Fetalai. I le agaga o le faafetai ma le agaga fiafia o le vaitau o le atevetu ia ma moomooga alofa o lenei Tausaga Fou ua aulia, ou te faafeiloai atu ai i lau Afioga i le Fofoga o le Palemene o Samoa, lau Afioga i le Fofoga Fetalai, e faafeiloai atu foi i lau Afioga i le Taitai o le Malo, le Sui Taitai, Minisita o le Kapeneta, lau Afioga i le Taitai o le Itu Agai ma le paia ua sasao nei o sui usufono mamalu o itumalo e fia i totonu o Samoa. Matou te faafeiloai atu foi i le paia o Samoa o fita faafogafoga mai i lenei itula o le aso. Le tapuaiga a Lana Afioga Mamalu, O Le Ao o le Malo, lau Afioga Tuiatua Tupua Tamasese Efi ma lau Masiofo, e faapea foi i lau Afioga i le Sui o le Fono a Sui Tofia, lau Afioga Tuimalealiifano ma lau Masiofo, matou te faatalofa atu i le paia o le Faamasinoga i lau Afioga i le Faamasino Sili aemaise foi o alii ma tamaitai o le Faamasinoga.

E faafeiloai atu foi i le faafogogaaga a Samoa, aemaise foi o le Aufai Tatalo o lo o nonomanu ma tapuaia faiva o le tatou Palemene nei, faafetai tatalo. E faatalofa atu foi i le paia o Aiga ma a latou Tama, Tama ma o latou Aiga, le Usoga a Tumua ma Pule, Ituuu ma Alataua, Aiga i le Tai ma le Vaa o Fonoti.

E faafeiloai i le paia o lou itumalo, le paia o le Aiga Tauaana ma le latou Tama, le afifio o le falefitu o le Ati a Tagaloa, afio Faasavalu o le Matua moepo ia ma lou aiga Salu ma Auvaaipeau, Tausoalii ma tama a Tausala, faapea foi Taiivao na falefia i ai Aiga, Tonumaivao o lo outou Matua Aiga, alaalatai Falelatai ma Tagata o le Vaau. E faafeiloai atu foi isi ou nuu i Samatau i le afifio o le Falefa o le Usoalii ma le Gafa Fiamme ma le Tamaitai, saofaiga ia te oe Leulumoega. E fia faatalofa atu foi i le Aiga Sa Levi i totonu o lou itumalo, le afio o lau Afioga Patele Nikolao Douglas Fido, Patele Peniamina ma Patele Tuli. E faatalofa foi i lau Afioga i le Taitaifono o le Ekalesia EFKS i Samoa nei ma atunuu mamao, lau Susuga i le Toeaina Faatonu Tautiaga Senara, e faatalofa atu i le Aufaigaluega paia a le Atua i lo tatou itumalo o lo o faafalelemalu ia ma nonomanu aua se manuia o le itumalo i lo oulua sa seelua o a oulua susuga i Epikopo o le Ekalesia o le Au Paia e Gata Ai.

Lau Afioga i le Fofoga Fetalai, o le itumalo lenei e le tau aamia le lauga pe tau taliga foi e lau Afioga aemaise le paia o lenei Maota, o sui usufono nei o le Komiti o Tupe, e lolo lava ma taputapuai foi, e ou le Lipoti lea ua i lumamea. Sa manatu foi lava e saausi pea... se i saunoa le Maota, e i ai se taimi ona fai lea o sa matou tala. E ui i lea, ia o lea ua amata ona e tuualalo mai e ala i le tatou faamoemoe ina ia sao ma uli. O le ala lena o le matou tulai atu. Ia o le a ou amatamea atu i le matou Komiti o Tupe, a o lo o i ai foi nisi o tootoo o lo o fia sii i le tai lo latou sa. Lau Afioga i le Fofoga Fetalai, o au nei, ou te nofo i totonu o lou itumalo. Malie tele saunoaga o le taeao, ma ua

ou mafaufau i le tulaga o lo o i ai lenei itumalo, e nofo i le itumalo, moe i le itumalo, alafai mai i le taeao faatasi ma le itumalo, aai faatasi ma le itumalo, lolotu faatasi ma le itumalo, fono faatasi ma le itumalo. A uma foi le Fono ona alu foi lea i le itumalo, e le manaomia ni ea malulu po o ni ili, leaga e malu le faleoo e moe ai lenei sui ma le itumalo. A tuu atu foi le vae ae misi i le loomatua tau i le maa taotainamu, ia o lena lava e alu ai, leaga e nofo i le itumalo, malu le ea, lalo o ulu ma lalo o niu.

O le mea lea lau Afioga i le Fofoga Fetalai, e le o se tala umi le Tala o le tatou Tupe, ae ua manatu lava o lea e faalauaitele a tatou lauga, faaaoga le avanoa, o lo o tapuaia o tatou faiva e o tatou itumalo.

Lau Afioga i le Fofoga Fetalai, e momoli la lau faafetai aua ua ou matau atu i le faatupeina o lenei Tala Faatatau Faaopoopo o le Tupe, ia, e lata i se \$4miliona tatou te faamoemoe e aumai i totonu e le Matagaluega o Tupe Maua. Ia e auala atu ai i ina se faafetai tele lava i lau Afioga i le Minisita o Tupe, ona ua mafai ona faaopoopo lea vaega o a tatou tupe maua mai le Matagaluega o Tupe Maua. Aua e tele lava le tatou faasoa, o faiva ia o feagai ma lau Afioga ma le Palemene nei, ae tatou te faamoemoe lava i le Matagaluega o Tupe Maua ma nisi foi o Matagaluega a le Malo e maua mai ai seleni. E le o se tupe laitiiti la lea siitaga ua aumai e le Matagaluega o Tupe Maua, o le mea lea e lagona ai le agaga faafetai. O nai galuega sa manatu e faasoa atu ma le tatou Palemene nei, e le malaese le matou itumalo nei, malaese le paia o le Palemene. E tele lava galuega e moomia e fia faatino, o alagalue, o taligalu ma tulaga eseese, e tutusa pau lava o tatou itumalo. Na pau lava o lea, o le tatalo faatauanau ia i latou o lo o faia le faasoa, ina ia mau avanoa pea ma faasoa lima lelei, ia tofu le itumalo ma sina galuega i lea Paeaiga ma lea Paeaiga. O le ala lena lau Afioga i le Fofoga Fetalai, ona manatu lea, lau Afioga i le Minisita mo Galuega, o ni auala lava e sili ona faaletonu i Samoa, Savaii ma Upolu, e te maua i le alu atu i Mulifanua e tau i Falelatai. O la e lava e i ai vaega o le auala o lo o lelei, ae fai lava ma fonofono, e le o lelei le tulaga o i ai auala e oo mai i le taimi nei, e lelei ona se i silasila i ai lau Afioga, ina ia faatino lea tulaga, ia maua foi e lenei itu o Tumua nei ni auala lelei e pei ona saafi i ai le tele o itumalo. E faapea foi la ma le alu atu lea i Falelatai i Faleaseela, e i ai nai vaega o le auala lea, aemaise lava le tafa lea i Faleaseela, ua matua tafi atoa lava le ta, e manaomia e silasila pea i ai lau Afioga. Tau lava ina matou logoina atu ma tuualalo atu i lau Afioga, ae o lo o i ina le uta a le faimea e te faasoasoa. O le vaiaso na tea nei na matou asiasi atu ai i le motu tele i Salafai i o matou aiga, e auala atu ai foi se tuualalo, o se faufautua, e le o se faitio. O le vaitau pisi o le tausaga, a fai le booking i luga o le vaa, e book le vaa e alu i Savaii, e le avanoa taeao, e laki foi ae avanoa talatu taeao, ona maua lea o lou avanoa e te alu ai i lau taavale i le vaa, lea e mafua ai ona tausaili se aso. O le mea ua tupu, e o atu i Mulifanua o la e sau le isi vaa i Savaii, ona faatafa lea e tu tu ai i Mulifanua, alu le isi vaa, e pei e fai vava. Sa faapena foi i Salelologa, e faatafa le isi vaa pe a taunuu atu i Salelologa ae sau na o le isi vaa pe a taunuu atu. O i ina la lea e tau auala atu ai se tatalo i lau Afioga i le Minisita, pe le o... o le taimi pisi lava lea o le tausaga, pe le faasoasoa lelei malaga a vaa ina ia maua pea le avanoa o le mamalu o le atunuu, aemaise lava o le mamalu o le tatou atunuu o lo o fai mai atunuu mamao e fia malaga i Savaii, e maua ai foi nai seleni mo Savaii e ala i faletalimalo ma a latou mea e fia faatau. A o le tatalo lea lau Afioga i le Minisita. Sa matou omai ma le tina matua o lenei aiga ua lata i le

90 tausaga, e oo mai i Mulifanua ae saunua mai i latou o lo o tiute e feosofi uma i lalo e le faatagaina ona o i totonu o taavale i totonu o vaa. E ui lava ina faaaoaga e nai olomatuatua tootoo ma tulaga faapena, ae sa fai lava le finagalo o le aufaigaluega. Ua matou matau atu, e faapena foi le matutua o nisi o lo o i isi auala, ae ua faapena ona taufai feosofi uma i lalo ina ia faatino pea le finagalo o le kamupani vaa, ona muamua loa lea i totonu o le vaa ae mulimuli atu le taavale.

O le mea la ou te fia talanoa ai lau Afioga i le Minisita, ona o Savaii la, e le faasaina, sa feosofi lava i totonu o le taavale ma omai ai i le vaa. E le o tutusa la i lau matau le faiga, ae tatalo atu i lau Afioga i le Minisita, ua uma ona ou taua, e le o se faitioga, ae a uunai i ai ma faaleleia lea vaega o le auaunaga, faafetai, maua se viiga o le Alii. Ia, o le agaga lea e tau talanoa atu ai e uiga i le kamupani vaa, faamolemole lau Afioga.

O le auala lea i le aoga a le Kolisi o Aana Alofi Nu.2, ua i lumamea le talosaga a lenei Komiti i lau Afioga ma le tuualalo lava foi ia sa taumafai lava e faamafanafana atu i taimi uma ina ia e alofagia le auala o le Kolisi o Aana Alofi Nu.2. E le tu auala le aoga lea lau Afioga, e alu agai i tua, ae o le auala lea masalo e uma ane se aso ua fia selau tamaiti ma faleaoga, aemaise foi o taavale e fia o ai. O le taimi nei, na o pasi ma loli e mafai ona latou gafatia le tulaga o la e i ai le auala, a o tatou ma tatou taavale nei o e manumanu i a latou meatotino, ia e tu lava i tai ona savalivali lea i uta e fai le feau e finagalo ai e tusa ai o le aoga ma le faamoemoe o la e i ai, ona toe savali ae lea i tai i le aualatele. Ia o le tatalo atu lea i lau Afioga i le Minisita, ua i se tulaga ogaoga le tulaga ua oo i ai le auala lea a le aoga nei. O le auala foi lea e le na o se auala mo le faleaoga, e atufalega mai lava e tau i le faleaoga ma le alu agai i uta, o lo o faaogaina foi o se auala galue i nai ia pitonuu o Aiga i le Tai. Ia e tatalo atu lava i lau Afioga i le Minisita mo Galuega, Felauaiga ma Atinae Eseeese. A o i ai lava i lau Afioga i le Minisita mo Galuega ma le Matagaluega, e faatulou atu lava o nafa lau Afioga ma le tele o nei galuega, ae pei lava ona tatalo atu e taatia atu pea i lau Afioga e fai i ai lau faasoasoa.

O le kolosi lea e i tai i le taulaga, e alu atu i luma o le flea market po o fale foi nei i talaatu i le flea market fou lena ua fai ai i le mea sa i ai le faleoloa o faatoaga, agai i le fale lea o le NPF Plaza, ua avea pea ma popolega lea kolosi. Ta te alofa i leoleo aua e tutu ai lava leoleo, ta te alofa i le atunuu, ae ta te alofa foi lava i avetaavale ma e feoai i auala, aua o le matua le sefe lava o lea tulaga e tino mai i le kolosi lea lau Afioga. O le isi kolosi la e i tala mai o le RSA, ua fai lava si taumamao, ae le taitai ona mapu le kolosi o tagata, leaga o le taunuuga o pasi uma i Upolu nei, ma e faimalaga mai i Salafai, e taunuu lava i Savalalo i gatai ane o le flea market, o le ala lea e le motu ai le kolosi lea. E kolosi pea i taimi uma taimi uma faalauaitete. E tatalo atu ai i lau Afioga, se i fai se fua i le vaega lea, ae o le a fai foi moli, e alofa foi i taavale e felataai foi moli. A le mafai ona fai i lalo, ia silasila i luga po o se isi faiga, e mafai ai ona kolosi faaauau pea tagata, ae mafai ai ona alu faaauau taavale. E pei o le ala lea o le tatalo i lau Afioga i le Minisita.

Ae ou te le i see ese ma lau Afioga, e momoli atu lava le faafetai i le tele o galuega lelei ua faatino ma tele le mau reforms o lo o faatino, o le faaleleia o le auaunaga. A o i ai lau Afioga i totonu o le faatinoga o ia faiga lelei uma, ou te tatalo atu i lau Afioga, le Faalapotopotoga o Malosiaga Faa-Eletise le EPC, e a, e le i toe silasila lau Afioga, 50 iunite lea o lo o entitle i ai tatou nei o lo o nonofo i aiga, domestic users, a uma loa le 50 iunite lea ona mei atu loa lea i

le rate lea e i ai commercials users. O le tatalo la i lau Afioga, ai se i vagana o se ulugalii ma se la faleoo ma se matauila se tasi e uma ane le masina o i ai lava le 50 iunite lea po o totoe sina vaega. A o le uiga lava o le tatalo, aua o lea e alualu pea i luma le soifuaga, e tele foi le mau kamupani ma le mau konekarate lea e tatou te silasila i ai lau Afioga ma le Malo e sapalaia le tatou iunite.

FOFOGA FETALAI: Ia, malie le sui usufono o lo o saunoa se i tuu atu le avanoa i le Minisita mo Galuega, Felauaiga ma Atinae Eseese. Tulai mai lau Afioga i le Minisita.

Afioga Hon Manualesagalala Enokati Posala: Faafetai lava mo le avanoa i lau Afioga. E leai o lea lava e saausi lava ma faalogologo ma faamau i lalo fautuaga o lo o tuuina mai. O mea uma lava ia o lo o agai i ai, e le gata i le Pulega o Felauaiga i Luga o Alatele, ae ou te iloa o le faafitauli lea e i le kolosi lea e pei ona aumai. A fua i moli ia ma luma o le RSA, o se va latalata, ae le o mafai ona tausia e tagata le feoaiga i i. A o tulaga ia ua mafaufauina ma le faanoanoa, o lona uiga a toe i ai se isi kolosi faaopoopo i le ogatotonu, ia ua sili ai ona tutu taavale ae feoi tagata, a o fuafuaga lava na o lo o taumafai i ai, ona o tatou tagata lava e le o logosaia le tulaga o la e i ai Tulafono ma savavali ai, ae o la e taumafai lava i le auala faigofie e kolosi ai lea vaega, ae o lo o faaauau lava le silasila i ai a le Pulega ina ia faaleleia.

Na pau lava le mea o le tulaga ua ou tulai atu ai o le tatou eletise, o le tau o le eletise i le 50 iunite i lalo, e i ai lona pau, o le tulaga lea tau domestic. E ova atu loa i le 50 iunite, ona i ai foi lea o le suiga pei ona i ai tatou tau ia sa faatulagaina. O lona uiga o lo o amanaia lava i latou o lo o mauualalo le faaogaina o le eletise, ae faapena ona faatulaga le tatou tau o lo o i ai. Ma le faaloalo.

FOFOGA FETALAI: Malo le fesoasoani i le sui usufono. Tulai mai le sui usufono e faaauau le saunoaga.

Afioga TAEFU LEMI: Faafetai. E pei ona ou tuualalo i le kolosi lea, a le mafai loa ona fai i lalo, vaai se isi faiga po o luga po o se isi faiga e mafai ona fai i ai. Ae taatia atu pea pei ona saunoa lau Afioga i le Minisita, o lo o fai a outou saililiga ma silasila pea i ai i le mataupu lea.

O le a ou see atu i le Minisita mo Aoga, Taaloga ma Aganuu aemaise foi o le Matagaluega. E momoli atu pea le faafetai aua e le natia o lo o faaauau pea faiga lelei o faatino ai tatou aoga i le tulaga lea e oo mai i le taimi nei, o lea ua tatou matau atu, o lo o i ai lava nai fesuaiga o fai i le Tausaga 8, aemaise o suesuega ia na faatino ai seia faatinoina suega. Faafetai ua mafai lava ona fai i Samoa nei suega e le gata o le School C, a o le SSLC, po o le PSSC lea sa fai i Fiti. Ia, ae o lea ua mafai lava ona fai e tatou a tatou suega. O le mea lea e momoli ai le faafetai i lau Afioga. Sa ou manatu e faasoa ma lau Afioga aemaise foi o le Matagaluega, aua o au nei e galue i Komiti Aoga, Komiti Aoga mo Tulagalua, Komiti Aoga mo Aoga Mauualuluga. E le tutusa le maopoopoga e maua e le Komiti Aoga o le Tulagalua la e tasi le afioaga, la e tasi le faamalumaluga a le nuu ma Aoga Mauualuluga lea e fia itumalo pe fia foi nuu o la e i ai.

O le uiga lea o se faamatalaga e tataua ona agai i ai se fua a le Matagaluega aua e tainane lava o le tatou naunau, ae le tutusa o outou finagalo ma o tatou manatu, ma le finagalo foi o le toatele o nisi o lo o tofia e galulue i ia komiti. O le tulaga lea e i ai nei, sa maua lava seleni sa taulima e o tatou komiti aoga, ae talu nei ona fai le mea o le school grant, ia ua itiiti lava se seleni po o le leai foi lava o se seleni o toe maua e komiti. Ua amata ai foi la ona faatutugata ia komiti nei e agai mai e faatino ia galuega e masani ona nafa ma komiti.

Ua masani foi le tatou Matagaluega i le pese lea, ua leai ni pili aoga, ua leai ni pili aoga, le tataua ona le toe aoga tamaiti. Faafetai lava ua ou matau i lo matou itumalo, ua aoga uma tamaiti, faafetai i le vala lea ua faapea mai, tusa lava pe leai se pepa fanau, alu pea i le aoga, faafetai i le vala lena, aua o i ina na ou matau ai, ua i ai foi ma isi ua omai i le aoga e leai ni pepa fanau, ae na ala ona le omai i le aoga, ona o le leai o ni pepa fanau. Ae o le tatalo lea i lau Afioga i le Minisita, se i vaai po o le a se faiga ina ia lelei ai ia effective le faatinoga o galuega a komiti o aoga, aemaise lava aoga ia maualuluga, aoga ia e valaau atu le fonu, ia e pue le pasi e alu ai i le fonu. E pei o aoga tulagalua lea ou te talanoa atu o lo o mafai lava ona gafatia, ona o lo o i ai le faamalumaluga a le nuu, a o le aoga lea kolisi maualuluga, ia e fia nuu la e i ai? e fia pulega faamatai la e i ai? ia e tele foi itumalo ia ma faapena ona faigata ona maua se maopoopoga. E leai ma ni tupe e toe aoina ona o lea ua fai le school grant, ia ma faapena ai lava ona faapeapea atu le komiti. O le agaga o le talosaga lau Afioga i le Minisita, se i toe silasila lava po o le a se faiga lelei. Na maua i saunoaga a nisi o le Maota, i sina alauni foi nei mo nai komiti, ia pe le taofi loa ia komiti ae fai ni board pei o le tele o....e tofi atu e a outou Afioga ma tofitofi solo mai totonu o le itumalo ina ia mafai ona ausia le manaomiaga lea e moomia ai e le Matagaluega i mea nei o komiti. Ae pei o lau lea tuualalo ona a masani tele foi tatou i le mea lea e leai se pili aoga, e toe fai atu le komiti e ao mai le tai \$10 mo school fund, ua matuai faatutugata lava matua i lena mea.

O le mea la lea ou te aioi atu ai i le Matagaluega, se i silasila i le faiga o tatou faasilasilaga ma tau tuu avanoa foi i nai pili laiti ia, aua o le building maintenance ma mea faapena, e le o talia e matua, e le taliagofieina e matua talu ai le pese lava lea, leai ni pili aoga, leai ni pili aoga. E tele le luitau lea e feagai ma tatou komiti i tua, le taumafaiga o tatou kolisi ia, e tatalo atu ai i lau Afioga ina ia toe silasila pea i ai po o le a se faiga e sili ai ona lelei i le faatinoga o aoga ia.

Ou te tatalo atu i lau Afioga aua ua i lumamea le talosaga a lena kolisi o Aana Nu. 2, na tatou mafuta ina ua tatala le hall a le aoga, o le hall lea na fai i le 2011-2012, ae na fai i se nonogatupe, ia o le silasila a le Faletupe o Atinae o lea lava e manaia le talosaga e 500 tamaiti ma a latou pili aoga lava lelei ai se vaega i meaaoga, lava se vaega e fai ai le faleaoga ma mea o faaletonu ia ma alu se vaega i totonu o le nonogatupe lea, o le 2013, alu atu loa le school grant, leai ma se tupe e toe maua e le komiti, le mafai e le komiti ona totogi le loan lea. O le ala lena o le tusi lea na tuuina atu i lau Afioga, e tatalo ai mo se...toe silasila lava po o le a se faiga, aua o le tupe lava lea e tasi o le pili aoga lava lea e tasi lea sa tatou toomaga i ai e fai ai meaaoga, fai ai ma faleaoga ma mea faapena o mea e fia faaleleia, o mea fai a le aoga, ae ina ua fai loa le school grant, ia o le mea lea ua tupu, ia ua saisai lona faaaogaina, ua le mafai ona matuu mai e faatino ai se isi mea – ma le maua ai se toomaga o

lenei komiti aoga i le nonogatupe lea e pei ona ou talanoa i ai, ae taatia atu pea i lau Afioga, ou te talitonu o le faigata lea e i i, ona o lea lava e aafia Niu Sila ma Ausetalia i le faatinoga o le tatou school grant, ae.....

FOFOGA FETALAI: Malie le sui usufono o lo o saunoa, se i tuu atu le avanoa i le faamalamalama a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o le faigofie ia o le mataupu lea e laga mai, o le faigofie o le mataupu, o le tofi o tagata faatuatuaaina e i ai i totonu o komiti, e i ai foi komiti o le matou kolisi, o la e lava a matou tupe e fai ai a matou gaoioiga e moomia, ae o le mafuaaga, ona o lea e tofi mai e nuu a latou sui o tagata faamoemoeina. E lelei la ona tofi ane aua o le mea lea sa i ai i le aoga lea, ia e i ai isi sa tofi atu i le matou nuu o Fasitoo muamua atu, o lea la ua matua manaia lava le sui la e i ai nei. E mafua ona tulai mai faafitauli ia, ona o le tofi o tagata e le lelei, a o le tulaga foi lena e i ai tatou, e taumafai ina ia uunai le tulaga lea aua le ola faalagolago i le Malo.

O lea o le a oo lava i mea e le tatau ona taua o faalagolago mai lava i le Malo, ae tatau foi ona tele se sui, afai o lea ua tele lea faamama avega, ia taumafai ane tatou e fai se tatou galuega, ae le o le fai ma faalagolago mai, faalagolago mai, faalagolago mai, a o tagata o nuu. Ia o le a toe o atu foi la e toe avatu tupe e totogi ai alauni oi a latou fanau, o lea ua tele le faamama avega lea e avatu, ia e tatau ona taumafai ia nuu e tofi ane tagata e faatuatuaaina e latou te faia tonu ma aua le tuua le tulaga, e oo foi i lo matou nuu o Fasitoo, a i ai lava ni mea e moomia, e sau lava le sui tau mai i le fonu a le nuu, ia ona fai lea o saogatupe e avatu e fesoasoani ai. E le faapea o le a tupu ane lava sia tamai mea, laga mai i i le Matagaluega o Aoga, o fea la e laga i ai le Matagaluega o Aoga? O lona uiga e toe laga mai i i le Matagaluega o Tupe a o lea e tau saili atu ni seleni e faatino ai mea ia fai mai ua taugata tele? Aua e leai lava se isi mea e agai loa i ai o le agai loa e tuu i luga ia tau o mea nei o tautua.

E pei o le tuualalo lena, aua e le faapea na o lo outou foi itumalo o lo o i ai ia komiti, o lea e tofi uma lava tatou ma tatou komiti.

FOFOGA FETALAI: E faasao lou taimi le sui usufono mo Falelatai ma Samatau, se i tulai mai le Minisita mo Aoga, Taaloga ma Aganuu.

Afioga Hon Magele Mauiliu: Faafetai i lau Afioga i le Fofoga Fetalai mo le avanoa. O lea ua saunoa atu le Afioga i le Palemia i le taua o le mataupu lea.

Ua ou tulai atu ona e mau eseese ia le tele o komiti i mea nei. Sa i ai le matou fonotaga sa fai i le tausaga na tea nei, sa talo ai komiti uma lava o aoga e omai, sa i ai la le manatu faapea na faatu mai e isi komiti ae tetee i ai isi, fai mai e fai ni o latou alauni, ae fulisia lava le fonu, e leai ni alauni e le tatau ona faia lena mea o le tautua e ofo fua. E le aofia la matagi i le manatu o le sui usufono mamalu faapea ua le mafai ona fai ni galuega ona e tatau lava ona i ai ia alauni, ae le o le tulaga lena o lo o i ai a tatou komiti, o le tele ia o komiti o la e galulue malosi ma faamaoni. O le Aso Gafua na ou faalogologo ai i le pepa a le Taitaifono a le komiti o aoga i le nuu lea o Faleula, maumau pe ana i ai so outou avanoa e faalogologo i ai, o le manaia ia o le komiti lea,

a, faataatia lelei a latou plan o fale, o a latou lava sailiga tupe, o lipoti e ave i nuu, ma manaoga e ave i nuu, tali mai le nuu, o le manaia ia, e le faapea la o aofia uma ai ia komiti i le manaoga lea, pei lava ona ou fai atu, sa fai le matou fonu, e fulisia uma lava, tuu na mea o alauni. Peiseai o le fesoasoani atu lea i le tulaga lea, faafetai lava.

FOFOGA FETALAI: Malo faafetai. Tulai mai le sui usufono mamalu e faaauau le saunoaga.

Afioga TAEFU LEMI: Ia e faapena ona faataatia atu i luma o lau Afioga ma le Matagaluega. O le naunautaiga, ia valaau le fonu a komiti ma agai mai komiti, o nisi o komiti o aoga maualuluga, e feosofi i o latou auala ma omai i le mamao lea e fai ai le fonu, e le savalivali mai pei la o totonu o le afioaga lava i le aoga tulagalua, ae pei o lena lea e tau auala atu ai se manatu. O le nonogatupe lea ou te talanoa atu ai, ia ou te le o talanoa atu foi a mea fesoasoani mai le Malo, o lea ou te talanoa i pili aoga na mafua ai ona talia e le Faletupe o Atinae le nonogatupe lea la ua le toe maua e le komiti ma faatino ai ia le faatupeina o le aitalafu lea. Ae pei o i ina lea e i ai se toatuga lea e taumafai nei e foia. Ua uma ona savalia e au nei ma le komiti afioaga uma lava i totonu o Aana Nu. 2 ma faatoai i ai le tulaga ma tatalo i ai, aumai sui, ua matutua sui o e faia upu o le nuu e fai ma sui o le nuu i totonu o le komiti, maua ai ma le lagolago lea tatou te manaomia, aua e moni lava au, e omai le nofo a suafa i totonu o komiti, ona le maua loa lea o fesoootaiga ma e o lo o faia le nuu, ae pei o le agaga lena o lea na i ai. Ou te manatu au ia ona o le manatu sa laga i alauni ia, ae leai pei ona ou fai atu na ona taatia atu pea i ina, e sau i ina le atoaga o le faatupeina o le vaega lea. E uma ae la le tausaga faaletupe, e feoloolo lava ni nai afe la e i totonu o le matou school grant, ae tuu ai lava i totonu o le school grant e carry on i le isi tausaga, ia ae feoai lava le komiti e tau saili sina seleni. A o lena foi paleni e totoe, se i mafai ona aumai se i ave agai i le Faletupe o Atinae i le nonogatupe lea. Ae pei ua mafua ona ou talanoa i ai, ona o le faigata lea e i ai nei, e i ai foi ma le lisi o le fanua o lo o tu ai le faleaoga lea foi e faamoemoe mai e totogi e le komiti, ia ona faapena foi lea ona faliu le komiti agai i afioaga ia e fai ma sui i totonu o le aoga, ia ae o lo o i ai lava nai luitau na, ae o lo o fai pea i ai le galuega i le taimi nei, a o le luitau e ao ona silafia, e ao ona outou silafia le tulaga o lea e i ai, ae talosia ia vave mai se aso e mei ese ai Niu Sila ma Ausetalia mai le faatinoga o school grant e fai lava e le tatou Malo, ona maua loa lea o le soalaupule lea e omai nai komiti e mafai ona outou saunoa mai, o le taimi nei, ia pei o lea lava e taitaiina i tatou e manaoga mai Malo ia e faatinoa le school grant.

O le a ou see atu i le Matagaluega o le Soifua Maloloina lau Afioga i le Fofoga Fetalai. Ou te tatalo atu i lau Afioga i le Minisita mo le Soifua Maloloina aemaise foi o le Matagaluega, ua uma ona taatia i lumamea le talosaga a lenei itumalo i lana tamai falemai foi lea sa i ai i tua, ia pe mafai ona toe fai, a o taimi uma lava ou te talanoa ai i le falemai lea, ou te faaogaina lava le masini lea e manava ai le fanau laiti o le a momole, ina ia maua ai se toomaga i i i totonu lava o le itumalo, o le mea lea e i ai, o le masini lata mai o la e i o i Leulumoega po o Faleolo, ae ua lua nai maliu po o nisi o le mamalu o lenei itumalo, e lua lava maliu o e matutua ia ma e foi sa tusi matuaina i totonu o lenei itumalo e aofia ai ma le ositaulaga se tasi o

Moseniolo sa galue i lenei itumalo e fia maua se ea, ua le atoatoa le tamai pamu foi lea e faaoga, ia ona tuli loa lea o le taavale agai i Leulumoega po o Faleolo, e le i oo i ai i ina ae ua to le manava, o nei lava i le faaiuga o le tausaga na tea nei, sa toe tupu ai foi i se tasi o faletua, ia sa tausialii i se tasi foi o pou o lenei aiga Tauaana, ia o lau lava lea tatalo lau Afioga, ia maua sina avanoa se i silasila ane lava i le talosaga a lenei itumalo, o la lava e i ai nai fale la e i ai i tua ae o nai auaunaga ia e faasaoina ai le soifua ma le ola o le mamalu o lenei itumalo, e tatalo atu i lau Afioga i le Minisita se i silasila ane lava i ai.

E fesootai lava lau talosaga i lau Afioga ma lau Afioga i le Minisita mo Punaoa Faanatura ma le Siosiomaga, ona o lo o i ai le talosaga foi a lenei itumalo ua leva ona i lau Afioga, o lea foi ua oo mai le tali a lau Afioga e tau lava ina ou faamanatu atu, aua o le tausaga lenei lea na tuu e faatino ai, ae o le taligalu i le nofoaga tonu lava o lea e i ai le falemai, a faatino nei le falemai e manaia pe a alu atu ma le taligalu lea na matou talosagaina ia ma fai mai foi i ai le faaiuga a lau Afioga i le Minisita, ia ae fia faamanatu atu lava o lea ua matou faatali mai i le taimi e afio atu ai foi pe afifio atu le Matagaluega, ina ia matou galulue loa e faatino nai ia vaega.

E pei o nai manatu ia e taatia atu pea i luma o lau Afioga i le Palemia ma le tatou Kapeneta. Lau Afioga i le Minisita mo Faatoaga, Faleoloa o Faatoaga ma Faigafaiva, sa ou i Niu Sila i le faaiuga o le tausaga ma le amataga o lenei tausaga, e momoli atu lava le faafetai i le tatou talo, o lea foi ua saunoa le Maota, ae o lau lava tuualalo, se i tautuana aua lava ne i tuua le mataituina o le talo e ave, mataitu, mataitu, o le manuia lea e le aumaua, o le manuia sa lilo, o lea ua te i ua tatou aeaie ai. O le uiga la o lau fautuaga, ina ia tatou tausi loa lea maketi ua maua, ia toe feosofi atu atunuu ia sa taulamua a ii ia oloa, talo ma tulaga faapena, a ua mautu le tatou maketi ia tatou. O le agaga lea e tatalo atu ai lau Afioga, e i ai lava foi le fue lea e fai ma taua e le Maota. Ae ua ou vaai ma le faanoanoa i le tele o niu e tiga le maualuluga, ae fili lava le fue ina leai se moemoe. Ou te le iloa po o le a se fua o fai i ai e le Matagaluega, ae ua matou taamilo i Savaii faapea foi Upolu nei, o le tulaga lava lena o lea e vaai, po o tuufua nei fanua po o nei tulaga, ae tataua ona fai i ai se fua a le Matagaluega i le fue lea ta te vaai e filia laau, o laau aoga ma le maualuga e pei o le niu, ae fili lava ina pe le niu, tulou le Maota.

Lau Afioga i le Fofoga Fetalai, faafetai tele mo lou avanoa, ia manuia le faafofogaaga a Samoa, manuia le faafofogaaga ma le tapuaiga a si ou itumalo. Ia manuia le Fono.

FOFOGA FETALAI: Malo faafetai saunoa i lau Afioga i le Aiga Tauaana, Falelatai ma Samatau.

Ia, le Feagaiga, ou te iloa o lena ua faasolo mai le tatou laina lena. Tulai maia le sui usufono mo Aiga i le Tai ona faasolo mai foi lea i le isi Feagaiga i le Vaa o Fonoti. O lea ua amata ona sasau ma tata le tatou Komiti o Tupe.

Susuga IFOPO MATIA FILISI (Aiga i le Tai): Faafetai lava i lau Afioga i le Fofoga Fetalai, malo faafetai mo lou avanoa. E muamua foi ona faatalofa atu i le Afioga i le Palemia faapea foi le Kapeneta. Faamalo lava i galuega fai o le la tausaga, o lea foi ua amata lenei tausaga po o le tausaga mulimuli foi lenei o lenei Paeaiga, ia, e faapena.

E muamua foi ona faafetai, faafetai i le Minisita o Tupe faapea foi le Matagaluega o Tupe mo le Tala Faatatau Faaopoopo o le Tupe mo leni tausaga. Faamalo lava, ae se i ou liliu ane se i faapena ona faatalofa atu ma faamalo atu i Lana Afioga Mamalu O Le Ao o le Malo ma le Masiofo, faapea foi le Sui Ao o le Malo ma le Masiofo, le Faamasino Sili ma le Vasega o Faamasinoga, faamalo.

E faamalo atu foi i Ofisa Sili o Pulega ma Pule Sili o Matagaluega ma Faalapotopotoga, faamalo mo la outou galuega ua fai, e pei lava foi ina malie i le faalogologo i nisi sui usufono, faamalo ona o lo outou sao tele o lo o faia i le tatou Malo e ala lea i la outou tautua i Matagaluega eseese.

E liliu atu foi e fai se faamalo i le tapuaiga a si ou itumalo, afai foi o le a so tatou leo ua mafai ona ave e lo outou sui usufono mo le Tala Faatatau Faaopoopo o leni tausaga, ia, mo le tapuaiga, le tapuaiga lava lea i le susu o le Toafa ma le Toalua, susu o Leiatauaalesa ma Leiataualetaua, susu lau susuga Mulipola ma Taupau, lau tofa Futi ma Auapaau, faamalo. E faapea foi i si ou nuu i Apolima i le susu o le Aiga Sa Sau ma Sauma. A ou liliu mai foi i si ou nuu o lo o matou faatasi pea i Mulifanua, faamalo lava le tapuai, faamalo i le susu o Alo o Malietoa, susu foi Fuaolefau ma le Pouli, faapea foi le Usoalii ma si o tatou aiga, le tofa ia tuua ia Vaatiuola ma Ati ma Lautolo. Faamalo mo le tapuaiga. Ia, e le tele foi se lauga a leni sui usufono.

E muamua lava ona avatu le faamalo ma le faafetai i le Aiga Kapeneta po o Minisita uma lava o le tatou Maota nei. Faamalo foi i le galuega fai, ae leai lava se lauga tele po o se faamatalaga a leni sui usufono, aua ua uma lava ona faapena ona tusi atu i mataupu uma lava o leni itumalo, e ala eseese i auala, o eleele, faapena foi le vai. Ae tau ina ou faaleo laitiiti pea i leni avanoa ua ou maua e momoli atu ai i a outou afioga se manaoga tele o leni itumalo. A ou amata i le faamatalaga i le eleele, faamalo i lau Afioga i le Minisita. E talitonu lava o lo o i ai avanoa e mafai ona tatou feiloai ai i se taimi o i luma. Faafetai i le tali mai.

O tatou auala, e muamua lava ona o le faamuamua, ua faapena foi ona saunoa le sui usufono mo le Aiga Tauaana e faapena ona matou o faatasi i le faiga o le Kolisi o Aana Alofi Nu.2. O lea e momoli atu ai le faafetai tele i lau Afioga i le ua faatoa uma ona sausaunoa lau Afioga i le sui usufono mo Falelatai ma Samatau. Faamalo lava. Ou te lagona foi e le toe faasili pe tele se faamatalaga o lea lava ua e momoli si a ta aoga i Aana Nu.2, pei ona talanoa ai, o leni aoga ou te talitonu toeitiiti lava tolu i le fa itumalo o lo o taufai galulue i leni aoga i le Kolisi o Aana Nu.2 faapea foi le Kolisi o Aana Nu.1. Ou te tatalo atu i lau Afioga i le Minisita mo Galuega, Felauaiga ma Atinae Eseese faapea foi le Minisita mo Aoga, Taaloga ma Aganuu, tau lava na toe faamanatu atu le auala lea i le faleaoga mo Aana Nu.2, faapea foi le aoga i Satuimalufilufi, ma Mulifanua. A maua foi se avanoa e mafai ona molimauina ai, ua matua faaletonu lava auala nei. Afai foi lava e le o maua se tatou ta e tusa ai foi ma manaoga ma talosaga, afai o maua atu se masini tau lava ina faalaulelei mo le agai o alo ma fanau i aoga ia. O le tatalo lea lau Afioga i le Minisita e tusa ai ma auala.

O lea foi ua momoli le faafetai i lau Afioga i le Palemia, sa manaomia foi le tatou feiloaiga, ae faafetai ua tali mai e tusa ai ma le auala i Manonotai. Ia ou te talitonu e le faatusatusaina Manonotai i auala galue nei, aua a fua lava i ai, a uma loa se auala i Upolu, fai se auala i Savaii, faamolemole, talia loa ma le auala i Manono, o le isi lea motu. Ioe. O lea e tatalo atu ai le sui usufono,

faamolemole ia vave ona fai. Ae faafetai o lea ua uma ona fai le survey, ae o le a talitali mai lava le Toafa ma le Toalua i le auala lea i tai.

O lenei itumalo e fitu pitonuu pe fitu nuu o lo o moomia auala. O lena lava ua avatu le talosaga, afai e amata atu i Mulifanua, lelei, afai foi e amata mai Salua, lelei. A o pitonuu e fitu, o Salua, Faleu, Lepuiai, Apolima, Lalovi, Fuailoalo, o nuu uma na. Ou te talitonu foi ua faalogologo ma le totoa i nisi o saunoaga a sui usufono ua uma ona sausaunoa ae matau lava pei e tasi le auala o ia itumalo, o itumalo laiti ia. A o lenei lava e tatalo atu lava le Feagaiga po o le Aiga i le Tai faamolemole, i lenei Paeaiga, se i fai se auala, e leai ma se auala ua faia o lenei itumalo, ou te le iloa po o anafea na gata mai ai le faiga o se auala galue i lenei itumalo. O le mea lea e tatalo atu ai.

Faafetai i Afioga i Minisita uma lava e ala atu i talosaga taitasi ua tali mai, ae faamolemole, o lenei o lea uma le Paeaiga, ae o le a lava so outou finagalo, se mea se tasi e tau ina faatino ai galuega o lenei Paeaiga mo si o matou itumalo.

Ona oo mai lea i le Suavai, o le vai, o lau tatalo lava, e lelei uta ia matou i Mulifanua, Apolimauta ma Manonouta, a o le tatalo lava i lau Afioga i le Minisita faapea foi le Pulega o le Suavai, lau Afioga i le Pule Sili o le Pulega o le Suavai, ia manatua o si nuu la e i tai i Manono e manaomia tele le vai. Ua uma foi ona fai le vai, ua i ai le paipa ua alu atu i lalo o le sami e agai i tai i le nuu, ua uma foi ona tatala sa faapena ona faatasi atu i ai le Malo i isi tausaga ua mavae. A o le talitonuga o lou sui usufono, e le o faia i ai se galuega - maintenance po o le monitor o paipa ia. Ua i ai lava le mea lena e foliga mai na o Salua lava e oo i ai le paipa gata ai loa i ina, ae ua le aoga uma lava paipa sa faataamilo i le motu ona o le vaivai atu o le suavai. Ia o le a se fuafuaga foi sa faapena ona tatou talatalanoa ai ma tatalo atu ai, faamolemole e matua manaomia lava le vai i tai i Manono pe a faapea o le a oo i le vaitau o mugala ma le toe maua ai se suavai i tai. E leai se leo tele o lenei sui usufono e ala i Afioga i Minisita taitasi uma lava o le tatou Kapeneta, faapena ona momoli atu lava na o le faafetai. Ou te fia talanoa lava i si mataupu lea o le afa o Eveni, po o le Disaster Programme po o le Relief foi, ou te manatua na ma malaga ai ma le Minisita i tai i le nuu o Manono e fai mai se lipoti o le afa lea po o le matagi lea. Na i ai foi se aumalaga na matou o, pe maua se toasefulumalelua. Sa faapena lava ona sausaunoa atu le Afioga i le Minisita i le mataupu lea i le faaleagaina o faatoaga, aemaise lava le fai i tai. E leai se fale na faaletonu. Na pau lava lea o mea e lua sa faaletonu i aiga i tai, o vaa, e taua tele i tai i le nuu lea o Manono. E taua tele vaa e feoai ai i uta ma tai. Ua faapena ona saunoa atu le Minisita i le matou failautusi, ae uma ifo le polokalame lea, e saili mai, e leai ma se mea o lavea ai Aiga i le Tai i totonu o le polokalame lea, po o le faasoia foi lea. E oo lava, tulou lava foi le Afioga i le Minisita o Faatoaga, e le i oo foi i ai se....

FOFOGA FETALAI: Malie le sui usufono mamalu se i tuu atu le avanoa i le Afioga i le Minisita e a ia le mataupu tau aafiaga o le siosiomaga ma afa.

Tulai mai lau Afioga i le Minisita mo Punaoa Faanatura ma le Siosiomaga.

Tofa Hon Faamoetaulao Lealaiauloto Ulaitino Faale Tumaalii: Faafetai lava i lau Afioga i le Fofoga Fetalai. E leai se agaga e faalavelave a o saunoa le sui usufono mamalu. O lea ou te tau faalogologo atu po o fea tonu lava le mea o lo o agai i ai le saunoaga a le sui mamalu, aua o lea e taua vaa ma fai,

se i tulou lava le Maota. E pei o lalo o le Matagaluega o Faatoaga ma Faigafaiva, ae o lea la ou te le iloa po o fea le mea o agai i ai. O lea la ua ou tulai atu ai e tau fai atu se fesili i le sui usufono se'i tau faamalamalama mai le Matagaluega e fitoitonu i ai le saunoaga. Atonu o le mafuaaga foi lea e le o lavea ai i totonu o faamaumauga a le Matagaluega mo mea e ao ona faaleleia ona na faaleagaina i le afa o Eveni. Ma lou faaloalo lava.

FOFOGA FETALAI: Se i tali le fesili a le Minisita le sui usufono mo Aiga i le Tai.

Susuga IFOPO MATIA FILISI: Faafetai lava i lau Afioga i le Minisita mo Punaoa Faanatura ma le Siosiomaga. O le Minisita sa ma malaga i tai o le Minisita lea o Felauaiga, le Afioga ia Manua, tulou ua tau fua lou suafa. Ae ou te le iloa tonu i le polokalame lea faapea e i lalo o le fale o le faamalu po o le Matagaluega o Faatoaga po o le Siosiomaga, ae na pau lea o le tali na maua mai, e le o aafia ai Aiga i le Tai, na o se vaega i Falelatai faasolo atu i le itu lea i Sisifo. A o mataupu na, pei o vaa na, e moni ai lau saunoaga, o vaa i lalo o le Fisheries po o lalo o le Minisita mo Faatoaga ma Faigafaiva. E ese le taua, o lea lava ou te avatu, afai lava e oo i ai le faasoa, ia e taua tele le vaa, e pei lava o le fale, i tai i le asiasiga lea, atoa ai ma nai faatoaga laiti.

FOFOGA FETALAI: Ia, o lea la ua tulai mai le Minisita e foia le faafitauli. Tulai mai le Minisita mo Faatoaga ma Faigafaiva.

Afioga Hon Le Mamea Ropati (Minisita mo Faatoaga ma Faigafaiva): Lau Afioga i le Fofoga Fetalai faapea le paia o le Maota, ou te le i tu lava i luga sa ou faalogologo se i uma mai pea le saunoaga a le sui usufono mamalu. Ia, o le tulaga lava o le mataupu lena, e sao sa i ai le lisi, masalo e le o le Minisita lea, o le Minisita muamua lea sa i ai le afa lena, o le lisi la sa i ai uma lava e le gata i Upolu ae faapea uma Manono. O le fuafuaga sa i ai a le donor po o e sa aumaia tupe e pei o le FAO, toe alu lelei lava, e ese lava mea e tusi mai i asiasiga ia a tatou, ae toe alu lava le okikaina o mea ia pe sao. O le lisi lena e fai ai, o afi o vaa, o vaa na faaleagaina ia ma vaa ua matua write off, o vaa la sa omoomo, vaeane lava le paia, sa toe fonofono lava ma toe fai, vagana la mea o afi ia sa maua lava afi fou sa tufa atu i tua, ia ae o le tulaga tonu lava na, ia o mea masani lava, a alu atu le asiasiga alu ifo lava le tagata tusi mai ia mea ua leaga lea ma lea, ae manatua la, a alu atu la le saililiga lea a le okikaina o mea pe sao, o le lipoti sao la lena, o le lipoti la lena na mulimuli ai le Matagaluega ia ma fai atu ai fuafuaga ia e i ai fishing gear po o mea fagota, o afi o vaa, o afi omoomo, o afi o vaa na leaga, o mea uma lava faapena. Ia pei o le tulaga la lena e tau fesoasoani atu i le uso nei ma lana saunoaga, ne i te i ua faapea mai e le o i ai ni mea o faaletonu, ae leaga sa alu lava le okikaina o mea ia alu ai ma le sui o le vaega lea e maua mai ai tupe e faatino ai mea ia. O lau fesoasoani atu lea ma le faaloalo lava.

FOFOGA FETALAI: Malo faafetai, e faasao lou taimi, se i tuu atu le avanoa i le Minisita mo Galuega, Felauaiga ma Atinae Eseeese, tulai mai le Minisita.

Afioga Hon Manualesagalala Enokati Posala: Lau Afioga i le Fofoga Fetalai faafetai lava. Leai leaga o lea sa taua sa alu le ma asiasiga i tai, ia a o le agaga foi lea sa i ai o le faafetai e le i tele se afaina o tai i le motu, o la e manino, o le ala foi lena o le leai o se lipoti sa faia, ona o la sa saogalemu, a o le faasolo atu lea i Lefaga, Falelatai ma Safata e tele faatoaga ma tulaga sa i ai faaletonu, a o tai lava i le motu ia, i Manono Tai e pei lava o Savaii sa saogalemu i le taimi lea o le Afa o Evani i le 2012. Ma le faaaloalo.

FOFOGA FETALAI: Masalo o sa oulua taga palolo lea. Tulai mai le sui usufono mo Aiga i le Tai e faaauau le saunoaga.

Susuga IFOPO MATIA FILISI: Faafetai, faafetai lava i le Afioga i le Minisita, leai o le sui usufono foi lenei e faamaoni lava. O le mea muamua o le Afa lea o Eveni lea e i ai le lipoti lea e tataua ona ou taumafai atu ai, o le agai atu foi i tai i le motu lea, pei lava ona ou fai atu, e le leaga tele e leai se mea na leaga tele, a o vaa nei, na matua afaina lava i le matagi ma ato i uta vaa ia e lua i tai i le nuu lea o Apai, ma sa silasila foi i ai le matou faigamalaga lea. Ae afai e leai se mea e faia i tai i lo matou itumalo ia po o nuu ia e le afaina, e le afaina foi, pau le mea ia malamalama ia o se auaunaga a le Malo faapena foi lo tatou atunuu ia faasafua uma i itumalo taitasi ma nuu taitasi, e pei o le agaga lena, ae moni lava le lipoti lea i mea ia, ne i te i ua faapea se isi e le taulia vaa ae taulia fale ma laau, ae leai o vaa e ese le taua i tai i le motu i tai i Manono. O le a ou alu ese ma le mea lea lau Afioga i le Fofoga Fetalai, faafetai lava.

Ou te avatu lau faamalo tele i le Afioga i le Minisita mo Galuega, Felauaiga ma Atinae Eseele ona o le mea lea sa ou lauga ai i le uafu lea i Mulifanua i le saogalemu o tagata feoi, pei ona i ai le faiga lea ua i ai nei ua ou vaavaai i ai, faafetai lava, faafetai foi i le Pule o le Shipping le Afioga ia Papalii i le faafoeina o laina kolosi ia ma faapena ona agai uma atu taavale i le pito i tai, ae ua le toe faapena ona poloka ai le auala i le pito i uta i le agai lea i Falelatai. O le mea lea e avatu ai le faamalo tele i le Afioga i le Minisita, faapea foi le auaunaga le tautua a le Ofisa o Vaa. O sau tuualalo ona faauma ai lea o sau faamatalaga e tusa ai ma lou avanoa, ou te toe pipii atu lava i le tuualalo a se isi o sui usufono mai le motu i Salafai ona o faalavelave o lo o tulai mai i Matagaluega, pei ona tolauluina foi Matagaluega taitasi. Ia o lau foi tatalo ma tuualalo atu i le mamalu o Faauluuluga o Matagaluega ia o lo o i ai le risk ia po o i ai ia faalavelave o lo o tulai mai ai, aemaise lava le EPC o le Pulega o le Suavai ma isi foi tautua a lo tatou atunuu, e ala eseese lava, ia aua lava ne i faavaivai i le faiga o le polokalame lea o le safety, ioe safety o a latou galuega fai, e le gata foi i lena o facilities e latou te faaogaina, e taua tele i auaunaga aua le tautuaina o le tatou Malo e ala eseese i le mataupu lea.

Ia o sau lea tuualalo i lou avanoa ua maua, e momoli atu le faafetai tele lava i le Tama o le atunuu po o le Susuga i le Taitai o le Malo, o a outou Afioga i Minisita, e faamalo foi i lau Afioga i le Taitai o le Itu Agai e Agaia le Malo faapena foi la outou itu, malo, faafetai. Faafetai i lau Afioga i le Fofoga Fetalai, ou te faafetai foi i le tapuaiga isi ou itumalo, manuia le Fono.

FOFOGA FETALAI: Malo, malo faafetai saunoa i le sui usufono mamalu mo Aiga i le Tai, ia o le sui lava lea aua le malelega momoli a lo tatou itumalo o Aiga i le Tai.

Ia tulai mai lau Afioga i le sui usufono mo le Vaa o Fonoti, sui foi o le tatou Komiti le Vaa o Fonoti, ua avanoa le Maota mo lau saunoaga.

Afioga TIALAVEA FEA TIONISIO SEIGAFOLAVA (Vaa o Fonoti):

Faafetai i lau Afioga i le Fofoga Fetalai mo le avanoa o lenei itumalo. E muamua ona faatulou atu i lau Afioga i le Fofoga Fetalai, faatulou atu foi i le Afioga i le Palemia, le Sui Palemia ma le paia o Minisita, faapea foi le afio o le Taitai o le Itu Agai, Sui Taitai ma lena itu, aemaise foi le afifio o Minisita Lagolago, aemaise Faauluuluga o Matagaluega ma Faalapotopotoga Tumaoti a le Malo ua tatou faatasi i le tatou Fonotaga i lenei itula afiafi.

E faatulou atu foi i le faafofoga mai a Lana Afioga Mamalu, O Le Ao o le Malo, Afioga Tupua Tamasese Efi ma le Masiofo, aemaise foi o le Sui o le Fono a Sui Tofia ma le Masiofo, le Faamasino Sili, Alii ma Tamaitai Faamasino ma le paia o le Ofisa o Faamasinoga. Aemaise foi lou itumalo o lo o faafogafoga mai, tapuai maia ae se i fai se sao o le tatou itumalo i lenei foi Tala Faaopoopo o le Tupe.

Ae le i fai atua ni manatu aemaise foi o ni fautuaga, e lagolago e le itumalo lenei o le Vaa o Fonoti le Tulafono Tau Faaofi o le Faatatauina o Tupe Faaopoopo (Nu. 1) 2014/2015, ona o lo o matou i totonu o le Komiti o Tupe. O manatu foi ma lagona ua uma ona faataatia atu i le matou Lipoti ua faataatia nei i le Maota Fono. E pau lava le agaga e tulai atu e fai se manatu e le umi foi, ona e tataua lava ona avatu se faafetai i le Malo, aemaise o Matagaluega ma Minisita ma Faauluuluga o Matagaluega.

E muamua atu se faafetai i le Afioga i le Minisita mo Galuega, Felauaiga ma Atinae Eseese le LTA e tusa ma le galuega o lou itumalo i auala. O le itumalo lenei e leai ni auala galue aemaise le atu Fagalua, o le alatele o le Malo le tauga o le auala, ua 53 nei tausaga ae faafetai ua amata ona fai le galuega i le auala e alu atu i Uafato, pei ona fai atu o le auala e le o se auala galue, o le aualatele o le Malo, e momoli atu le faafetai i lau Afioga i le Minisita aemaise le Malo, le Faauluuluga ma le Matagaluega, o lea ua amata ona faatino le galuega mo le auala lea i Uafato, e momoli atu ai le faafetai.

E momoli atu foi le faafetai i isi galuega o lo o tatou galulue ai, e ui lava ina faatiga fofoga i lau Afioga le oo atu soo ma talatalanoa i auala o lo o totoe pea o lou itumalo i Fagalua i le sau lea agai i Musumususu, ou te iloa lava le utiuti o le faasoia ona o lea auala e tele le galuega e fai ai ona e o faatasi le auala ma le taligalu pe a oo ina fausia lea auala, ona o le auala o lo o alu i luga o le sami, o lona uiga e tele se seleni e alu ai, ae taatia atu i lau Afioga, se i avatu mulimuli se manatu e fofo ai le faafitauli lea i mea tau tupe.

O le isi itu o le itumalo i Faleapuna, ia pau lena o le auala o lo o totoe. O le matou faleaoga o le a taumafai e sii i uta ona o lo o i tai i talaane o le sami, o le sami e pito i luma ae o i tua o lo o tu ai le vai, a oo la ina sua tutui ua taufai sau uma itu e lua, ae faafetai i le taligalu ua uma ona fausia, ae o lo o taumafai e sifi i uta le faleaoga se i faamautu mai le fanua o le aiga o lo o taumafai e aumai e fai ai le faleaoga, ia ona faatino ai lea. A o le auala e alu ai i uta i le faleaoga lea tusa o se auala galue lea o lo matou nuu, ia ua i ai le faamoemoega e leai e le o se auala galue ona o le auala lea ua uma ona ou alu fua e 1,600mita le mamao, e taamilo atu i le isi itu o le aualatele o le Malo ae toe taulai lava i le main road o le Malo, ma a uma ona faatino ona avatu lea e faa-aualatele o le Malo, o a foi fanua e aafia i le galuega lea ua uma ona soalaupule i le nuu e leai se isi e faalavelave a uma ona aumai lea i le Malo

ona e amata atu i le aualatele o le Malo o lo o i ai, ae toe faaiu lava i le aualatele o le Malo.

E faapena foi i lo matou pitonuu i Matautu, o lea pitonuu sa approve i le Budget o le 2007 le auala e fausia ai, ae te i ua le taunuu ona fausia i le 2007 ona o ni tuatuagia foi i fanua sa aafia ai, o le taimi lenei ua uma ona soalaupule, ma o lea auala e 400mita le umi, a tuufaatasi auala ia e lua o lo matou nuu, ona maua ai lea o le matou 2kilomita lea o lo o faasoaso nei – ma le auala lea e alu i Matautu o lo o ma faaaogaina ma le Afioga i le Taitai o le Itu Agai ia ma le sui usufono mo Falelatai ma Samatau, o lo o matou faaaogaina le auala lea. Ae talitonu le agaga, e taatia atu i ina i lau Afioga e pei foi ona oo atu ai ma tatou talanoa, ia e utiuti le faaso, ae talitonu pei ona fai atu, e leai ni auala galue o Faleapuna ae faatoa talosaga atu lea i se auala galue.

Afioga Hon Palusalua Faapo II: Lau Afioga i le Fofoga Fetalai, pe maua se avanoa, o le mea e fia faamalamalama.

Afioga TIALAVEA FEA TIONISIO SEIGAFOLAVA: E faaauau le ta lauga?

FOFOGA FETALAI: Ia malie leaga o lea sa e saunoa o le auala o lea e te lua feoi ma le Taitai o le Itu Agai. Tulai mai le Taitai o le Itu Agai.

Afioga Hon Palusalua Faapo II: Ioe, e sao lava. Ae ua ou alofa i le sui usufono ona o le tau fua o au, o lona uiga e le iloa le tausaga e fai ai, ioe, pei o le mea lenei ua ou tulai atu ai, a o le auala, oka se leaga, masalo ua toetiiti uma le aufai auala galue ae le i faia lava le auala e alu i tai isi nuu, pei o se nuu foi lea tuufua i tai. Ae ua ou popole masalo ua ou vaai atu o tusi e le Minisita mo Galuega, Felauaiga ma Atinae Eseeese o le a fai, ia ae tau atu loa ma au, ia ona ou alofa lea i le sui usufono e le iloa le taimi e fai ai.

FOFOGA FETALAI: Leai o lea e manatu le sui usufono o lo oulua va faa-Safata lea e tataua ona faaaoga i ai e fai le auala lea ua....Tulai mai lau Afioga i le Minisita.

Afioga Hon Manualesagalala Enokati Posala: Lau Afioga i le Fofoga Fetalai, o lea ua talosaga mai le Taitai o le Itu Agai mo tua i Faleapuna ae tuu le itumalo o Safata.

FOFOGA FETALAI: Ia o lenei e i ina i lau Afioga le faautautaga, po o fea le talosaga e talia, po o le talosaga a Faleapuna po o le talosaga a le Taitai o le Itu Agai.

Tulai mai le sui usufono.

Afioga TIALAVEA FEA TIONISIO SEIGAFOLAVA: Lau Afioga i le Fofoga Fetalai, o le mea tonu lava lea ua ou taua ai le Taitai o le Itu Agai, ua ou iloaina o le a tu mai i luga i le auala lea, ae o le a tuu atu pea i lau Afioga i le Minisita ma le Malo mo le faatinoga o ia galuega, ona e utiuti le seleni. Atonu e faafetai foi i le Matagaluega mo Punaoa Faanatura ma le Siosiomaga e tusa ma le taligalu o lo matou nuu, ae pau le agaga lau Afioga i le Minisita e

tuu atu pea i ou tafatafa, e le i uma lea galuega, ona ua amata mai i Falefa ae ua misi le isi vaega o lo matou nuu e le i faaoo atu i ai le taligalu. Taatia atu pea i ina i lau Afioga e faasoa, a mafai ona faaauau ia faafetai i lau Afioga ma le paia o le Matagaluega.

Ona oo mai lea i le Matagaluega lenei o le NPF: e momoli le faafetai i le Pulega ma le Komiti Faafoe, o lea ua i luma o le Laulau a Fono le Teuteuga o le Tulafono Autu ua sii atu ai le tasi sene i lenei tausaga ma le isi tasi sene i le tausaga fou i saofaga a tagata faigaluega. E momoli atu ai le faafetai e tusa ai ma lea foi faaiuga, ou te talitonu o mea lelei uma lava. Ae talitonu foi le agaga ma le manatu o lenei sui usufono i isi polokalame ia e faataatia mai a le NPF, i le tatou lava aganuu faa-Samoa, o tatou e invest i tatou alo ma fanau. O a lava mea tatou te maua, tatou te invest i a tatou alo ma fanau aua o latou ia e tausia tatou pe a tatou matutua. E eseese ai ma atunuu i fafo, a matutua loa matua, ua ave e tamaiti faanonofu i fale o le aumatutua. Ae o tatou i Samoa nei i le tatou tu, aga ma le aganuu, o lenei ua 61 ou tausaga, ae o lo o tausaga pea le ma tama ua 95 tausaga. O le a lava le matua tatou te i ai, e malosi le alofa i totonu o le tatou agaifanua. Ia o au la ia, ou te le popole i lou matua, aua e faamoemoe i fanau ia na tausaga e tausaga ita pe a ta matua. E pei na ona tuu atu faapena e toe tagai i ai le Komiti Faatonu ma le Pulega i le latou polokalame lea ua toe tolo, faafetai ua toe tuu atu i tua, ae faamalo galulue.

O isi manatu ua uma ona avatu i le matou Lipoti, ae talitonu i le Matagaluega o Tupe e pei o se taimi o i luma i le faalogologo atu i le tele o galuega o lo o fia faia e sui usufono, ia, ou te talosagaina lau Afioga i le Minisita o Tupe ma le Pulega o le Matagaluega o Tupe, e manaia lava pe a oo le tatou paketi lea a sau ia Iuni i le \$1pilionia ona fai ai lea o auala ia tatou te mananao e fai. E taugofie le fai i le 2015/2016 i le fai i le 2022. E taugofie. E tataua ona toe vaai po o fea e maua mai ai nisi seleni, a taunuu le paketi lea a tatou e sosoo i le \$1pilionia, ua fai uma lava galuega ia e mananao i ai sui usufono, aua e tele le manao, ae faapea foi e aua le loan, aua le loan. Ae tele lava le manao e tataua ona fai. Ia au la ia ma le matou itumalo leaga o lea e fia faauma matou galuega, e talosagaina le Malo ia atoa se piliona o le isi paketi lea ia Iuni ina ia fai uma manaoga o lo o manao i ai le tatou atunuu.

Ia, e pei o nai manatu ia lau Afioga i le Fofoga Fetalai e tuu atu i le matou foi pitolaau ina ia faasoasoa ai tupe a le tatou atunuu, aua a le mafai ona tatou faatinoina manaoga, o le tausaga foi lenei, o le tausaga mulimuli o le Paeaiga, e talitonu lava o le a faataunuu mea uma tatou te mananao i ai, e pei foi o le auala i Manono, o auala i tua i fea lava o lo o i ai, aemaise o auala o lou itumalo. Ou te manao la au ina ia tele ni tupe ia mafai ona faataunuu, a le o le Paeaiga lenei, o le amataga o le Paeaiga fou.

Ia manuia le faafofogaaga a le Maota, ia manuia foi le faafofogaaga a le atunuu, aemaise le faafofogaaga a lou itumalo pele o Vaa o Fonoti. Soifua.

FOFOGA FETALAI: Malo faafetai saunoa i le sui usufono mamalu. Ou te manatu ua taua finagalo ma manatu ma lagona ua fautuaina ai le Kapeneta ma le tatou Malo. Ia, tulai maia lau Afioga i le Tamaitai Minisita Lagolago, se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow.

Afioga Hon GATOLOAIFAANA AMATAGA ALESANA GIDLOW (Faasaleleaga Nu.1): Faafetai i lau Afioga i le Fofoga Fetalai mo le avanoa

mo lenei itumalo e faaleo ai foi ni nai manatu e tusa ai ma le tatou Tala Faatatau Faaopoopo o le Tupe ua opea nei i le malae. Ae fia avea lenei avanoa ona o le tatou fonofono mua foi lenei o lenei tausaga e faatalofa atu ai i lau Afioga i le Fofoga Fetalai, e faapea foi i lau Afioga i le Palemia ma le sui Palemia, aemaise foi Tamaitai ma Alii Minisita o le Kapeneta, afifio foi afioga i Minisita Lagolago, tainane le afio o le Taitai o le Itu Agai ma le Sui Taitai ma le paia i le Itu o lo o agaia le Malo.

Afifio foi ma papaa o le paia ma le mamalu o Ofisa Sili o Pulega ma Pule Sili o Matagaluega ma Faalapotopotoga a le Malo faapea foi le susu o le Susuga i le Failautusi o le Fonofono ma le afaigaluega o lo o lima ma vae i ai le tatou Maota nei.

Ou te fia avea foi lenei itula ma lenei avanoa ou te faatalofa atu ai i le faafogafoga mai a Samoa, le faafogafoga mai a Lana Afioga Mamalu O Le Ao o le Malo, lau Afioga Tupua Tamasese Efi ma le Masiofo, faapea foi le Sui o le Fonofono a Sui Tofia ma le Masiofo. I le faafogafoga mai foi a le Faamasino Sili, le Peresetene o le Faamasinoga o Fanua ma Suafa, faapea foi Alii ma Tamaitai Faamasino o Faamasinoga eseese, ae tainane le faafogafoga mai a Samoa, i le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ou te fia faatalofa atu foi i le faafogafoga mai a le aufai tatalo i faafeagaiga o lo o faapea ona nono-manu aua se manuia o Samoa. Ou te talitonu o a outou talosaga ua mafai ai ona uli ma sao le sa o Samoa seia oo mai lava i lenei vaitau.

Ou te fia faatalofa atu i lou itumalo o lo o faafogafoga mai o Faasaleleaga Nu.1. E avatu lau faamalo i le tapuai mai, mai lava i ona tuaoi i Sasae seia oo i ona tuaoi i sisifo, le susu o lau Susuga Ti'a ma Luamanuvae, Sua ma Tinousi faapea le malelega a Malietoa, le mamalu i le Falefia ma le Falesalafai ma upu ia te oe Salelologa. Susu foi Sua o le tupu na tausaga, Tusani ma le Aiga Sa Tusani faapea le mamalu ia te oe Sasilafaiga. Le paia o le Aiga Salevalasi, le susu o le Tootooalii ia Tofilau ma le Matua ia Asomua, lau fetalaiiga Leauanae ma le nofo a ituaiga ia te oe Sasulu, ae tainane le afio o le paia i alo o le Tagaloa faapea le mamalu ia Safune ma Taulauniu. Afio lau afioga i le Tamaitai, Afioga Gatoloaifaana ma le falefa o Atiulagi ma le Aiga Sa Gatoloai. E faapea foi Taito ma le Usoalii ma le latou matua ia Tanuvasamanaia. Afio le Gafa, Soanai ma Patane, tainane le afio ia Tuioti na Toainafa, le mamalu lava lea i Alo o Tamaalelagi. Ia, o mamalu na o le tatou faletolu o lo o polapui e Safuamua ma le nofo a ituaiga, faapea le Tapaaufanua ia Tevaga ma le Faleono ma le mamalu ia Salemuliaga ia Fuga ma Mauga.

E le galo ia te au le tapuaiga a lau Susuga i le Toeaina ma le faletua, ae le gata i lenei o Faafeagaiga uma o lo o faapea ona faafalelemalu i totonu o le tatou itumalo, aua lava le tauasua o le ipu o le talalelei, ina ia ola manuia tagata uma o lo o nofoia totonu o Faasaleleaga Nu.1. Faafetai le tapuai, faafetai le tatalo.

Lau Afioga i le Fofoga Fetalai, na o le upu faafetai ma le upu lagolago e fia avatu i le Afioga i le Palemia, o le Afioga foi lea i le Minisita o Tupe e tusa ai ma le tatou Tala Faatatau Faaopoopo o le Tupe ua opea nei i le Maota. E moni lava e utiuti lava seleni ae o le vaavaai atu foi ma le agaga faafetai i le Lipoti manino a le susuga i le Taitaifono o le Komiti o Tupe sa latou iloiloina lenei foi Tala o le Tupe, e talitonu lava ua ave le faamua i mea e tatau ona i ai

le faamua. Ma e avatu ai le agaga faafetai ma le faamalo, faapea foi i Matagaluega sa latou tapenapenaina lenei Tala o le Tupe. Ia, na o ni nai tuualalo lava e faapoopo atu ai pea i le tatou galuega faifaatasi. O le tele o ni talosaga o le a faataatia lava aua e le o le taimi lenei. E pei lava ona saunoa ia faataatia, ua i ai i tafatafaane o Afioga i Minisita, o se taimi ona toe asia lea ma avatu pea le talosaga ina ia fesoasoani ia faataunuu nisi o talosaga. Ae o le tuualalo e fia amata atu i lau Afioga i le Minisita mo Galuega, Felauaiga ma Atinae Eseeese, o le tulaga lea i le matou motu i Savaii. Faafetai ua tulai mai foi lenei mea fou o le cashpower. Ou te lagona lava ua tele le lagolagoina ma le faasaina ai o seleni a le tatou Matagaluega i taimi alu o le aufaigaluega e o ai e fai pili ma tufa pili ma tau ao tupe ma mea faapena. Ae o se tuualalo po o se talosaga foi e avatu, e i ai taimi e faaletonu ai le tulaga lea ua mafai ai ona maua le fesootaiga e maua ai se cashpower i le fesootaiga lea a faleoloa ma le National Bank. Ae peitai, a faaletonu mai loa, po ua i ai se faaletonu i lea fesootaiga, ua le iloa loa e le Savaii po o fea le mea o le a alu e aumai ai se cashpower, aua e lelei Upolu o lea o lo o i ai pea le Ofisa lea i Vaitele e 24 itula e mafai ona maua ai lea fesoasoani pe i ai foi ni fesootaiga mai le aiga i Upolu e mafai ona telefoni mai i ai, tamoe i ina i Vaitele avatu ai le cashpower toe telefoni atu i le isi tagata iinei i Upolu. A o Savaii, e pe loa le fesootaiga lea ma le National Bank i a latou masini, leai loa ma se isi mea e mafai ona toe o e maua mai ai se cashpower. E i ai la le taimi na ova atu lava i le aso po o le lua aso, ou te musu e faatele atu se... ae ou te lagona a ova i le afa aso po o le aso, ua le talafeagai. Ia manatua foi o le tele lava o tagata faatoa o foi lava e saili mai le cashpower pe a ua uma ua pe le power. E le tapenapena foi, o le natura lava lena faale tagata, ae ao lava ona maintain, maua le service, maua le faatinoga e mafai ona tautuaina ai le mamalu o le tatou atunuu.

O lea ou te talosaga atu ai, pe le mafai ona maua se nofoaga faapea i Savaii ia faaluasefulufa itula i le tatou Ofisa i Salelologa po o se nofoaga faapena e mafai ona autovaa i ai Savaii pe a ua faaletonu le fesootaiga lea ma le Nationa Bank i a latou foi masini, ae o lo o maua se fesoasoani mo nai tagata o si o matou motu.

Lau Afioga i le Minisita mo Leoleo ma Falepuipui, ou te avatu le agaga faafetai tele lava, aua sa ou i ai i le uafu i Mulifanua i le isi aso ae o atu Malu o le Malo ma taifau foi nei e fai osofaiga o le vaega lea e tuleia fualaa faasaina po o laau faasaina foi. O le tele ia o tagata na maua i lea foi osofaiga na i ai. Ma e avatu le agaga faafetai tele, ma ou te talosaga ina ia fai pea lava po o masina taitasi pe a umi, aua ou te lagona lava, o iinei i Upolu lea o lo o sapalai atu ai le laau lea i Savaii. O Savaii lava ia e ola mama Savaii, ae ou te tatalo atu i lau Afioga i le Minisita, o oe foi o le Minisita mai Savaii, puipui si o ta motu mai nei laau faaletonu e fai ai si faaletonu o mafaufau o tagata. O le talosaga vaivai lena.

O le isi au talosaga lau Afioga i le Minisita, o se agaga pe avatu e faasao ai seleni ma faasao ai taimi, o le tulaga lea o mea o talosaga, ou te le iloa po o lea le faaupuga, a o talosaga vaivai e le ono amanaia a ua alu ai tupe ma taimi o le Matagaluega ma le Malo. E pei o talosaga foi nei o ni upu masoa i le va o aiga po o le tasi i le tasi. Ou te tautala leaga ua ou oo i ai i le tele o le taimi ua faaalu e Malu o le Malo i le feaveaiga o tusi samania ma tulaga faapena. E tele taimi o afioga i Faamasino ua alu i le faatinoina o lenei talosaga, ae uma ane ua toe ave i tua. O le mea lena sa tataua ona foia foi lea i tua, a o lenei ua

alu taimi, alu tupe. O se tuualalo la, toe tagai pea i ai le tatou Matagaluega po o fea se mea o i ai se tapu o le loloto, se mamafa o se talosaga ona faatoa oo lea i le tulaga e alu ai tatou seleni, o lea o lo o utiuti le tatou tamaoaiga, e mafai ona faaaluu nei seleni i nisi o atinae lelei pei ona faafofoga atu ma faalogologo atu i talosaga a sui usufono mamalu o itumalo taitasi i mea o lo o mananao ai e atiae ai lo tatou atunuu.

Lau Afioga i le Fofoga Fetalai, o nai manatu lava na e fesoasoani atu i le tatou Tala Faatatau Faaopoopo o le Tupe. A o le agaga lava ia o lenei itumalo, matou te avatu le agaga faafetai, faafetai i le limalima lelei ma le faasoa lelei. Le Palemia ma le Kapeneta, o le matou tatalo e tumau atu, ina ia faapea ona maua pea le faautaga loloto aemaise le tofamamao mai le Atua e faatino ai outou tiute i lenei foi tausaga fou o le a tatou savalia. Ia manuia lau Afioga i le Fofoga Fetalai ma le mamalu o le Palemene. Soifua.

FOFOGA FETALAI: Malo faafetai saunoa i lau Afioga i le Tamaitai Minisita Lagolago, o se tasi o sui usufono mo Faasaleleaga Nu.1.

Ia, lau Afioga i le Tuiatua Faanofonofu, o lea lava ua faasolo atu le tatou laina, o lea e maua lava le tatou taimi. Tulai mai lau Afioga i se tasi o sui usufono o le Komiti, o lea ua tali le tatou Komiti.

Tulai mai le sui usufono mo Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai. Ua ou faapea ua faaoo atu e nisi o le matou Komiti le agaga, aua o le agaga lea e i ai, o le fautuaga po o recommendations lea e avatu i le Lipoti a le matou Komiti o le agaga foi lena, o le ala leai lea o se manatu e lauga, ae faafetai mo le avanoa. O le a talia ma le fiafia le avanoa. Ou te faatulou la i lau Afioga ma le mamalu o le Palemene tainane le faafofoga mai a Samoa, ae le gata i lea o Faafeagaiga o lo o molimoli talosaga aua o tatou faiva.

O le auala foi lea i Tiavea o lea sa maliliu ai tagata e toafa i le tausaga ua mavae, ua faaoo soo mai tele e le afioaga o Tiavea ia te au le isi auala lea e i lalo atu o le falesa Pope i le pioga tonu lava sa maliliu ai se tasi o tagata i le aso o le tuumalo o Mataafa, e afe la le auala, e sharp lava le bend lena e i ai si tamai omo la e i ai. O le mea ua tupu, e tutusa lelei lava le apa lea e fai ai le auala lea ma le auala lea sa tafea ia Ianuari i le tausaga ua tuanai. E mafua mai ona ua fai si pala o le apa, ua goto i lalo, o lea la e faapena le pioga tonu lava lea. Na ona logo atu ma le faaaloalo, ua maua le avanoa e molimoli atu ai, ua tele lava nai tagata o le alaafaga ua oo mai ia te au e talosagaina le tulaga lea i le auala, faamolemole e silasila i ai. O le alu agai Lalomanu ae tea loa le falesa Pope, o le pioga tonu lava lea, o i ina tonu e i ai le faaletonu, ua fai si goto i lalo o le auala.

O lona lua, talu ona uma le Tsunami i le 2009, ua amata ona gasolo i uta le toatele o le matou itumalo lea sa aafia i le Tsunami. O le mea la ua tupu, o lea ua matua faafetai lava i le Afioga i le Minisita ma le Pulega o le Suavai, ua sua lelei le vai i tai i le aai, a o gauta i uta, o lo o faaletonu le suavai. Na ona tuualalo atu i lau Afioga, a maua se avanoa, faafetai. Ae afai foi e leai, e momoli atu lava foi le agaga faafetai, e le faapea o le a talia na o mea lelei ae le talia mea faalelelei. E momoli atu lava le agaga faafetai i mea uma.

Faafetai i le matou auala lea mai Samusu e tau i Lalomanu, o le manaia ia o le auala, ua ova foi le manaia o le auala. E momoli atu ai le agaga faafetai i le

konekarate, o lea ua tasi le tagata maliu ae ua lua ea po ua toatolu tagata lavevea, ua fa taavale lavevea. O le mea foi la lea na ona tuualalo i le Matagaluega, a ova foi le manaia o le auala ma le lelei, ua fai ai pati a tagata ae faafetai o lea e faafofoga mai lau Afioga i le Minisita mo Leoleo ma Falepuipui, na ona tuualalo atu faamolemole, pe maua ni nai leoleo e asiasi atu i le auala fou lea e i gauta, lea e sau mai Samusu i Lalomanu ua oo i le fa taavale ua lavevea ai, toatasi le tagata maliu, ua ova foi ma le fa tagata ua faamanualia ai. E talosaga atu ai ma le faaaloalo....

FOFOGA FETALAI: Malie le sui usufono se i tuu atu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ua leva ona ou matau le Minisita mo Galuega, Felauaiga ma Atinae Eseeese na o le moeiini. E pei lava o la e ua amata ona faalemanino, tutu mai isi fai mai e leaga auala e tatau ona faaleleia, a o lea la ua maua le sao, aua le faaleleia telea leaga e feoti ai tagata. Vaai i le taua o a outou lauga i lenei aso? O lea e fai mai isi, fai faalelei auala, ae fai mai isi, aua le faia faaleleia. A o la e ou te vaai atu o la e moeiini lava le Minisita o la e tau sort out po o le a tonu le mea lea e tupu, ae taatia maia i le Kapeneta se i toe tilotilo i ai, a alu alu i luma alu i tua, alu i luma alu i tua. O le mea lea o lea e faafeagai nei ma le Kapeneta, tutu mai isi alu i luma, tutu mai isi alu i tua, alu i luma, alu solomuli, alu i luma, alu solomuli. Ia, ae faafetai tele lava mo a outou saunoaga, sau pea aua le tuua. O lea foi na tatou faafogafoga e eseese auala. Aumai uma ituaiga auala, o auala galue, auala a ma auala oo, aumai uma pea.

FOFOGA FETALAI: Se i tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga, o lea ua saunoa le Afioga i le Palemia, ne i te i ua lavea atu ai ma matou. O le auala ia e le afaina, ia lelei auala. E le o le auala e ala ai ona lavea le taavale, o le taavale. Afai la e vaivai le avetaavale a le Aleipata, e le faapea o le a aafia atu ai ma matou i le taulaga e lelei le avetaavale. Ia ma le faaaloalo lava.

FOFOGA FETALAI: Malie o le faauilavea, tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

Afioga Hon Leaupepe Toleafoa Apulu Faafisi: Lau Afioga, leaga o lea sa ou taua foi i lau lauga le faamanatuina o auala foi i Aana, a o lea ua matau atu o lea ua tulai mai le sui usufono, e le o se tamai sui le sui usufono lea na saunoa nei ua lelei tele auala o Aleipata ua mafua ai ona maliliu ma lavevea taavale afi. Pe le ave la lea ma mea e tatau ai ona sui faiga faavae a le Malo, tuu ia auala o Aleipata aua ne i toe faia, leaga e le iloa feoai i auala lelei ae liliu mai le faiga o auala i le itumalo o Aana ona e masani i le feoai i auala lelei ma taavale. Ioe, e faasaoina ai foi lea vaegatupe a le Malo, ae ave i ai na o le vaipaipa ma le eletise. Ia, o le fautuaga lea ma le agaga faaaloalo. Faafetai.

Tofa Levaopolo Talatonu: Lau Afioga i le Fofoga Fetalai....

FOFOGA FETALAI: Ua taunuu i le tatou taimi malolo, a tatou taliu mai ona faaauau lea o le saunoaga a le sui usufono. E faasilasila atu o le a faataatia ese Taulumaga o le Fono Aoa mo lana malologa masani o le afiafi.

Na faataatia ese Taulumaga a le Fono Aoa mo lana malologa masani i le itula e 4:47 i le afiafi ma toe faaauau i le itula e 5:29 i le afiafi.

Na toe faaauau felafolafaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2014/2015.

FOFOGA FETALAI: E faasilasila atu ua toe amatalia nei Taulumaga a le Fono Aoa Faitulafono.

E faia le tatou malologa o tulei saunoa le sui usufono mo Aleipata Itupa i Lalo. Ia, ou te talitonu e taua le saunoaga a le sui usufono. Atonu foi e faataata a lafoga, ae o lea e faafofoga mai le tatou atunuu i le tatou Fono. E taua foi le tuualalo ia i latou o lo o faaaogaina nei alatetele o le tatou Malo ma le malupuipua ma le saogalemu. O lea foi e naunau atu le Malo ona o tulaga o le faaleleia o meatotino ma auala e femalagaai ai, ae ua avea foi le tulaga o le matagofie ma le lelei o auala ua agai ai ina tutupu ai ma nisi faalavelave le maalofia, faalavelave tatou te le manaomia. Ua aoga foi le faailoa mai e le Afioga i le sui usufono i le tatou Maota e avatu ai le tuualalo o lea e faafogafoga le atunuu i le Fonousu a Samoa i lenei itula o le afiafi. Ia malilie le paia ma le mamalu o le atunuu o lo o faafogafoga mai i nuu ma afioaga se i alofagia le saogalemu i alatetele.

Ia tulai maia le sui usufono mo Aleipata Itupa i Lalo e faaiu mai le saunoaga.

Afioga TAFUA MALUELUE TAFUA: Ia, o lea ua maua le faamalosiaga i le tatou Palemene. E momoli atu foi le faafetai i lau Afioga ma le Failautusi o le Fono ma le Matagaluega, ua atili ai ona maalilili i le vai lea na fai nei ma le keke faiota. Faafetai le faaloalo.

O le tulaga i le mea na saunoa i ai lau Afioga, faamalo faafetai. E lagona foi lava le faanoanoa ma le atugalua o le mafaufau pe a faalogo atu i upu o lafo pe faatausua mai i le matou itumalo e le iloa avetaavale. Lau Afioga i se tasi o sui usufono mo Aana Alofi Nu.1, Afioga Hon Leupepe Toleafoa Apulu Faafisi, e leai ua leva foi ona e avetaavale, sa ta avetaavale faatasi lava masalo po o le 1960+. E leai, o nai tama foi o le Matamatagi, sa ave vaalele le isi vaega, e toatele lava na ave vaalele i le taimi o le taua lona lua a le lalolagi mo lo outou silafia. Atonu o le mea foi lea na tupu ai le faalavelave, ae o le mea lona mo le silafia e le mamalu o le atunuu lea e faafofoga mai. O le faalavelave lea na ou taua, o tagata lava mai le itumalo o le si usufono mo Faleata Sisifo lea e mafua ai lea faalavelave. Ae ui i lea, o le a ou see ese lau Afioga ma le vaega lea.

O le vaega lona lua, sa ou taua le lelei o le auala, ona ou faapea lea... o lea ua misi atoa lava i le Malo le point, o le point lea na ou raise ina, o le lelei ia

o le konekarate na faia le auala, o le matuai selau pasene lava. Ou te molimau atu i luma o lenei Palemene, afai o faafofoga mai le aufai auala, e lelei ona outou afifio atu i gauta o Saleaamua i Utufaalalafa ma Samusu, o i ina o le a maua ai se faataitaga lelei o le faiga o le tatou auala. E le faapea la e faaviivii atu, o tagata foi ua masani i lea tomai ma lea matata. Ae le gata foi i lea, e tatau ona molimoli le agaga faafetai i le Matagaluega aua sa lelei le monitor ina o le auala, e ui lava ina ua tele alavai ua alu i lou fanua ua vaia atoa le mea pe a timu, ae ua ou talia lava ma le fiafia, e aoga foi e taumamafa ai povi ma fuifui ai nai laau toto. E pei o le agaga lea na avatu ai le feau, ona o le faatauaina o le konekarate i le faiga o le auala, o le matua lelei lava o le faiga o le auala. Atonu lava la ua vavevave mai ona outou osofaia au, ae le i maea atu le agaga o le feau lea e tau molimoli atu. Ae faafetai mo fautuaga, faafetai foi i lau Afioga i le Fofoga Fetalai. Masalo po o se taimi o le amataga o lenei tausaga po o le... na gaioia ai lau povi tulou, o le manupapalagi na le iloa. Sa vili la leoleo omai nai tama fai le sailiiliga, e oo mai i le aso, ou te le iloa po o leoleo po o le manupapalagi ua oo i le lagi, aua e oo mai i le aso lenei ou te le iloa po o le a le mea ua tupu, ae leai ma se isi ua vili mai ia te au e faapea mai, "Tafua o lau manupapalagi lea ua uma ona molia tama, o le faasalaga e faapea ma faapea." E oo mai lava i le aso e leai se mea. Faamolemole lau Afioga e auala atu i lau Afioga i le Fofoga Fetalai, ou te fia maua se tulaga ua oo i ai i lau talosaga na fai i le Matagaluega o Leoleo, aua faapea lava ita o le mea muamua e logo le complainant po o le tagata e ona le tagi ona oo mai lea o le faaiuga po o le a le mea ua oo i ai.

Ia na ona ou talosaga atu ma lou agaga faaaloalo, afai ua maua se iuga o le faamasinoga pe maua foi sau tupe, faafetai. Ae tuu lava i le Matagaluega e fesoasoani i se isi aseta a le Matagaluega, ae ou te le i maua se faamatalaga po o fea ua oo i ai.

O lona lua, faafetai tele i lau Afioga i le Minisita o lea ua maua le faamatalaga fiafia o le a oo atu le Tinei Mu i tua ia matou i Aleipata, e momoli atu ai le agaga faafetai i lenei fesoasoani manaia o le a maua e le itumalo. O lea o le a avatu le Tinei Mu e fesoasoani i lo tatou itumalo aua e le gata o lea e tapena e fai se malae vaalele i se taimi o i luma ae mo le tatou uafu. O lea foi ua agai fuafuaga a le Malo o le a toe faaauau galuega i le uafu. O lea e momoli atu ai le agaga faafetai ma le faamalo i le Matagaluega e tusa ai ma lea tulaga.

O le vaega mulimuli lau Afioga i le Fofoga Fetalai, o le Afioga i le Minisita mo Punaoa Faanatura ma le Siosiomaga. E fia tuuina atu se talosaga ona e i ai le alavai lena e i luma o le falesa Assembly of God e i ai se auala laupapa laitiiti lava e alu atu le vai alu i totonu ma e i ai le togatogo i tua i ina. Sa tele se aafiaga i le taimi o le tsunami, a o i ina sa tele ina tuufua ai anae ma i'a faapena, e taua tele la mo le lumanai na tele ai nai i'a sa maua ai i lena vaitaimi, a o le taimi nei ua tau leai ni togo. E talosaga atu pe maua se avanoa e toe toto ai ni togatogo i tua i ina e tuufua ai i'a.

Ona pau ia o ni manatu, ae e fia avefa foi lenei taimi e momoli atu ai le agaga faafetai ma le faamalo i le tapuaiga a Samoa aemaise o le Aufaigaluega Paia a le Atua. E faaii atu ai se tala ae e le faaitiitia ai le taua o le faafetai i lou itumalo. Ua faafetai tapuai i nei tausaga e fa, ua toe tasi le tausaga o lo o totoe. Ia malilie foi i se mea ua mafai e le sui usufono, ae ia mau pea le toovae. Ia agalelei le Atua ma faamanuia mai i lenei tausaga, faafetai.

FOFOGA FETALAI: Malo faafetai saunoa i lau Afioga i le Tuiatua Faanofonofu.

Lau Afioga i le Sui Fofoga Fetalai, o le a faaiu atu lava le tatou faalau i lea Itu o le Maota ona lafo loa lea i lea Itu e faauma mai ma tulai mai ai le Taitai o le Itu Agai.

Tulai mai lau Afioga i le Sui Fofoga Fetalai.

Tofa AGAFILI PATISELA ETEUATI TOLOVAA (Palauli Sisifo): Faafetai i le Atua o lea ua pulapula a la goto lenei aso, a o maua pea e lau Afioga i le Fofoga Fetalai le manuia ma le malosi e faafoe ai le Fonotaga. E talitonu foi ua maua le malosi ma le lagi soifua e le Afioga i le Palemia faapea le Aiga Kapeneta ae faapea foi le la Itu i le Taitai o le Itu Agai ma sui usufono mamalu uma o le Palemene.

O paia o Tiafau o le a taoto aua pe oo i ai se faamatalaga a Palauli Sisifo pe leai, o paia lava mai le vavau e oo i le faavavau. O le mamalu ma le paia o le filifili o le vaosa o Samoa mai Malaetele seia paia Fili ma Puletuu na to ai manu o Malo, e leai lava se tautai e fagota ulavale i ai. Ou te talitonu la i le tapuaiga a Lana Afioga Mamalu O Le Ao o le Malo seia oo lava i se toe tagata o lo o faafogafoga mai i le aso lenei, o le a taoto foi. A o le a faapito augafa se faamatalaga a lou itumalo mai le Faga i Sasae, le paia i Nuuli ma Vaipaepae aua le Aiga Paia faapea le Falefa ma Faigata. Le tautalaga ia Faiumu ma le igoa Salemuliaga, le paia foi i Falemai aua Tapaau ma le nofo a ituaiga ia Gagaemalae.

E faapea foi le paia i lo matou nuu i Salailua, o Oloitefu ma Vaipaepae ma Mutiatele aua aiga ma Fetalai i Igoa Matua aua Tuato ma Tuitolovaa ma le igoa Salemuliaga; e faatlofa atu.

Ua malo foi tapuai i Faafeagaiga o lo tatou itumalo. E faatalofa atu i lau Susuga i le Sui Taitaifono o le Ekalesia Faapotopotoga Kerisiano i Samoa, Susuga Tavita Roma ma le faletua. E faatalofa atu foi i lau Susuga i le Alii Sea o le Ekalesia Metotisi o le Sinoti i Salafai Sisifo, Susuga Ioane Tolai ma le faletua. E faatalofa atu foi i le maave eseese o le Afaigaluega Paia a le Atua o lo o asuasua le vai o le soifua aua lo tatou itumalo mai le Faga i Sasae i Taga seia paia Foalalo i Gagaemalae. Talofa, talofa lava. Ia onosai mai se i taumafai atu se sao o lo tatou itumalo aua le Tala Faatatau Faaopoopo o le Tupe (Nu.1) 2014/2015.

Lau Afioga i le Fofoga Fetalai, o le a taumafai atu se faamatalaga lautele e tusa ai ma le faamoemoe o lenei aso. O le a ou amata mai i le Afioga i le Minisita mo le Matagaluga o Leoleo ma Falepuipui lau Afioga i le Fofoga Fetalai.

O lea ua faaleo atu e se tasi o sui usufono mo Faasaleleaga Nu.1 se popolega o lou nei sui usufono ona ua lua tulaga ua tulai mai i le uafu i Mulifanua i mea lava nei o fualau faasaina. A o le i oo i le Kerisimasi sa ou alu ai i le vaa usu. Na tau tuai laitiiti le matou vaa ona sa faasalalau e le Ofisa, e i ai ni ato o lo o i luga o le uafu. A o i ai nisi o galo ni a latou ato, faamolemole omai e avatu a latou ato ona o lea o le a alu le vaa, ae ou te le iloaina o lea ua taunuu atu Malu o le Malo ma taifau sosogi foi ia. E alu lava le vaa pe sili i le 10 ato ia e taatitia i luga o le uafu. O lona uiga o la ua iloa uma lava e tagata, o le taimi lava e piki ai le ato, o le taimi foi lena e piki ai e leoleo.

O lea foi na tupu le faalavelave i le Aso Faraile o le vaiaso lea na tea nei na ou alu ai i Savaii, ae faafetai e leai se soifua na afaina ai ae faapea foi soifua o

le auvaa. Na tupu ona ua tau faaletonu tagata na faaaogaina fualaau faasaina i luga o le vaa, ae faafetai matou te taunuu atu i Salelologa o la ua faatali mai leoleo.

O lau fautuaga e pei foi ona faaleo atu e se tasi o sui usufono mai Salafai, aua le tuuina i le masina ae faifai pea le galuega lea ona ou te talitonu e le gata i Upolu o lo o alu atu ai fualaau faasaina i Savaii, ae o lo o masalomia foi e lou lava sui usufono, e i ai foi mea ia e sau mai Savaii. E pei e manaia le taimi lea e pei o le mea lea e fai i le malae vaalele. E te te i lava i lou sau i le mea e faatali ai lau ato ae o atu taifau e sosogi. Ou te iloa o le tulaga lea a o se talosaga lena i lau Afioga i le Minisita faapea le mamalu o le Matagaluega, se i silasila ane ae faaauau pea galuega ia a Malu o le Malo faapea a latou taifau.

Ona ou oo mai lea i le Matagaluega o Felauaiga faapea le Matagaluega o Punaoa Faanatura ma le Siosiomaga. E leai sau faamatalaga aua o lena ua taatia i oulua aao au talosaga, ma ou te iloa o le tele o talosaga e fai atu e oso ai lo oulua ita i tagata. O lena ua taatia atu se i oulua silasila i ai. Ona pau lava lau talosaga i lau Afioga i le Minisita o Vaa, ua manaia lava Mulifanua e pei ona saunao atu ai se tasi o sui usufono. E tele, o le faasologa o taavale toe ese le nofoaga e tutu ai taavale. O matou i Salafai o lea ua faasa nei taavale ona toe tutu i le pa lea e i le itu agavale o lea ua loka. O le itu lea i Sisifo mai le fale e faatali ai pasese, o i ina ua tutu uma ai lava taavale. O pasi ma ua vaapiapi lava le avanoa ona ua i ai foi ma isi faleoloa ua tutu ai i ina. A oo la i le taimi ua taunuu atu lau malo ua e fia alu a o la ua laina pasi mai sisifo i tua i ina, e te fiu e tutu. Seiloga lava e uma ona tuu pasese i lalo ma uta pasese a pasi faatoa mafai ona maua se avanoa e te alu ai.

E le o se tala e aveane ai leaga na ou maua ai i le Aso Toonai na tea nei. Ua vaapiapi tele le pito lena ma e lelei lava Mulifanua e tele naunau le fanua, ae e tatalo atu, o le a le mea e le toe tatala ai pea le pito lea ua faasa i le taimi lena lea ua loka le pa i le itu agavale pe a afio atu i le vaa? Ia faaoga i ina e tutu ai taavale a matou ia e omai e faatali pasese ma fai ni itu o moomia i ina i luga o le uafu ma le faaaloalo.

Ua ou oo mai i le Minisita mo Aoga, Taaloga ma Aganuu. Ou te iloa e i ai nisi taimi e ese lou finagalo ese lou manatu i le tele o mataupu ou te laga, a o lea ua fa tausaga o le tatou Paeaiga. O lea o le a avatu faapitoa lava lau faafetai i lau Afioga i le Minisita faapea le Ofisa Sili o Pulega ma le Matagaluega.

O se taimi muamua lea ua ou faalogo ai ua aumai lava togi o tamaiti e maua i suega. Ua le toe i ai se fetuunaiga, pe fetuunai i luga pe fetuunai i lalo lea e te silafia lea e fai e faiaoga o le mean ma le median. O lea la ua tuu nei i le tulaga lea, ua faafetai tele lava. Aua o lou lava talitonuga, o le scaling up po o le scale i lalo lea e faaseseina ai mafaufau o tamaiti faapea foi matua i o latou togi. O le mafaufau lava ia o le tamaitiiti o ou togi sao lava ia lea na maua. Ona faaseseina ai lava lea o mafaufau o tatou matua faapea foi tamaiti i o latou togi ia ua maua, a o lea ua faasalalau mai e le Matagaluega, o togi lava e maua i lau IA ma togi e maua i lau suega, o togi sao lava na o lea ua aumai i le tausaga lena. Ou te talitonu foi a i ai ni tamaiti e le manuia taumafaiga i ni sikolasipi ona o le mafuaaga lea aua o lea e fai le scaling i le UPY, alu i luga pe alu i lalo ona misinform ai lea o tamaiti ua pei o le mea foi lea o le window dressing, e faamanaia mai i le vaai ae e le o le mea tonu lena o lea e taatia ai togi o tamaiti.

O le faafitauli i le matematika, ou te le toe tau fai atu ai. Ou te iloa foi e leai lava se vaifofo vave, ae faafetai lau Afioga o lea na amata i le tausaga lea le polokalame fou i mea ia o matematika, o lea ua amata mai i aoga tulagalua. A fua mai le galuega lea po o le lima i le ono tausaga o i luma, a o le amataga faafetai tele.

Ua ala ona ou laga le tulaga lea ona e i ai le aoga tulaga lua e tasi a lou itumalo o lea e lavea i lalo o le polokalame lea. Ua faafetai tele lava mo le galuega lea aua o lea foi ua amata ona faamalosia i nisi o Ekalesia i aoga a faifeau le faatumuina o le avanoa lea sa i ai muamua i aoga a faifeau i aso ua tuanai. O lea la ua i ai ia fuafuaga e sili ona lelei.

Lau Afioga i le Minisita e ala atu i le Fofoga Fetalai, o lea foi ua agiga i le faalogo o le a fesui ai Pule Aoga. O lea la o le a alu atu le Pule Aoga o Palauli Sisifo i Savaii Sisifo, ae sau le Pule Aoga o Savaii Sisifo i Palauli Sisifo. Mo le silafia o lau Afioga i le Minisita ma le Matagaluega, o le Kolisi lenei o Palauli Sisifo, e leai ma se tausaga na faaletonu ai iuga o ana suega aemaise lava le Vasega 13. O le tausaga lea e 2014 e 30 le vasega. E 12 le FOE ae 15 le UPY, ae na o le toatolu lava tamaiti e misi. A o le tausaga ua tuanai atu, o le Pule Aoga lava na i ai o se tamalii o lenei itumalo lea ua i le Ofisa o Aoga. O le taimi lenei, o le tamalii foi o le itumalo lea e pule i le taimi lenei. O lea la o le a ave i luga i Savaii Sisifo, ae aumai le Pule Aoga o Savaii Sisifo i le matou aoga. E le aiaina e lou sui usufono galuega faatino a le Matagaluega, ae ona pau lava le mea ou te popole ai ina ne i te i ua lelei ai Savaii Sisifo ae faaletonu ai Palauli Sisifo, a o galuega lava ia ma fuafuaga a le Matagaluega mo aoga, ou te le aiaina, ae faafetai se i fai foi lea suiga se i tau faalelei mai lea itu o a matou aoga ona ua fai sina faaletonu.

Ua i ou aao lau Afioga i le Minisita e ala atu i le Fofoga Fetalai lau talosaga i le vava mamao tele o nuu o le itumalo. E tasi lava le kolisi o Salailua e i ai. O le va o Salailua ma Taga ou te le tau faamanatu atu aua ua outou silafia uma lava. A tuua le aoga i le itula e 4.00 i le taimi lenei ua leai ni pasi, ae a savali atu la le tamaitiiti mai Salailua e alu i Taga, e taunuu atu i Taga ua po. O le a taatia atu i ou tafatafa, a te i ua i ai se taimi e tufa ai pasi a le Malo ae i ai ni pasi a le Ofisa o Aoga, ia manatua ane sina taavale ma le matou aoga.

O le malae taalo, ua uma ona e asiasia ma ou te le toe oo foi i ai, ua faafetai i le taimi na e afio atu ai. O fuafuaga a le Ofisa o Aoga mo le agai i luma o aoga i Samoa, o le a taatia atu, ae faafetai atu i lau Afioga faapea le Malo e tusa ai ma fetuunaiga o totogi o faiaoga.

Lau Afioga i le Minisita mo le Soifua Maloloina ma Auaunaga tau Soifua Maloloina, faafetai lava tou te le o taofia iinei fomai ia o lo matou itumalo ua iu mai i le Iunivesite. O lea ua toe foi atu lava ma o latou Bachelor of Nursing e galulue ma auauna i lo matou itumalo, ae faafetai ua outou le taofia iinei i Apia.

O lea sa e asiasi atu i le Aso Faraile lea na tea nei na tatou fetau i Savaii, o lena ua e silasila i ai i le fale o fomai pei ona fuafuaina faapea ma isi fale aua le tautuaina ma le auaunaga mo le falemai. O lau fesili lava i lau Afioga, o afea e alu atu ai se fomai e nofomau ai i o aua pei o le faamoemoe lea na fai ai fale ia ma toe faaleleia ai, e oo i se taimi lata mai ia ona alu atu lea o se fomai e nofomau. Na ou fia iloa, na fesilisili mai ai nai tagata ia te au pe oo lea faamoemoe pe leai?

Lau Afioga i le Minisita mo Faatoaga, Faleoloa o Faatoaga ma Faigafaiva e auala atu i le Fofoga Fetalai, ia faafetai mo galuega o faatoaga. O lo o

faagasolo pea ia fuafuaga a le Matagaluega i le SACEP ma le Cyclone Recovery, o lea ua oo mai matou faamanuiaga ia ma le taimi lea ua tuu mai ia matou e oo atu ai i le matou itumalo i uta i Aleisa po o le faaiuga o Mati po o Aperila, ia o le a maua ai lea faamanuiaga, faafetai tele lava. Ona o lea ou te tilotilo atu e le o sau i i le Tala Faaopopo o le Tupe se faleaisa o Salailua, ia na ona faataatia atu i ou tafatafa aua le Tala Autu o le Tupe mo lenei tausaga.

Lau Afioga i le Minisita mo Fesootaiga ma Faamatalaga Tekonolosi, o lena e te silafia sa masani lava ona ou laga le mea lea o le lauiti i le 2AP. Ua faafetai tele lava mo le polokalame malamalama a le 2AP ua uma ona malamalama uma ai le tele o tagata o le tatou atunuu i le eseese o mea ia o peau galugalu o lo o faagaoioi ai le FM, ma peau galugalu o lo o faagaoioi ai le AM, ia o lea la ua ou mautinoa ma ou iloa, ia o le mafuaaga tonu lena e i ai taimi e faaletonu ai o na o le eseese o ia auala e faagaoioi ai ia leitia.

O le Tala o le Tupe, e lagolagoina e lenei itumalo aua o le tamai Tala o le Tupe e \$10miliona aua le faaauauina o galuega a lo tatou Malo. O le mea mulimuli lau Afioga, sa i ai lava lou manatu lau Afioga i le Minisita faapea le Ofisa o Sikolasipi ma le Komiti, e faaaogaina le Gagana Samoa e filifili ai sikolasipi, ae peitai ane ua ou mauaina le tala i le tausaga lenei, leai e le taulia le Gagana Samoa po o le Samoan lea e ave i uta i le UPY, ia e le aiaina la e tatou ia ia fuafuaga mai fafo pe a faapea o se finagalo lea o atunuu mai fafo o lo o faatupea ia tatou sikolasipi. A o lau faamatalaga, afai e le faaaogaina mo le filifilia o sikolasipi, aisea la e faamalosia ai e le lunivesite? Aua a le pasi le Samoan e tasi a le tamaitiiti, e le mafai ona faauuina, aisea la o le a maumau ai le taimi o tamaiti ma matua e fai ai lea mea a o le naunautaiga uma lava o matua ia maua se sikolasipi a le o Niu Sila o Ausetalia, o Fiti. Ae o le a la le mea e faamaimau ai le taimi e fai ai lea mataupu, ae le tuu faa-option pe manao e ave pe leai? Ia na o se manatu e tuu atu, ia ae filifili pea i ai. Ia pau lea o se manatu lau Afioga, ia manuia lava le Fonotaga i lenei afiafi, faafetai.

FOFOGA FETALAI: Malo. Faafetai saunoa i lau Afioga i le Sui Fofoga Fetalai.

Ia o le a liliu le la o le vaa i lea itu o le Maota, lau Afioga i le sui usufono mo Palauli le Falefa, ou te iloa o lea ua faasolo atu le tatou faasologa mulimuli. Tulai mai e saunoa mo le tatou Tala o le Tupe.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai, e le i ai sou manatu e fai se lauga a Palauli le Falefa, peitai sa ou matauina i le tele o saunoaga a Afioga i sui usufono o lenei Maota i le tulaga o le malosia (energy) mo le gaosia o le eletise.

Ae le i oo la sau faamatalaga i i, e muamua lava ona ou faafetai atu i lau Afioga i le tulaga o le faatautaiga o le tatou galuega. Ou te faafetai foi i le Afioga i le Palemia ma le Kapeneta aemaise o le mamalu o lenei Maota le susu atu o le Taitai o le Itu Agai ma lenei foi itu, o lea ua e saunoa o lea ua ou nofo i le itu lea, pei e foliga ua ou i i le vaega lea, ae leai.

FOFOGA FETALAI: O le sui usufono mo Faleata Sisifo lava lea e talai mai ana tala lea o lau Afioga lea o le a e agai i le itu lea. Saunoa ia lau Afioga.

Afioga Hon FAUMUINA TIATIA FAAOLATANE LIUGA: Faafetai; ou te faafetai muamua lava isi ou itumalo i le tapuaiga a Tapaau e fa ma Faleupolu e fa, e faapea foi le tapuaiga a si ou nuu o Tafua. E tumau pea tulaga faalupe ma mamalu o lo tatou itumalo e le aveesea i sa'u upu. Ou te le toe oo foi ona o le tulaga o le faamoemoe o le Kapeneta e tali le Malo i lenei afiafi, ma o le mea tatau lea. Pau lava le mea na ou fia oo i ai i le tulaga lea o lea sa ou faalogo i felafolafoaiga i le tulaga i le malosiaga mo le gaosia o le eletise. O le gaosia o le eletise mai le savili e na o le 20%, o lona uiga o lea tatou te talanoa i se vaega laitiiti o le malosiaga mo le agai atu i le lumanai ma e tatau ona i ai ni faiga faavae lautetele mo le malosiaga i le aoatetele. O le uiga o lea faamatalaga lau Afioga i le Fofoga Fetalai, e le na o le malosiaga e gaosia ai le eletise le mea lea tatou te i ai, ae o le malosiaga i le aoatetele e aofia ai felauaiga (transport). O le faafitauli tele lea e feagai ma Samoa i le taimi lenei, o felauaiga, aua o lea ua uma ona faataatia e le Malo le laasaga muamua ia oo atu i le 2017 ua le toe gaosia le eletise mai le suauu fossil lea o lo o faaleagaina ai le ozone i le vateatea.

I le tulaga lava o felauaiga lau Afioga i le Fofoga Fetalai e ala atu ai se tuualalo i le Afioga i le Palemia o lo o Taitaifono i le Komiti lea o le Malosiaga, e tatau ona faataatia ni a tatou faiga faavae lautetele e tatou te sauni ai e access le tupe lea ua uma nei ona tofia ai ia le Failautusi o Tupe po o le Matagaluega o Tupe e faaauala mai ai a tatou tupe mai le vaega lea e tau o le Green Climate Fund, o le Green Climate Fund, mo le silafia ou te iloa foi ua silafia e lenei Maota, e \$100pilonia i le tausaga le tupe lea o le a aumai e galulue ai le lalolagi e saili se fofo o le fesuisuiaiga o le tau. O le vaega tele o lo o totoe o le transportation (Land and Maritime) e toeitiiti 45% i le 15% lea e faaoga ai le suauu fossil, a o le eletise e na o le 60%, o lona uiga, e 70% le mea lea po o le 80%, Land Transport, o le Maritime Transport ae le o aofia ai le vaega lea i le vateatea (aviation).

O le mea lea ua ou mautinoa ma o lea ou te faalogologo pea i ai, o lea ua faalava le talosaga a OPEC counties, atunuu e maua ai le suauu ia compensate pe tauia latou ona o le a faaitiitia le maketi ma pau le tau o le suauu ma ua opt le tele o atunuu i alternatives renewable energies. A faalava loa tama matutua ia lea e mafuli i Donor Countries lea o lo o tele lo latou sao i le afaina tele o le siosiomaga, lau Afioga i le Fofoga Fetalai, o lona uiga e ono faaitiitia ai a tatou tupe e maua mai le Green Climate Fund. O lau talosaga ma lau tuualalo i le Afioga i le Palemia ma le Kapeneta po o le Komiti o le Energy Committee, se i silasila ane pe talafeagai le faia o se tulafono e tuufaatasi ai faiga faavae, aua o le ki lea po o le solution lea mo le fofoina o luitau o lo o feagai pea ma tatou ina ia maopoopo faiga faavae o malosiaga (energy policy) ina ia faaitiitia ai le afaina o lo tatou siosiomaga.

Lau Afioga i le Fofoga Fetalai, o se tuualalo lea ma se fautuaga i le Malo e silasila ane i ai. Sa ou talatalanoa foi i nisi o Faauluuluga i le taua tele ona amata ona faataatia a tatou Project Proposals, ina ia avatu i le mea o manaomia ai nei atinae ia taunuu atu a o le i taunuu atu isi atunuu aua o le first come first serve aua e pei o tulaga masani lava ia. O le mea lea e masani ona tatou faalogo i ai, fai mai e leai se tupe. O donors e augata tele ona latou tau maia atunuu e manaomia tupe (recipient countries), o le latou mafauauga, e iloa loa e recipient countries, e i ai le latou talitonuga ua oo atu o tatou lima i a latou tagatupe (they feel our hands in their pockets), o le mea

lena o la e tupu. Ou te masani ai i uiga ia ona sa ou i ai i le siosiomaga lea. O le autu lava o lou manatu o le fautuaina lea o le Malo se i silasila ane i ni faiga faavae (Energy Policy) e aofia ai le eletise, felauaiga i le laueleele ma le gataifale.

Lau Afioga i le Fofoga Fetalai, ia ona pau lea o se tuualalo i lenei Maota aemaise o le Afioga i le Palemia ma le Kapeneta, manuia le Fono.

FOFOGA FETALAI: Malo faafetai. Ua faafofoga le Maota i fautuaga anoa a le Afioga i le Minisita Lagolago o le Minisita foi lea o le Punaoa Faanatura ma le Siosiomaga.

Ia le sui usufono mo Faleata Sisifo, o lea ua faasolo mai lava tatou. Tulai maia le sui usufono mamalu mo Faleata Sisifo, ona sosoo ai lea ma se tasi o sui usufono mo Salega, ia ona totoe ai lea o le masaga.

Tofa LEALAILEPULE RIMONI AIAFI: Ia faafetai i lau Afioga sa leai se manatu ou te....sa i ai lava lou manatu ou te malolo i le Fono lenei ou te le lauga i lou fiafia, fiafia ma le faafetai i le Atua ua tatou aulia lenei tausaga fou o le tausaga mulimuli o le tatou Paeaiga i lalo o lau taitaiga. Faafetai i lau Afioga i le taitaiina o le tatou Paeamene, ua uma atu ia tausaga e tele. E manatua foi a oo loa i le Kerisimasi ua fiafia uma le aiga, ua pese fiafia ua oo mai le Kerisimasi, a o le sui usufono ua tau le pese, ia ona fesili lea o tamaiti, o le a le mea ua e tau le pese ai? Ia faapea, ia ua uma atu foi lenei tausaga o le Paeaiga ua lata mai. Ia ae o le tagata ia e ola fiafia ma ola faalagolago i le Alii, e leai se mea e popole ai e mafanafana lona loto i aso uma i le ao ma le po.

E faatulou foi i le Maota i Tiafau nei le Maota o Samoa, i lau Susuga i le Palemia, lau Afioga i le Sui Palemia ma le mamalu i le Kapeneta, mamalu i Minisita Lagolago. Ia lenei foi itu o le vai i lau Afioga i le Taitai o le Itu Agai ma le Sui Taitai, le paia i sui usufono malolosi o le Tautua Samoa, aemaise foi ia le paia i le Maota Fono i Faauluuluga o Matagaluega a le Malo, faamalo le usufono faamalo le galulue i lena tausaga, faamalo i mea lelei uma i atinae ma mea o tatou galulue uma ai aua le manuia o le tatou atunuu, faafetai le onosai.

E faatalofa foi i le faafofogaaga a Samoa mai Lana Afioga Mamalu, O Le Ao o le Malo ma le paia o Samoa i ona tulaga faalupe faapea foi ia le Afaigaluega a le Atua, ia a o le loaloa o Samoa aemaise foi o le faafofogaaga a lenei itumalo.

E momoli le faafetai i galuega faatino i totonu o lenei itumalo i tausaga e tele seia oo mai i lenei tausaga, e tele suiga lelei ua vaai i ai, o auala, o fale, o pisinisi, o mea e tele ua mafai ona faatuina ma fausiaina i totonu o lenei itumalo, momoli atu le faafetai tele. Faafetai foi o lea ua fufou le Malo e amata le tatou auala foi lea four lane lea e toe sosoo atu mai i i Lepea seia oo i o i Puipaa, ia ua uma lelei lava le itumalo o Faleata Sisifo, e momoli atu ai le faafetai i lea vaega.

Faafetai foi i le fuafuaga a le Malo mo se toe siitiaina o le falepuipui, ia o se fuafuaga ma se tofa talafeagai lea pe a toe siitia le tatou falepuipui i Tanumalala, ae toe faaavanoa ai lenei fanua tele o le Malo aua foi ia nisi o galuega fai ia ma nisi o le atunuu o lo o fia saili nofoaga e nonofo ai, a o lea ua sosolo atu lava i tua ia le taulaga, aemaise ai o le fuafuaga lea a le Malo mo se Police Academy e faatuina ai i i, ia e momoli le faafetai o se tasi nei

atinae taua ua leva ona fuafua mai, ia talosia ae vave ona tupu aua e matua talafeagai mo le tatou Ofisa o Leoleo, e le gata mo totonu o le tatou atunuu, aemaise atunuu i fafo e ave i ai tatou tama fanau e faigaluega ai pe a maea ona aooga i lea vaega.

Na pau lava nai mea ia lau Afioga i le Palemia ma le Kapeneta e tataua ona toe tagai i ai, o le auala lea i Falelauniu, lea e oso atu i Falelauniu ona ea ae lea i Aleisa. O le auala lea o lo o faaogaina tele e le mamalu o le atunuu i lea foi vaega tatou te faaogaina i le tele o taimi. Sa talosagaina muamua lau Afioga ae faapea mai se i maea le auala sima foi lea ona toe feiloai foi lea ma le Afioga i le Minisita, ona o lea sa eli mai pou uila foi nei, se i maea. O lea la ua maea lea vaega, ua tataua ona faaleleia lea vaega lau Afioga, e aoga tele le auala lea fuafua i le tele o taavale, tele tagata o lo o afifio ai, aemaise le taavale a le Sui Fofoga Fetalai ua toetiiti lava lavea i le vaega lea. E le gata i lea lau Afioga, o Falelauniutai i le mea lea e nonofo ai ma nofoaga fou, ou te talitonu a e toe oo i ai, ua tele lava le faaletonu o auala. Sa ma feiloai ma le Afioga i le Pule Sili o le Matagaluega, saunoa mai o auala ia o lo o i lalo o le Samoa Land. Ou te talitonu e i ai fetuunaiga faapea, ae mafai lava ona faatino e tatou i lalo o le tatou Malo se feutanaiga e faatino ai nei auala, aua foi le tele o nai tagata o le atunuu o nofoia. Ma le vaega mulimuli lau Afioga i le Minisita o Aoga, i le aoga lea ua taua ona ua faatupulaia tele. A fuafua i ai, e tasi le Kolisi i Faleata, a ua toatele tele alo ma fanau. O le taimi nei, tusa ma le fa Primary School la e agai i uta i le college e tasi, le kolisi e tasi, o le vaega lea. A o lo o uia pea auala e masani ai, o le fai o le talosaga ma fai le suesuega ona tuu atu lea e tagai i ai lau Afioga.

Ona ou oo mai lea i le Tala o le Tupe lau Afioga, e le tele se tala i ai aua o matou o le Komiti o Tupe ua uma ona suesueina ma... e le tele foi se vaegatupe ua tuuina mai mo le faaauauina o le tatou galuega seia maea lenei tausaga faaletupe. Na pau le mea lea e fia fesili ai, ua taua e nisi o sui usufono, o lea ua pau maualalo le tau o le suauu. E tatou te iloa uma lava, a pau maualalo, e le umi lava ae toe alu foi i luga. Ae i lenei lava vaitaimi ua pau ai, e tataua la ona atagia mai i le tau o oloa, tau o le penisini, tau o le eletise, o mea na e tataua ona atagia mai i le taimi lenei i lea foi pau ina ia mapu nai tagata. Aua o lea ua ou vaai i ai e augofie tele faioloa ma i latou nei e gaosia le eletise ma tatou e sii ma tuuai i le penisini, o lea la ua matua pau ua ova i le 60% le pau o le paelo lea ua i ai nei. Ae pei lava e augofie e sii ae augata e faapau, leaga e tele le fesootaiga o le tau o le eletise ma le tau o le soifuaga ma le tau o le suauu. O lea e tuualalo atu ai, se i tagai ane i le vaega lea, e le gata i le tau o oloa, aemaise lava i le tau o le tatou eletise, aua o lea ua saunoa lau Afioga i le Minisita o le a aveese le surcharge, a o lea lava e sau le fuel charge. Ia, o lau pili la lea i le taimi nei, mai ia Tesema, e \$117 le pili o le faaogaina, ae \$182 le fuel charge. Ua tele atu le fuel charge i le faaogaina, tuu i ai ma le isi charge, oo loa toetiiti lava \$400, e \$356 le pili. E pei o nai vaega ia lau Afioga i le Minisita e te tagai ane i ai i le vaega lea.

FOFOGA FETALAI: Malie le sui usufono o lo o saunoa se i tulai mai le Minisita mo le Malosiaga Faa-Eletise.

Afioga Hon Manualesagalala Enokati Posala: Lau Afioga i le Fofoga Fetalai, atonu foi e aoga se i fai se malologa a le sui usufono mamalu na sausau. Ae o lea sa faamanino atu tulaga o le tatou suiga lea ua i ai le tariff i

le tulaga o le faatinoga o le tatou pili lea ua i ai a le EPC, e tolu vaega ia ua vaevae ai, o le tulaga i debt charge o le tulaga foi lea i aitalafu a le Matagaluega lea e faapoopo i ai, o le usage charge, o le tulaga lea e vaetolu, e tolu levels lea e i ai, o lalo mai o le 50 iunite e 20sene, o lalo mai o le 100, e 39sene ma luga atu. O la e foi lava e taumafai i le eseese o lo o i ai le domestic consumers ma le vaega o la e i luga i le pisinisi. A o vaevaega na o lea e taumafai ai ina ia faamama le tau o le eletise o lo o i ai nei. O le tatou fuel charge e pei lava ona faailoa atu, afai e pau i le masina leni, o le masina lea e i le lumanai e effective ai ona o lea o lo o galulue faatasi ma le Regulator, o i latou na e ave i ai tulaga o mea ia, ona mafai lea ona galulue faatasi. E le o faia pitotasi e le EPC aua o le tulaga lena o lea e matau atu, ai o faapitotasi, e leai. O la e galulue ma le Pule Faatonu i mea ua uma ona faataatia ma tulaga o le tau ona mafai ai lea ona faatino, ne i te i ua i ai se mafaufau faapena e aafia ai fuafuaga, a o la e faagasolo lelei le tau o le eletise mo le tolu tausaga. O la e fuafua i ai e tatau ona faatino e le i oo i le masina o Me o leni tausaga. Ma le faaaloalo lava.

FOFOGA FETALAI: Ia, faaiu maia le saunoaga.

Tofa LEALAILEPULE RIMONI AIAFI: Faafetai i lau Afioga i le Minisita mo le faamalamalama. O le a ou see ese ma lea vaega o le mea sili o lea ua silafia e le Afioga i le Minisita, faafetai o lea o le a pau foi le tau i le masina.

Sa ou oo foi vaai le Afioga i le Minisita....

Susuga Hon Tuilaepa Fatialofa Lupesoliai Aiono Neioti Sailele Malielegaoi: E manino lelei le mea lea a? O le faiga lea e i ai, afai o le fuel lea e aumai, lea na aumai i le tau maualuga, ona aumai loa lea stock tatou po o le tolu masina aua o lea e aumai i le vaa tele, a pau mai la i fafo pau loa, a o la e sa sau i le tau taugata. Ua e maua mai? O lona uiga la o la e ua gau latou. E faapena la, a sau sau alu i luga le tau, a o lea na sau i le tau maualalo ona make lea o latou, ae lafo atu i le masina foi lea. O le ala lena o lea e taufai fekavaai lava i le faiga lea tatou te alu ai, ona po o le tolu masina e sau ai le fuel lea, a sau i le tau maualuga ae pau faafuasei i lalo le tau lea mai fafo, ona gau loa lea o le vaega lea, aua o lea ua faamalosia e alu i lalo le latou tau e faatau mai ai le penisini ona gau ai loa lea o latou.

Lau Afioga i le Fofoga Fetalai, o le mafuaaga lena, e i ai lava le time lapse i le fetuunaiga lea ona o le penisini lea e sau mai fafo i le tau maualuga, ona tuu loa lea i totonu o tatou mau tane nei e tele lava lea e i ai, faasolo mai loa, ae sau loa ua pau lava i lalo, ae o lea la ua gau latou i luga i i. O le mea la lena e ala ai ona taua tele le tatou faiga lea e i ai nei. Ua e maua mai Leala?

Tofa LEALAILEPULE RIMONI AIAFI: Faafetai i lau Afioga. O lea la ua matuai faamalamalama e le Afioga i le Palemia le mea lea na tatou fesili ai i le isi taimi, manaia e tolu masina. O lona uiga la, aua o le mea lea e tupu, a sii foi la fafo taeao, o le mea la lena o lea ou te fai atu ai, a pau fafo, e tolu masina faatoa pau tatou, ae a sii fafo, e sii foi ma tatou taeao. Ia tailo i ai, ae faafetai a toe sii nei le penisini ia Ianuari, faatoa toe sii foi tatou ia Aperila. Ia, lau Afioga i le Minisita, ua tipi lou moli.

FOFOGA FETALAI: Malie le sui usufono se i tulai atu le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, o le mafuaaga lena e ala ai ona taua tele le faiga faavae lea tatou te alu ai, o le mea foi lea e fekavaai lava, ae le o mafai la ona fai i isi atunuu le faiga lea. A sau lava ua manuia tatou ua manuia foi tatou, ae a sau foi ua oti latou, ia ona oti ai lava lea o latou faalausosoo ae o lea e manuia tatou.

Lau Afioga i le Fofoga Fetalai, e faapena le faiga o le fetuunaiga lea e fai nei, e le faapea o le a sau, oti, oti, oti latou kaput loa. O fea la tatou te o i ai? Lau Afioga i le Fofoga Fetalai, e faapena le fetuunaiga, e i ai taimi e manuia ai tatou, e i ai foi taimi e manuia ai latou. A o le tulaga lea o le maketi, luga, lalo, luga, lalo, e pei lava o le upu foi lele, “E oso pea le la.”

Tofa LEALAILEPULE RIMONI AIAFI: Malo faafetai. Lau Afioga i le Fofoga Fetalai, o le mea lea ua tau tipi lou moli i le isi aso, ae ou alu atu ae omai lau fanau ma le pepa o le a tipi le moli, ou fai atu, “Aisea?” Ae sau ai la ma le note faapea e \$50 e toe faaola ai. O le uiga la o lau tala, afai ua tipi le moli o le tagata ona ua le lava lana tupe e totogi ai lana pili, ae toe faaopoopo atu ma le \$50 e toe faaola ai, matua tele la o le... Fuafua i lenei vaitaimi i le tele o resources ma mea e faaoga, ae faafetai i le Afioga i le Minisita, na oo i ai.

FOFOGA FETALAI: Malie le sui usufono se i tulai mai le Afioga i le Minisita mo Galuega, Felauaiga ma Atinae Eseeese.

Afioga Hon Manualesagalala Enokati Posala: Lau Afioga i le Fofoga Fetalai, o lena ua i ai fuafuaga a le Faalapotopotoga e tataua ona cashpower, a o i lea e puna mai ai, o le sui usufono mamalu e le o manao e cashpower, o la e manao e faitau lana mita. O tulaga la a faitau le mita, o lona uiga a toe totogi reconnection fee e \$50. A o le cashpower ia, e faigofie lava e te alu atu lava oe ia totogi e leai se mea e faaopoopo i luga. Ae o le le usitaia o faiga faavae lea e ala ai ona afaina. Ma le faaaloalo lava.

Tofa LEALAILEPULE RIMONI AIAFI: Faafetai – e tasi lenei Minisita ua pipii ana taai matautia o ana faiga lelei lea e i ai, ae o le a amata ona toe toese i aga mea ia. Ia, e i ai la le isi faiga fou lea a le EPC ma le Vai, sa i ai le fanua na ou faatauina i le tausaga nei, ou sau loa lea totogi le tupe e faaola le vai ma le moli, ae fai mai le teine, “E totogi muamua le \$4,000 o le arrears la e i le fanua lea, o le pili lea o le moli.” Ou fai atu, “aisea?” Se o le faiga lava lena, leaga o lea ua e faatauina le fanua, ua e faatau foi la ma le aitalafu o le pili o le moli. Ou fai atu, “O ai na faia lea tulafono le alofa ma le vaivai tele? O le a le mea o le a totogi ai o le pili na fai e le isi tagata.” Fai mai, “O mea lava na a matou o lea e fai.” Ou fai atu, “Ia ta le 4:00 ua ola lou moli, a le ola lou moli, ou te oo i le Minisita ona outou vaai foi lea i ai.” Ae faafetai lava la aua na o atu nai tagata faaola... Aua o le mea muamua, e le tataua ona oo i le \$4,000 le pili. Ae faafetai i le Afioga i le Minisita... Ae ou sau i le Vai, fai mai, “Leala, e \$280 le pili vai a le aiga lea sa i ai.” Ou fai atu, “aisea?” Ae fai mai foi le tala lea. Ou fai atu, “Vaai outou, e le faapea e nonofo nonofo outou faapea e otometi le iloa e tagata faatau fanua ma fai mea ia, tou tulafono.”

Aua e le o ni tulafono mea ia o mea o internal policies foi lea a latou. O lea la ua ou alu atu nei ae fai mai, “Se e totogi muamua le aitalafu a le tagata lea e i ai ona faatoa mafai lea ona faaola o lou vai.” Ia se i vaai i nei faiga le alofa ma le... O le a le mea o le a totogi ai fua e Lealailepule le vai na taele ai le isi tagata? Ia ae le afaina, se i vaai ifo lau Afioga i lea vaega, aua e moni e faaataata a lafoga, ae leaga o faiga faavae i totonu o Matagaluega nei e tatau ona toe tagai i ai. Afai foi la e i ai, e tatau ona logo Loia ma tagata o faatauina fanua ina ia tagai i le vaega lea e kilia aitalafu ae le i faia lea faiga aua o se faiga fou.

Ia, ona ou oo mai lea i le Afioga i le Minisita mo Punaoa Faanatura ma le Siosiomaga, se malo faafetai. I timuga tetele ia na fai nei na lolovai ai Siumu matou poloka ai i ina ma... Sa i ai la lou manatu lau Afioga, pe le mafai ona tuu i totonu o lau kalena faaletausaga i le taimi o timuga ma nai tagata nei e faamamaina drainage ma alavai ma mea faapena, fai faapolokalame, a oo lava i le taimi o timuga, ua tatau ona faamuamua. Afai o i ai, ia faafetai. A o lau vaai i le aso lea, o le ala lea o le tele o le faaletonu. Na ou tau sailia si faipule o Siumu po o fea o lafi ai i le alu atu o le vai, ae faafetai o lo o saogalemu aua ai sa i Apia.

Lau Afioga...

FOFOGA FETALAI: Ia, ua lavea fua le maaveave le fua. Tulai mai le sui usufono mo Siumu.

Tofa Hon Tuuu Anasii Leota: Lau Afioga i le Fofoga Fetalai, ou te le iloa po o fea sa i ai le sui usufono lea ae o lea sa faapea mai sa asiasi atu i tua. O la e sa ou i tua, a o ituaiga tala nei faapea e ono afaina ai sui usufono aua o la e faafofoga mai itumalo faapea o la e tafafao faipule e le o omai e vaai a latou galuega. O la e sa ou i ai, ae ou te le iloa la po o fea sa i ai le sui usufono. Ma lou faaaloalo.

FOFOGA FETALAI: Malie Lealailepule se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le alia lea sa taua e le sui usufono mo Faleata Sisifo, lea foi sa saunoa i ai le sui usufono mo Siumu, masalo e le o se taimi muamua lea ua tupu ai le mea lea, ma e sao tasi lena alia e tatau ona silasila totoa i ai le Matagaluega.

O le mea na ou iloa, masalo pe maua le...e fai sina umi ona ua pa faasoloatoa ona sau lea faalautatai le sau o le vai, a o le laitiiti ia o le alia, o lona uiga e tatau ona alu ai se bulldozer e alu atu lava i tai e alu i uta, e alu lava e saili lelei le mafuaaga o le mea lea ma atonu e moomia le faaloloto o le alavai, aua ne i toe pa i autafa ma sau faalautatai lea. Na ala ona ou iloa ona sa ou malaga i tua o le Aso Sa na tupu ai le mea lea, ona ou tilotilo atu lea i le sau o le matagi ma le sau o le tautau ma le timu, ia ona ou fuaina loa lea, ou tilotilo atu, masalo po o le itula e ono tupu ai le mea lea, ona ou oso loa lea i lau taavale ta o le afa o le 3:30 ou alu i tua oso atu i i, e 15 minute talu ona ou pasi atu i i, ae logo atu au i le telefoni e le isi vaega ua pa le vaitafe. E faapena la le mea, e te matau i le lagi ia aga o le tau, ona fua foi lea o lau malaga. O latou uma lava ia e le i vaai i luga ae na ona oso lava i le taavale

ona sau loa laia ae le tilotilo i luga i le lagi, na feoti uma ai lava i i i le mea lea, ae na o si tama lava na sao ai i ina, ia ua ou foi mai i le ta o le 6:00 ua toe maui, aua o aga ia o vai e pa, a pa le vai, na o le 30 lava minute e te faatali ai ona toe alu ifo loa lea i lalo o le vai faatoa alu lau taavale, ou te faia soo lava le mea na i le alia lea e i i i Siloi i Lepa, ou te alu atu loa ua pa, na o le 30 lava minute e te faatali ai, e faapena foi la i vai uma lava ia pei o vai ia i Savaii, na o le 30 lava minute e te faatali ai, ia ona toe maui loa lea i lalo. O le mea lea tatou ia e le i masani ai, e 30 minute.

FOFOGA FETALAI: Tulai mai le sui usufono, oi, ia malie se i tulai mai.....

Tofa Hon Tuuu Anasii Leota: Lau Afioga i le Fofoga Fetalai, leai o lau fesili i le sui usufono, ua e malamalama la, ua manino? Faafetai.

Tofa LEALAILEPULE RIMONI AIAFI: Faafetai. Sa ou alu i tua i Siumu, e tau mama pea isi uso, na ou alu atu e sue se vaega se tagata o lau Pati e la te tauva, fiu e sue se isi fai mai, Tuuu is number one, ia Tuuu ua a la?

Ia o le a ou le toe tautala i air conditions aua o lea ua saunoa le Afioga i le Minisita mo le Bilateral project ia lelei, pau lava le mea o le tufaga ia ae le afaina, taatia lea vaega o lena ua.....A o le isi vaega lea e tagai i ai lau Afioga mo mea o fanua, pe le i ai se faiga e tuufaatasi uma fanua o lea e i lalo o le Malo i se Faalapotopotoga e tasi, afai o le Samoa Land, ia pe le mafai ona transfer uma i ai fanua, aua a ta alu atu i le isi fanua, fai mai o la e i lalo o le Matagaluega o le MNRE, o isi la e i le STEC, o isi la e i o i.....

FOFOGA FETALAI: Malie le sui, se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le faiga lea sa fai ai ia fanua ia na fai i le tausaga e 1991 ina ua tuanai ia le Afa o Ofa i le 1990, na matua koli ai moamoa ia niu i o i le tatou fanua foi lea le Esetete Tausi, e lima tausaga e le i toe avea se tatou popo i fafo, o i ina na amata ai ona tapunipuni a tatou fale suauu lea i Vaitele ma tapuni atoa ai ma tatou koko e le i toe alu se koko, e oo foi i koko latou ua oki atoa. O le 1990 o lena la sa faataoto mai ai le mafauauga e sili ia ona tuumavaevae ia eleele nei. Ua ala la ona ou taua le mea lea, o lea ua umi le taimi o faatino le fuafuaga lea, o lea foi la ua leva ona toe tilotilo i ai le Kapeneta i le vaega lea i le ono toe reform atoa o fuafuaga ia i le pulega o eleele. Ua ala ona ou vave taua le mea lea, te i foi ua oo ane ina faatino fuafuaga ua atoa nei le tausaga talu ona faatalatalanoa ae faapea foi le sui usufono mo Faleata Sisifo, “ia o mea la ia na matou fai atu e fai,” aemaise lava le Taitai o le Itu Agai, pei ua outou amio ai i lea mea. O lea la ou te tau atua, ua leva ona foi mai ia Minisita uma nei i le talanoaga o mataupu na, aemaise la le Minisita lea e fitoitonu i ai mea tau eleele, a, ua leva ona ia faatalanoaina le mataupu lenei ma o lo o liuliu malie pea i ai ia finagalo o le Kapeneta i le taimi nei. Ua ou vave tau atua le mea lea leaga ua outou amio ai i le mea lea o le fai atu lava o lea mea, “o lea la ua fai le mea na matou fai atu ai.”

Tofa LEALAILEPULE RIMONI AIAFI: Faafetai, se e ese le manaia o lea la ua faatino ua leva.

Lau Afioga sa ou faalogologo mai a o saunoa le Afioga i se tasi o sui usufono mo Aana Alofi Nu. 1. Afioga Hon Leaupepe Toleafoa Apulu Faafisi o se tasi lenei o sui usufono sinia o le Maota, o le auala lea e alu i luga i le Mount Vaea, faafetai e ui lava e le i oo i ai si toaina i luga, a o lea na te maua le taua tele o lea auala i tagata tafafao maimoa mai, leaga la o matou lea matou te ae soo ai, e silafia e le Afioga i le Minisita na ma o i ai i le isi aso, ia e tuai lava ae faafetai na oo i luga. E tele tele tagata e faaogaina le....

Susuga Hon Tuilaepa Fatialofa Lupesoliai Aiono Neioti Sailele Malielegaoui: E faafesili atu o Vaea po o Vailima i le mea lea e taoto ai ia Tusitala, o fea?

Tofa LEALAILEPULE RIMONI AIAFI: Lau Afioga ou te ae mai Vaea ona ou toe oso mai lea i lalo i i, ou te ae mai Vailima ae ou sau i lalo i Vaea.

Susuga Hon Tuilaepa Fatialofa Lupesoliai Aiono Neioti Sailele Malielegaoui: E ala ona ou fai atu, e le tasi se auala, e lua auala e alu i luga, ne i te i ua e faapea e matou te le i foi mai, ua matou foi uma mai lava i auala na.

FOFOGA FETALAI: Tulai mai lau Afioga i le Minisita.

Tofa Hon Faamoetauloa Lealaiauloto Ulaitino Faale Tumaalii: Lau Afioga i le Fofoga Fetalai, e leai lava se manatu e faalavelave a o saunoa le sui usufono, aua o lea e silafia e le sui usufono na mulimuli ona ou savali ai i le ala savali lea i lo le sui mamalu. Ou te le iloa foi pe na oo i luga i le tuugamau o Tusitala. Na ou oo i luga i le tuugamau o Tusitala, a o galulue lau Matagaluega i le faaleleiga o le auala lea e agai i luga, e le gata i le auala umi i le taamilo mai i le isi itu, a o le auala puupuu lea e omai ai i lalo i mea o auala foi ia faasitepu, sa galulue ai lava le Matagaluega i le tulaga la lea pei ona laga foi i le isi Fonotaga muamua. Ou te le iloa i le sui mamalu pe nao o i luga i le tuugamau, a o au lea na mulimuli i ai ou oo i ai e siaki le Matagaluega, ou te alu atu lava o la e faigaluega le Matagaluega, o la foi na tapue ai ou ata i luga o le tuugamau o Tusitala na ou oo i ai e fai ma pine faamau ne i outou faapea ai e lē moni le faamatalaga.

Tofa LEALAILEPULE RIMONI AIAFI: Faafetai i le Afioga i le Minisita, e ese le alu e tafao, ese le alu e koloni, o lea ou te talanoa atu o au ou te koloni ou te le i alu e tafao pei o le Afioga i le Minisita.

Ae o le mea lea ou te tuualalo atu ai i lau Afioga, ese le tele o Meli ia e omai ma tagata tafafao maimoa mai, pe le mafai la ona tagai i ai i Vaea i le mea lea e saunoa atu ai le Afioga i le Palemia e fai atu ai se auala, e manatua Meli ia e le atoa se 24 itula e omai ai, ona taumafai ona alu i ai se pasi e ave tagata, ia e savali pe na o se 200mita ae totogi, ou te iloa o le tasi lea alagatupe a tatou ona e tele tagata e fia o i luga, e tele nai tagata matutua e o atu, e le au i luga ona o le tulaga ua i ai le auala, ae na ona taatia atu i talaane o lau Afioga, o le a ou see ese ma lea vaega, faafetai.

Ona oo mai ai lea i i le Ofisa o le LTA, e fai lava sina ou popolega i mea nei o moagavao i le auala lau Afioga i le Minisita, e talitonu lava e i ai pe mafai ona toe faamalosia se Tulafono ina ia i ai se puipuiga mo le au moavao ina ia saogalemu tagata feoi ma taavale i vaega ia mai le au moavao.

Na ou oo mai ai lea i le NPF lau Afioga, e talitonu e le toe tele se faamatalaga i ai aua e i ai foi le Tulafono lea e mulimuli mai, e momoli le faafetai i lau Afioga i le Palemia ma le Kapeneta ua mafai ona toe fai se faaiuga e toe tuu ai i tua le mea lea. A tatou faia se faaiuga ogaoga faapea i le NPF lava latou, e tatau ona outou faia ina ia manuia ai tagata faisaofaga, on the best interest of the contributors, ia o lea la ua tulai mai le tulaga o i ai, o lou lava sui usufono o lau fautuaga i lau Afioga, ia taofi nei mea aua ne i faia, ia faaopopo i ai se isi 10% ia lava tupe e ola ai tagata ma o e fai o latou aiga ma atiae o latou aiga ma tulaga uma faapena. Aua o le interest rates lea e i ai nei i le personal loans e 9%, afai la e alolofa moni i tagata faisaofaga, e tatau ona tuu i lalo a latou interest rates i lou talitonuga e 4% pe 5%, ia ae faafetai ua taatia lea vaega ae se i toe faatele i ai se upu pe a talanoaina le isi Tulafono lea e aumai.

Ona oo mai lea i i le Ofisa o Faatoaga, faafetai i le Afioga i le Minisita i suiga lelei ma suiga e tele o lea ua achieve isi au milestone foi lele i food security, o lea ua e mei i luga i le level foi lele o le export lea ua amata ona fai. A ou matauina le tele o le toe faatupulaia o le manu ainiu, e manatua foi e tolu ituaiga manu ainiu, a, lea sa i ai i aso ia o le brontisa ea le igoa o le isi, a o rhinoceros le isi, ua galo ia te au le igoa o le isi manu ainiu. Ia po o tagai i ai lau Afioga i le vaega lea, aua e tatou te femeiai solo fua e tatou te toe tua lava i i mo tatou oloa e ave i fafo ma galuega a tatou fanau, o le mea o lo o aupito sili ona tepa taulai i ai lo tatou Malo i lenei vaitau i le mea o le sueina o galuega mo nai a tatou fanau.

Faafetai i lau Afioga i le Minisita i le tatou uafu, ia ua matua aleluia matou nei e o i Savaii ma omai i le tulaga maualuga ua i ai le tatou uafu i le va lea o Salelologa ma Mulifanua, faafetai foi i le Afioga i le Pule o le SPA i le latou foi galuega sa fai, ia a o lea ua manaia le tuumavaevaega lea e i ai, ia tuu atoa lona ia malosi ma le latou galuega i International Ports, ae taatia uafu ia mo i latou o lo o faaogaina domestic, aua o customers o tagata feoi, o tagata feoi o le kamupani vaa, ia o vaa, o vaa o kamupani vaa, o lea foi ua latou faatinoa uafu e lelei atoatoa ina ia faigofie ma lelei femalagaiga a tagata, e momoli atu le faamalo tele i ia suiga lelei.

Ia lau Afioga i le Minisita mo Aoga, Taaloga ma Aganuu, e manaia le lauga a le Afioga i le Palemia lea na tatou i ai i le tatalaina o le tou Conference, lea sa toe faamamafa ai le mataupu lea o le numera, ia e le o se taimi muamua lea sa avatu ai sou manatu i lea vaega o le Science teachers, po o fea po o ua le mafai ona toe faaauau le tatou paaga ma Initia lea na aumai ai nai tagata Initia i aso ia e faiaoga i aoga ia i kolisi, kolisi a le lotu, kolisi a le malo, lea na matua maualuga ai le tulaga o le aoaoina o tatou fanau i le Science aemaise le mataupu lea o le numera ma le physics. O lea ua ave le tele o faiaoga e faaaoga, ia a o le taimi tonu la lenei e aumai ai ia lea vaega se i tau fesoasoani i tulaga o i ai lea ua atagia i suega a le fanau. Ma ou te faaluaina le saunoaga a le Afioga i le Sui Fofoga Fetalai, e matua lagolagoina le tulaga lea ua i ai nei e faaoga raw marks, very misleading le mea lea sa i ai nei i le faaogaaga o mea ia o scaling ma taumafai e standardize marks, e matua le

talafeagai, ae faafetai o lena ua toe aumai i luga e atagia tonu ai lava le capabilities o le tamaitiiti latou e faaauau ai.

Sa faaali foi lou finagalo i le Kolisi o Samoa, ia faafetai o lea ua toe aumai le avanoa tatou te toe fetuunai ai i le faaauauina o le Kolisi o Samoa – ma ua nofo sauni foi tama tuai ma teine tuai o le kolisi e faaauau le aoga i le tulaga e tatau ona i ai, ma toe taumafai e siitia le tulaga i le naunautaiga sa ala ai ona faatuina le aoga.

Ona ou oo mai ai lea i le Matagaluega lea o le Komisi o Galuega a le Malo, ia o le mea moni lau Afioga i le Minisita, e tele tele ia faitioga i faaiuga fai i lenei vaitaimi. I lau matau, e lua lava mea e ala ai ona faitio tagata i le faaletonu, o le sese o le process o le faatinoga o le faiga o le faaiuga, po o le faaletonu o le tagata la e faia le faaiuga. Ia se i tagatagai ifo i ai i vaega ia e i ai nei le faiga o filifiliga o tagata faigaluega ma tulaga faapena. I lau lava tilotilo i le role a le PSC e tatau ona i ai, e pau lava le mea ia latou facilitate ma coordinate Matagaluega uma a le Malo ia laugatasia le tele o Matagaluega a le Malo i galuega fai ma galuega faatino, aua o le expertise o le potu ma le iloa i le faatinoina o galuega, o lo o i totonu lava o Matagaluega taitasi a le Malo, aemaise lava i le filifiliga o Pule Lagolago po o ACEO. Se i toe tagai ifo i ai lau Afioga i lea vaega ona e le o se Tulafono fou, a o le Tulafono ua leva ona i ai, ae sa le tele ni faitinoaga i ai ma ni tulaga e tulai mai, a o lea ua pei ua atagia...ia o le mea lea e taatia atu i lau Afioga i le Minisita. A tulai mai, ia se i tagai ifo i lea vaega.

O lau fesili lau Afioga i le Palemia, po o fea ua oo i ai le tatou kamupani foi lea o le Bumble Bee. Ua leva ona ta fia vaai ia Bumble Bee ua oo mai iinei i Samoa ma nisi kamupani e fesoasoani i le tatou atunuu i galuega fai ma ni galuega a tatou fanau. Se i tagai i ai aua o lea tatou te tilotilo i le faatosinaina mai o tagata faipisinisi, a o lau vaai e tatau ona tatou tilotilo muamua i le process lea pe faigofie ona ofi mai tagata faipisinisi iinei ina ia fesoasoani, aua foi ia vaega taua o ni falegaosi mea aua galuega faatupulaia.

Lau Afioga i le Minisita mo le Soifua Maloloina, faafetai mo le.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Malie le sui usufono se i tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O aso nei i le internet, facebook, twitters ma so o se faitioga lava e fai iinei e taamilo i le lalolagi. O le mea lea ua tupu, o kamupani na fia omai i Samoa e tai pei o le Yazaki e tele ai a tatou galuega, a o le faatu atu lava o lea mea faitio. O lea e tau toso mai kamupani e fai a tatou galuega ma maua ai a tatou galuega, a o le tele ia o le mau faitioga e faapea, o le a aumai foi nei na kamupani o le a eloeloa ai le mea. Se i vaai la i ituaiga mea ia, o ituaiga mea ia o lea e alu atu i fafo, ona tilotilo ifo lea o tagata e ona kamupani e ese upu ia matou te avatua ae ese foi upu ia e alu atu solo, a o gagana foi e alu atu ai, oi se e matautia ia gagana.

Lau Afioga i le Fofoga Fetalai, o le tulaga lena. O lea e taumafai le Malo e toso mai atinae tetele i fafo, ae a alu atu nei mau gagana ia, oka. O lea foi e le i faitauina le tatou Tulafono e toso mai ai pisinisi i fafo, a o lea ua outou fai

mai o le a faatau passports, ae leai ma ni passport o faatauina, e leai ma ni sitiseni o faatauina. O le anoanoai ia o nei otaota e alu atu i fafo. O ai la ni pisinisi a fia omai?

O le mea lea e fai ai nei finauga, o lea e tau i ai, “Vaai, aua tou te amanaia mea ia o le pola e motu i tua, ae omai pea.” O lea la e fai finauga iinei, ae faapefea mea ia e ta mai i i?

Lau Afioga i le Fofoga Fetalai, se se i outou alolofa ia aemaise lava oe le Taitai o le Itu Agai. Ia manuia le Fonotaga.

Afioga Hon Palusalua Faapo II: Lau Afioga i le Fofoga Fetalai.

FOFOGA FETALAI: O lea o le a ou faataga atu ona o le ua taua o lou suafa.

Afioga Hon Palusalua Faapo II: O le mea e fia faasao. E tasi lava le fesili na fai. O le **Bumble Bee** aua na matou matua lagolagoina lava le **Bumble Bee**, ae ua leiloa po o fea ua oo i ai, lea ua leai ae o lea e pei o le a tuuaia fua leni Itu.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea e fia faasao. Masalo pe fa, pe lima au interviews e fai i aso Tofi i le tau talitaliga o faitioga, “O le a eloeloa le taulaga e pei o Tutuila.” E i ai lau upu na fai i ai, “E ai na elo a o le mea sili ua maua galuega e maua ai meaai?”

Lau Afioga i le Fofoga Fetalai, o le tulaga lena. Se i outou alolofa ia, se i tau taofiofi ona o lea e salalau faamatalaga i fafo. O le taimi lava na aumai ai le tuualalo a tama o le aulakapi e aveese sui e toalua o le matou Iuni, oi sole, se e pei o le sau a le a, “Ua ai uma e le vaega lena tupe.” Se i vaai i ai? E oo i lipoti, a o lipoti o le audit opinion, o accounts a le Iuni i le 2011-2013, e leai lava ma se mea faaletonu o i ai.

Ua ese le taimi leni, o le taimi o le malosi o le social media. O mea ia e alu atu i le facebook i fafo, o le matua maoae. O lea foi na ou te i ai ua omai le nuu o Sili ia te au e aumai le latou ifoga ona o ni upu soona lafo e se tasi o taulelea o le nuu. O le tulaga lena i aso nei i le mea lea ua i ai nei i le malosi o le alu atu a le taufaaleaga iinei, ona salalau loa lea i itu e fia o le lalolagi. O la e faitau ai kamupani nei e fia omai i Samoa. O ai la ni kamupani e fia omai? E le afaina lava i le lautele, ae a alu atu i totonu o le Palemene, oi tafiaola e i le tele o le damage. O le a afaina le tatou atunuu i taumafaiga a le Malo e toso mai pisinisi tetele e tai pei o le Yazaki. A na maua ni Yazaki se sefulu i ituaiga faapena, oka, e ova i le 10,000+ fanau a Samoa e maua ai a latou galuega.

O le faasilasilaga lena, a o le Bumble bee o la e le i faapea ua motu. O lo o faapea e amata i le tausaga nei, a o mea la ia e alu atu iinei, o le mafuaaga lena ua tau faatuatua ai. E tataua ona maua mai se faamatalaga ia latou i le vaiaso leni, i a latou negotiations la e fai. E le faapea ua faapea mai e le omai, a o la lava e sau le latou aveai e omai lava, ae ona o mea la ia.

Se i outou alolofa la se i amata ona faagaoioi kamupani ona faatoa fai lea o a outou faitioga, a o le tu fua lea faitio ae e le i oo mai ni mea, a o tulaga na e oo i ai tatou.

Afioga Hon Palusalue Faapo II: Lau Afioga i le Fofoga Fetalai, leaga e matuia saunoaga a le Alii Palemia faapea o matou lea matou te upusea ma avatu le gagana e le fia omai ai ni kamupani iinei.

O le mea lea e popole ai lou taofi ma lenei Itu, ina ne i fai mea ia e fai ma excuses le fiu o le Malo e aumai kamupani i totonu o le atunuu, ona alo loa lea faapea o le taufaaleaga ma tulaga faapena. Ona pau le mea ia silafia e le Afioga i le Palemia, o lea e matua avatu le lagolago a le Itu lenei ina ia taunuu lea mea. O le mea foi lena o lea e i le agaga o le Itu lenei, ia tele ni a tatou fale faigaluega.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e matua ese lava upu ia e fai i totonu o le Palemene ese ma a outou interviews ma le Observer ma le anoano o mea la e sau ai. Se o la e faafogafoga mai le atunuu, o la e faitau ai i a outou mea. O oe.....

Afioga Hon Palusalue Faapo II: Lau Afioga, o oe lava lea e faailoa mai i le Observer, Leitio ma le TV i po uma.

FOFOGA FETALAI: O lea ua maua. E ese le mataupu lea e tau faamalamalama. O lea e tau faamalamalama leaga o lea ou te molimau leaga e tele ina agai mai foi fesili a le au faasalalau lea e i fafo ia te au ona o a outou saunoaga. Afai la e aoga fautuaga ia ua avatu i le aso lenei, ia tapu ai la iinei. Aua ne i toe faia ni a outou faasalalaua i mea ia leaga o lea ou te molimau atu.

A tatou o nei e tulituliloa tagata nei e agai mai ona o a outou saunoaga nei e fai i fafo; ia outou alolofa i le atunuu. Aua ne i toe faia mea ia. O le tautinoga lena, o le agaga lena o lea e taumafai e faamalamalama atu leaga o lea e agai mai a outou fesili i le mea tonu lava lea tatou te finau ai i le aso.

Vaai i le manino o le talosaga a le Alii Palemia, tatou galulue faatasi laia i mea ia. Ia aua, aua ne i tatou aveva ni tala ne i meaane ua aveva ma mea e lepetia ai le mea tele lea tatou te momoo ma talotalo ia aua ne i toe tulai mai mea ia i le atunuu. A o a tatou lava taaloga ia i isi taimi, ia tatou agai e faasolo le tatou polokalame. O felafolafoaiga e tuu saunoa, ae a agai loa i tulaga ia, leaga o lea foi ou te molimau atu, e fiu tagata e tau fesilisili ma tau talitali mea ia e i ai la outou pitolaau ma le pitolaau a le Itu Agai i fafo, ona ou tulai atu foi lea e faamalamalama.

Tulai mai le sui usufono mo Faleata Sisifo.

Afioga Hon Palusalue Faapo II: Lau Afioga i le Fofoga Fetalai, leaga o le tulaga maaleale tele lea ua e saunoa i ai. Ma lou faaaloalo lava, e le mafai ona taofia le aia tatau a le Itu Agai i tulaga o taofi, a o lea ua e saunoa mai.....

FOFOGA FETALAI: Ou te le o agai - o lea o le a ou toe faamalamalama atu.

Afioga Hon Palusalue Faapo II: A o lea ua e saunoa mai e taofi, e le mafai ona e taofia mea ia lau Afioga.

FOFOGA FETALAI: Palu, o lea ou te faamalamalama atua. E tatau ona ou lapatai i mea leaga ia e lau i fafo. Faitalia outou po o fea e faasalalau ai, a o le faaleaga o mea ia e taumafai atu le Malo e faatino, o le itu sili lena ona tatou liolio i ai. A lea e manino le folasaga a le Afioga i le Palemia? A taumafai mai Bumble Bee ae outou taumafai e faaleaga i fafo, o se tulaga lelei lena? Alaala i lalo o lea e taumafai atu lau faamalamalamaga.

Afioga Hon Palusalua Faapo II: O le mea e fia faasao. E leai se faaleaga ae na matou o e lagolago. Na valaaulia matou te lunch, le Vaega lenei, na ave i ai le matou lagolago ae matou te le i o e faaleaga.

FOFOGA FETALAI: Alaala i lalo o lea ou te taumafai atu. O lea tatou te palepalealuga i le mataupu ina ia malamalama. E le o se mea e fai atu ona outou te i te i mai lea leaga o lea ou te taumafai atu e talitali fesili na tou te faia i fafo. E le o ni upu la e faavae i sou manatu, a o lea ou te taumafai e talitali mea ia e i fafo.

Ua faafia ni mea ua tatou taumafai atu ai iinei i le Maota? O le Maota lenei o le faata mo le lumanai. Ua tatou vaai i le mea lea o lea e fofu ai faafitauli o lea e tutupu? E ala ona vevesi le atunuu o tatou. E mai fea? O a tatou tuleiga ma saunoaga o lea e fai iinei. O le ala lea e avatu ai le tuualalo ma ua manino ma malamalama, tatou agai tatou talatalanoa e sii faatasi le avega. A iloa le mea e manuia ai le atunuu, lagolago, o lea e maua la outou lagolago. A o nisi itu, aua tatou te taaalo i le tino leaga tatou te aafia uma lava, ae le aafia na o se toatasi. A aafia le Malo, e aafia foi outou. O le agaga lena o le faamanatu lea na avatu. A o le upu faapea o la outou aiatatau, ia fua la outou aiatatau i le aiatatau a le Palemene lea e puipui. Aua a fesili mai fafo, e fesili mai ia te au o le Taitai o le Palemene lea e faafoea a tatou Fono. O le mea la e alu atu iinei lea e puipui, a o isi a outou mea, faitalia outou.

Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai. E manino lava le saunoaga a le Afioga i le Palemia, o le mea o le social media. Ia te au la ia, o le social media, e le alu i ai sou mafaufau aua na o Palu e fai lana facebook, aua tou te popole fua i ai. A o lenei Itu, e matua lagolago e selau pasene le lagolago i atinae, leaga ona pau lea o le mea na tatou omai ai. Muamua, ia atiae le atunuu. O lona lua, ia puipui i a tatou meatotino. We are the student of the present, ia, anyway.....

Lau Afioga i le Minisita mo le Soifua Maloloina, e faamulimuli lava ia te oe leaga a e tali e uma ai lou taimi. Malo faafetai i au fuafuaga lelei.

Sa gasegase si ou tina i le falemai i le Kerisimasi. Ua le fia tea le loomatua i tua i le manaia o le falemai. E le gata i le manaia ma le mama a o le lelei o le tausiga. Ia, faafetai i mea ia e alu atu nei i le Televisi i faamalositino. Ua leva ona tatau ona fai lea vaega. O le mea e lelei ai, e i ai ma le faa-Samoa, leaga o le tagata a fiafia i le mea malie, ona e alu lava lea e te koloni ma faatino. Ua leva ona tatau ona fai lea mea, e momoli atu le faafetai tele.

Faafetai i le mea foi lea a le tatou SPAGHL, a o lea ua fai e le aoga a le Mamona. E momoli atu le faamalo i le aoga a le Mamona i le latou mea lea ua faamaite nei i le school lunch. E manaia vaega ia ua tele le fesoasoani i o tatou tupulaga mo le agai i luma i le faguvai ma le sanuisi. Po o fea ua fai i ai le SPAGHL.

I le po o le Kirisimasi pe ua tea le 12.00 i le po, ae vili mai lou atalii, “Sau, ua toatele le falemai, a o lea ou te nofonofo e leiloa le taimi e oo ai i luma. Na ou fai atu i ai e nofo i le queue. Na ou alu loa i le falemai. Ou te oo atu ua ta le itula e 1.30 i le vaveao. Ou te alu atu ae fai mai tama, “O lea faatoa alu atu nei lava lou atalii, a o loomatutua ia e valavalaau mai, Leala se na o mai analeila.” Na ou fai atu i ai e onosai, ou sau i tua o nai fomai matutua la e i ai, o tama sinia. Na matou talanoa ma faamalo i ai, e le faigofie le latou galuega. A o le mea e fai atu ai lau tala, fai mai nai tama fomai, ua vevesi le mea o le au manunua lea mai Taufusi. O le lavea o le taavale a le Matagaluega o Falepuipui.

O lea e logo atu ai i lau Afioga i le Ofisa Sili o Pulega ma le Minisita, na ou savali i tua ae etuetu mai le leoleo. Na ou fai atu i ai, “O oe lea na avea le taavale?” Ae fai mai, “E leai lau Afioga, o la ua ave e leoleo.” Na ou fai atu loa, “O le a le mea ua soona alu ai faapea? E tolu taavale na lavevea i ina ma ua right off isi taavale e lua. Na ia fai mai, “Na ou fai atu lava i le tama e faalemu ua oo i moli, ae leai lava.” Na faapea e sau pasi moli, ae e le iloa e taavale ia e o atu aua e leai se sailigi na o le emoemo o moli, na i ai ma nai tagata mai isi taavale na lavevea uma i le faalavelave lea.

O le mea lea e tupu lau Afioga i le Minisita, o tagata nei e le ni avetaavale i mea o defence driving, e eseese avetaavale, e tatau ona tagai i ai lau Afioga.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Se i ou fesili atu lava i le Minisita o le Health i le tulaga lea ua i ai le tatou falemai i le taimi lenei, aua o le a lava le faalavelave faafuasei, ua uma ona faatulaga le falemai ma le tautua ma le vaega e ave i ai ina ia leai se taofia o le service mo isi tagata. O lona uiga ua ese mamao lava le mea lea ua i ai nei ma le mea sa masani ai.

Ua ala ona ou tauina atu lea mea ona e pei e foliga mai i le saunoaga a le sui usufono, o lea ua fai i i le system. E moni lau Afioga i le Alii fomai? Se i aumai sina au faapupulaga i lea mea?

FOFOGA FETALAI: Tulai mai le sui mamalu.

Afioga Hon Tuitama Talalelei Tuitama (Minisita mo le Soifua Maloloina): Faafetai lava mo lenei foi avanoa ua mafai ona maua ai se faamalamalamaga o se tasi foi o mataupu o lo o fia manino i ai le sui usufono aemaise le Maota nei.

O le tulaga tonu lava lea o lo o i ai le tatou falemai fou. O faamoemoega o le falemai fou ina ia vavae ese le vaega lea e taua nei o le A & E po o le Accident and Emergencies lea e togafitia ai mai faafuasei, faalavelave tutupu faafuasei ma mai oso faafuasei ina ia aua ai ne i faalavelavea le vaaaia o i latou tausavali po o mai e le tigaina. E pei o nai manua laiti, taletale, o le flu ma faamai faapena. O mai lava e masani ona vaai i totonu o le outpatient, o

lea la ua vaelua ai le outpatient, o le vaega e vaai ai i latou na e le tigaina ma le vaega e vaai ai i latou ia e tigaina.

O le tulaga lena i le falemai fou lea ua i ai nei. Ona o le faamoemoe la lena, ina ia aua ne i taofia le vaai o i latou ia e le tigaina tele talu ai ona ua taunuu atu mai tigaina. O le faamoemoe foi la o le vaega lea faapitoa o le A & E. Aua o le Accident and Emergency Service, o le specialty, e i ai tomai faapitoa lava e agavaa ai i latou e faigaluega i le vaega lea. O le faamoemoe e le faapea e soo se fomai, ae pei o le mea lea e fai nei i le outpatient, o i latou e auai e tiute ai a uma alu ae alu atu le isi. E fesuisui ai lava i latou e faigaluega ai. O lea foi e aumai e le toatele o le atunuu, e toatele isi ua complain i ai ona e alu atu nei e ese le fomai la e tau atu i ai, ona faapea lea e faatonu e toe sau taeao. E alu atu ua ese foi le isi fomai la ua tiute mai ai.

O le vaega lea o le A & E, o lona faamoemoega lava, o i latou o le aufaigaluega e tumau ona e i ai o latou tomai faapitoa mo le vaaiga.... e pei o le mai fatu, o le fatu pe, o le cardiac arrest, e omai o cardiac infarction pe a faapea ua te i ua punitia faafuasei se alatoto o le fatu, e masani ona tiga ai le fatafata ma faanatinati atu loa i le falemai. A taunuu la, ua masani ai latou ia i le togafitiga o ituaiga gasegase ia e oso faafuasei. O le ala lea o le faamoemoe lea o le tatou falemai fou, ina ia vaelua faapena, e ese le vaega e vaai ai mai faafuasei ia, ese le vaega e vaai ai mai ia. Atonu la ou te le i maua se faamatalaga, pe aisea ua taofia ai le vaaiga o latou ia o mai masani e le tigaina tele ona o le faalavelave lea e taua e le Afioga i le sui mamalu.

Atonu po o i ai foi ni faaletonu aua o fomai foi latou e mamai foi, po o ua le atoatoa le aufaigaluega i lena foi po ae ua talafeagai ma le tupu ai o le faalavelave faafuasei lea, ua le atoa ai ona faatino le faamoemoega na fuafuaina mo le vaaiga o gasegase ia.

O se faamalamalamaga lea i le sui mamalu.

FOFOGA FETALAI: Faaiu mai le saunoaga le sui usufono mo Faleata Sisifo.

Tofa LEALAI PULE RIMONI AIAFI: Faafetai i lau Afioga ua amata ona puupuu toe manino. O le fuafuaga lava ia ma le faanaunautaga e selau pasene, ae i ai taimi e le o gatasi ai ma le faatinoina.

Ia manatua foi o lea ou te talanoa atu i le po o le Kerisimasi, ua leva le po a o ou tafao ai i ina i le falemai aua o le manaia foi ia o le mea ua ta nofonofo ai ma faalogologo ma matamata i galuega a nai fomai. E le faigofie i le gasolo atu o tagata i lea vaveao. Ia manatua foi o le afioga i le Minisita o le fomai, o lona uiga a i ai se taimi e sioti ai le falemai, ia e afio atu le Afioga i le Minisita e faaiila lana taleni ona e le i taitai o lo o talavaou.

Lau Afioga i le Fofoga Fetalai, faafetai mo le avanoa, faafetai foi i le paia ma le mamalu o le tatou Palemene. O le naunautaga, ia fai se tatou sao ma so tatou ai aua le manuia o Samoa. E moni lava e eseese itu tatou te i ai, ae tasi lava le manulauti na tatou oo mai ai i le Palemene o Samoa. Faafetai i Ofisa Sili o Pulega ma Pule Lagolago, malo le galulue, faafetai le tautua. E i ai foi taimi e siisii ai se leo o lenei Itu, ia malu ave i fale.

Faafetai i le Ofisa Sili o le NPF. Na uma lava ona ou alu atu i le po, ma fetai i le taeao ma fusifusi ma ou fai atu, "Ia o lena, faafetai, ua ou fialia aua ua faaoga fautuaga." O mea lelei ia faaoga, aua o nei e pei lava o se supo

povi, e faaaoga na o le fasipovi ae tiai le ponaivi e leai se aoga, aua e te ano i ai.

Ia manuia le faafofogaaga a Samoa, manuia le tatou Fonotaga, faafetai.

FOFOGA FETALAI: Malo faafetai i le tuleiga ma le saunoaga a le sui mamalu mo Faleata Sisifo. O oe foi o se tasi o sui o le Komiti o Tupe. E manatu ua taualuga ai tuleiga ma saunoaga o lenei aso.

I le agaga faaaloalo e momoli atu le faafetai tele i le paia o le tatou Palemene, e manatu o lea lava ua saausi tuleiga ma saunoaga o lenei aso ma o lea foi ua faaiu mai i lea Itu o le Maota. Masalo o le aso a taeao toe toatolu pe toafa i le Taitaifono, ona tali loa lea o le Malo, ae e momoli atu le faafetai tele i le paia ma le mamalu o le Maota Fono i le onosai i lenei aso. O a foi tiuga o le vaatele i tuleiga ma saunoaga, ia o lape lava o upu o lape foi o lauga. O le tatou vaa e fau tele e aumai avatu, afai foi e sala uta ia faatonutonu folau pea tai, a o lenei aso, e momoli atu le faafetai tele i le paia ma le mamalu o le Maota. E faafetai atu foi i le paia ma le mamalu o tupu ma ee, tamalii ma failauga, o Faauluuluga ma Faalapotopotoga a le Malo, aemaise o i latou uma o lo o taumafaia le Fonotaga. Tatou tatalo i le Atua e taitaiina lo outou soifua manuia i le aso fou a taeao e faaauau ai a tatou galuega.

A o le i faaiuina le Fonotaga, ou te tapa lau Afioga i le sui usufono mo Sagaga le Usoga e tulai mai e fai se tatou tatalo e faaiu ai, ona tatou malolo ai lea.

Na motusia Felafolafoaiga ina ua tolopo Taualumaga a le Fono Aoao i le itula e 7:00 i le po seia aulia le itula e 9:00 i le taeao o le Aso Tofi 22 Ianuari 2015.